

純白齋類稿 附錄



叢書集成

初編

主編者
王雲五

商務印書館發行



稿類齋白純

錄附

(一)



撰助胡

純白齋類稿

本館據金華叢書
本排印初編各叢
書僅有此本

純白齋類稿序

純白齋者。吾宗古愚先生著書之所也。先生名助。字古愚。自號純白老人。元至正間。授承信郎。官太常博士。歸田時。宦囊如洗。好讀書。以文名。尤耽吟咏。自編其藁三十卷。明正德間。先生六世孫淮。搜尋遺集。重梓于家。其存者詩賦雜文共二十卷。附錄二卷。皆當時名士大夫投贈之作。仍以純白齋類稿名之。非復先生手編之舊矣。嗟乎。吾郡當有元時。其講明理學而兼工詞翰者。有許白雲。原本經術而共推詞宗者。有吳立夫。他如黃文獻。柳文肅。無不篤守聖經。以文章著譽。先生皆引爲文字交。其同以詩賦雄一時者。惟胡與陳。陳則鹿皮子。胡卽先生也。鹿皮子集祇四卷。不及先生十之二。先生詩文之美。蜀郡虞集。陵陽貢奎。序中已詳言之。余何敢復贅一辭。所幸者先生世居東陽之東湖。離余家僅四十五里。又與余始祖同出安定。是書其裔孫於康熙朝已重鈔之。閱今二百餘年。猶不爲劫灰所化。此殆先生呵護之靈也。抑亦子孫之能善守也。客秋宗廉回里。郵寄來鄂。余因亟付梓人。以廣厥傳。我胡氏子孫。誦先人之清芬。其尙知所法哉。同治十二年癸酉夏四月。永康後學胡鳳丹謹序。

083

112/

2:2089

純白齋類稿 序

純白齋類稿序

純白齋者。元太常博士古愚胡先生之自號也。類稿者。先生之子瑜以詩文遺稿類而別之。以便傳誦。總三十卷。歲久薦經兵燹。殘缺失次。且第二卷及後一連十三卷俱無存。今六世孫淮深痛惜之。廿餘年間。徧扣文獻大家。求其遺墨。分入各類以補之。仍曰類稿。又以當時名公所贈詩文類于卷末。以爲附錄。湊二十二卷。將以刊梓于家。以勗後裔。錄成。其從昆季子姓見之皆喜。各出工費。以助其成。間嘗示余校正。且祈文以序篇端。余嘗聞純白先生。自幼天資警敏。勤學修行。長則宦遊京國三十餘年。盡友天下士。以資麗澤。若馬公祖常。危公素。虞公集。歐陽公玄。蘇公天爵。以及吾鄉之柳公貫。黃公潛。皆與之締文字交。以故作爲詩文。澹而文。質而麗。脫去綺靡浮薄之態。而自成雍容典雅之音。其長篇則充暢而條達。其詩律多精縝而華潤。觀其扈蹕上都。出居庸。過雲州。至灤河。賦李老谷。登李陵臺。關河歷覽之雄。宮籞物儀之盛。目之所觸。肆口成章。讀之。歷歷使人忘倦。誠吾鄉之一代儒宗也。於乎。前人之有善。不幸弗傳。天下後世無自而知者衆矣。先生之文。有子若瑜者。纂修於前。尤復世有賢孫。子紹述於後。今去百四十餘年。卽其書。想其人。尙猶一日也。何其幸哉。爲之後者。尤當珍藏以傳永久。以繼承先志可也。先生姓胡。名助。字古愚。別號純白老人。爲東陽東湖之故家云。正德庚午春二月。同邑後學杜儲公連書。

重鐫純白齋類稿序

余觀詩歌一道。上足以徵治。下足以平情。是以古先哲王。奏二南於房中。俾里巷編氓。皆得歌吟而佩服之。今聖天子建極中和。治化洋溢。萬幾之暇。御製詩章。媲美南風之曲。學士大夫競工韻學。以成一代之盛。而於臣工。亦時賜詩。以加獎勵。且命詞臣彙輯唐詩。發帑金繡梓。風示天下。故凡受官莅土。莫不體此爲兢兢。予令東陽。往往搜採遺文。期副上意。辛巳夏。公事過東湖之地。見其青峯環秀。碧澗涵澄。知其中必產名儒偉士。詢之則元時編修公助胡先生之故居也。叩其遺書。謂代凡數易。兵燹頻經。卷冊散軼。無有存者。歎惜久之。今年冬。余以丁內憂出居寓樓。將行。先生之裔持重鐫純白齋類稿乞序於余。余發視之。迺知爲先生集也。循諷再三。歎其詩力雄厚。上追古人。其理密而詞醇。如白璧之無疵也。學博而氣古。如寶鼎之有耀也。曠懷高寄。如流雲之過空。憂世傷時。如暮猿之啼峽。視談雕琢綺繪家。奚啻秦岱培塿之別。是誠有元一代之遺音。可以徵上治平不情。不遷徙於風氣。傑然成一家言者。余固有發潛表隱之責。而搜採遺文。又予素志。雖匆匆行色。不辭數言以序其略云。

康熙丙戌仲冬。賜進士出身文林郎。知東陽縣事。張愈奇書于吳寧寓樓。

跋

元季時。吾邑之隱居著書者。類多聞人。精工詩賦。則陳公樵、胡公助。其最著也。胡公號古愚。晚號純白先生。性恬退。不事聲利。苦節自甘。平時爲詩。雅好陶淵明、黃山谷。二家。其行藏亦復相似。故一代名公鉅儒。樂與爲友。自居鄉里。以至應徵史館。凡所過名山大川。風景之不齊。皆賦詩以誌其事。及告歸。孤吟聯唱。胸次洒然。宜其詩之迴絕一時也。余去先生數百年於茲矣。慕其志節。久欲得其詩而讀之。世遠代遷。編殘簡缺。明時六世孫淮集其散亡。今鮮有存者。族之裔遍叩藏書舊家。復獲殘本文多剝蝕。不無魯魚之謬。可正者正之。疑者闕之。重授諸梓。雖非初時全豹。固自蔚焉有光。余因得讀其詩。以想見其人。春容高朗。則月明波清也。老蒼華潤。則松古雲輕也。幽香自異。則如新菊之在籬。孤節獨標。則如脩筠之倚谷。先生慕淵明之爲人。因慕其詩。先生之爲人似淵明。而詩之雅逸亦似之。雖然。觀其憤時嫉俗。寄託遙深。不又隱然杜少陵之風乎。夫詩心聲也。惟先生之心。高乎流俗之上。故先生之詩。起乎世運之衰。人不敝而詩存。詩不亡而人如晤矣。時之稱善詩者。胡與陳相爲頡頏。陳之鹿皮子集。前年彙編於董廣文。胡之純白類稿。今年重梓於其孫。惟兩先生之精光。足以不朽。宜其遺文復出。並垂有元一代之逸響歟。康熙歲在丙戌一陽月。南岑後學吳霖謹跋。

題胡古愚詩集序

昔故宋渡江。大臣世家從焉。若韓、呂、晁、等氏。皆居東陽。而論學之懿。若朱、張、陸、三子。又由呂氏會合。學者見聞於斯爲盛。文獻之徵。庶或在此乎。而二百餘年矣。故老皆無在者。集又不得身至其處。常因郡人士以諮緒餘。是以如胡君古愚之氣韻清雅。集所以敬愛而不忘者。廿年前。嘗以所著示集。又爲言平日與清河元復初、四明袁公伯長所講說而告之。今二公往矣。乃獨見古愚之文。譬如崑山之玉。質旣美矣。雕琢而彌文。鄧林之木。材旣良矣。締構而益固。方將以其瀟古之器。舂容之音。以合奏乎咸章馨濩之間。不亦盛乎。噫。孰謂文獻之邦。遺風故習之不遠也。致和元年五月十日。蜀郡虞集書。

送胡古愚除翰林國史院編修序

余自少時從師講道。至呂成公。知其鄉爲浙東之金華。因考其山川之勝。孕秀於人者。非偶然也。稍長。因識喬文惠公諸子。知自穆陵以來。一時文物之盛。家公戶卿。雜以權謀聲利。相望若背項然。最後交義烏朱氏兄弟。始得論學術文章。訪問承平往事。則向之里第林園。衣冠鐘鼓之區。今皆散而爲郊墟田疇。莽然莫知所在矣。獨成公之學。徵而愈著。久而益彰。其必有屬於今而淑於後者。及來京師。得胡君古愚。質直明朗。能以辭氣發其精密。而不立偏異以從時尚。有古人之風。又因以知有許益之者焉。於古愚爲友。其人履道力學。恥於于時取名。居環堵之室。自樂也。其他俊士輩出。何其鄉之多賢哉。夫山川之氣。有時乎盛衰。而其孕秀於人者。則未嘗間斷也。故其人之於道。猶川之於水。泝其源出於山者。演迤汪洋。晝夜混混。以匯于海。其斷溝絕澗。暴盈條涸。亦豈異夫權謀聲利之於一時也。余所謂屬於今者。其不在二。三子乎。古愚以永嘉郡文學。除翰林國史院編修官。需次暫歸。凡朝之名勝。咸賦詩以贈。而屬余序。余懼夫山川之勝。亦足以遂安致樂。而損其遠遁之志。不然。處者固以其道自任。而仕者將以行於時。此古聖賢之所以不遑寧輟也。試持予言。質之鄉之老人長者。其然乎。不其然乎。致和元年夏六月。陵陽貢奎仲彰序。

胡古愚詩集序

余讀古人書。常思其人不得見。將求之。今人之行有能如其書者。苟不得之。則其言之止乎禮義。莫詩若也。吾於金華胡君有得焉。君之詩也。溫柔婉粹。不麗於俗。有志於古雅者也。故其號曰古愚。性迂直。不屑屑於世尚。客京師。峩冠博帶。遊王公大夫間。一言不及他。獨好論詩文。常矐目力爭於古今人毫髮不貸。是故樂與之交。多好古博雅之士。余嘗悲世之人於荒基野塚。得殺泉。斷碑。蝕鏡。破鼎。以爲古物。至疲精力以購之。何其蔽也。如君者非儒林之古物乎。何猶棄而莫之取。未幾執政者薦於上。擢爲國史官。余喜其有得矣。方今太平百年。登歌郊廟。其職可以作爲雅頌。稱述功德。追復商周魯之作。其古莫有加於此者。夫二雅之變。可復于正。及其終也。猶出於公卿大夫之爲君官於國史矣。而有志焉。孰不以是期。然山川風土人情物理之宜形於詠歌而載之此集者。亦足以達古詩人之旨矣。後將有攷焉。豈致和改元夏六月。陵陽貢奎仲彰敘。

純白齋類稿跋

勝國之文。何其盛也。虞、揭、黃、柳。號四大家。而以詩名家。又稱虞、揭、范、揚。初豈但是。嘗閱元文類及續文章正宗二書。珠玉燦然。蘇、天爵、鄭、栢。皆自以爲空冀北之羣矣。孰知東陽純白胡先生之作述。實其滄海之遺珠哉。杜雲洞一日示予以純白齋類稿。竟日誦之。繼之以燭。爲詩若文。誠無忝於大家。噫。石鼓之文。非昌黎咏之。卽荒烟野草中物。昌黎一集。有歐陽公識之。而後爲千古文宗。雲洞先生去純白百三十有餘年。能求其稿於胡公之孫曰淮者。詮次成帙。俾壽梓以傳。此鄉後進之尙友先哲。與胡氏子孫之能世守祖遺。可謂兩得之矣。正德庚午夏五月旣望。鄉貢進士天台後學龐龍書。

純白齋類稿目錄

卷之一

賦

西峴山賦

秀野園賦

小赤壁賦

秋堂賦

圍棋賦

卷之二

五言古體

京華雜興詩二十首

上京紀行詩七首

同呂仲實宿城外早行

昌平

居庸關

懷來道中

李老谷

赤城

繁華

春日言懷

落葉吟

湖上燕集

發婺州

和桂坡李宅仁甫山園八詠

草蹊春愈

竹逕秋聲

冰壺避暑

雪嶺尋春

石墮夜月

花嶺夕陽

翠屏微露

土鍾茶烟

卷之三

純白齋類稿 目錄

五言古體

黃樓懷古三首

分義田詩

寄柳道傳十首

送永康縣尹范成父

題熊仲岳鍊師雲巢

孝思堂

喜雨

饑嘆

送復上人歸越

賦棘道送蕭存道元帥

嚴氏高遠堂

題危太樸雲林隱居圖

皆山樓

柏友亭

中秋月下小酌

宿定興有感

春闈對讀夜坐諸公

跋實彥卿鹽憲四詠軒

紅藥香風 蒼松皓月 怪石博雲 綠筠擊雪

賦青門送李侍御惟中

溪橋行客圖

天師墨竹木石

池臺春色

堪老園爲汪叔志作

卷之四

五言古體

古意四首

苦寒

題遜圖

送胡允文楊廉夫趙彥直登第歸越

苦雨呈治書

和黃晉卿北山紀遊八首

緞源 草堂 三洞 鹿田 寶峯 潛嶽 山橋 寶石

過馮公嶺

遠碧樓

李成江山風雨圖

水木清華亭二首

九日會晉卿

蒼雪軒

除夕

和繼學送王儀伯叅政遼東韻

送康里子淵右丞赴浙省三首

雨中謝王治書作松石見贈

東坡遊赤壁圖

愛松軒

題黃晉卿西園雅集圖

史顯甫左丞小車行春圖

王公儼少監雲松巢

客居冬懷十首

留雲軒

卷之五

古詩

松柏歲寒圖歌

清涼寺

續太古雪歌

周權府墨竹

塵外亭

青青柏一首壽王治書

和歐陽承旨韻題金坡圖

灤河曲

秋夜長

空閨詞

卷之六

古詩

牛馬行

弔臙脂井闌歌二首

梅花吟

題范文正公書伯夷頌

黃河行

苦熱行

題治書所贈松柏石

上京獨石歌

再賦李陵臺

龍門行

三禽言

夜雨思歸

雲松巢歌

遊道場何山追和東坡韻

溪月歌

贈韓明善先生

壽吳宗師七十

孔明草廬圖

遼西孝友行

高彥敬亂石奔流

瞻綠堂

還家示親友

題敬叔所藏漢天馬蒲萄鏡

秦元之所藏墨梅

郭熙雪林曉霽

葛稚川移居圖

瑞柳歌

題張鍊師枯木竹石圖

哀太師

苦寒行

月食遇雨詩

東坡載酒堂

七十吟

贈寫真汪鏡湖

春草曲

孝養歌示大兒

遊赤松

上都回

孫澹如墨梅

卷之七

五言律詩

春遊三首

病中述懷

再用韻答季仁伯二首

送師古姪孫之杭

和古學兄秋日山行

挽凌吉叟教授

宿元符宮呈王牧齋宗師

次韻聞鵬

和道心姪山居

長至

哀李清臣侍御

過青州呈丁幼度御史二首

挽胡石塘先生二首

過淮安

秋夜旅懷

雨中臥病二首

李息齋墨竹

和許振古溪上晚晴

對梅

挽方存雅先生二首

冷泉亭得炎字

次韻朱仲山過錢塘

挽王雪溪二首

春日言歸

寒食

李海務和御史韻

東昌道上

姑蘇書所見

挽劉師魯二首

道館夜雨

挽揭曼碩學士二首

春風軒爲蔡士安作二首

遂心堂婺源汪氏

寓樂樓

春日卽事

和王治書題道士幽居韻

營中述懷二首

挽袁伯長學士二首

送崔遜齋兵部奉祠還高麗

和王繼學廉使樓上獨坐二首

挽宋正獻公誠甫二首

送方縣尹

松巢

端午漫題

挽許益之二首

題清白泉亭

徐衛教

挽馬伯庸中丞二首

聚星圖

中秋寓僧舍

雨竹山房

和治書題九成宮圖韻

和治書題驪山宮圖韻

笑閑亭

智者寺二老亭

藏六處士

潭心齋

送曾止善孔廟司樂

黃晉卿同遊靈隱天竺

大駕還內

木尙書耆壽市居

和仲實韻

雲州

李陵臺

卷之八

七言律詩

元會口號

天壽節和韻

上巳從康里子淵拜魯國文貞公墓

王氏德符堂

送余德撝南歸燎黃

和馬伯庸同知貢舉試院記事

杜清碧思學齋

送王治書分臺上都二首

開府大宗師張公遊仙詞五首

和治書寄吳真人韻

送王繼學江東廉使

蘇伯修滋溪書堂

送徐中孚祠武當歸桃源

次韻治書題九成宮圖

次韻治書題驪山宮圖

送周本心修撰祠南嶽

送史正翁嘉興經歷

送王安道處州知事

送鄭彥禮同知

送唐梅宇真人歸江陵

萬安寺觀習儀

聽琴

王氏自得山居用陳衆仲韻

春闈對讀同趙子期黃子肅夜坐

和虞學士讀廷對策玉堂有賦

奉祠三朝御容

題蘇郎中墓碑

南城試院和王子肅韻二首

試院和主文魯子蠶僉院韻二首

試院和程厚甫韻

上京紀行再賦居庸關

龍門

灤陽七夕分韻青字

灤陽述懷

再用韻答虞學士

三用韻答吳宗師見和

四用韻贊虞公爲宗師書看雲記

龍虎臺

題鄭義門

告老南歸述懷

卷之九

七言律詩

送簡秋碧管句還孔林

和馬伯庸道宮夜坐

和趙秉彝夜坐見寄

次韻遂彥常遊江心寺

敬亭春雨樓爲繼學廉使賦

坐邀山色軒

陪廉使遊昭山亭

送蘇伯修分院上都

送李仲甫應奉祠西蜀

送蘇伯修南臺御史

送王君實西臺御史

冬日書懷

秋月寒潭

送周伯溫廣東僉事二首

王氏壽慶堂二首

太白樓

送袁慶遠潮州經歷

茶屋

又詠

賀天師禱雪靈應

賦喜白髮

歸來漫題

追和宋誠甫題蓬萊閣韻

壽吳宗師

又詠

宿智者草堂呈輝公

送王溫夫宣城教授

濟州阻水

括蒼道中

送于壽道知婺源州

范文正公忠烈廟

嘉樹軒

送上官來復祠嶽瀆名山

李氏遺經閣

寄陳玉林鍊師

和王君實員外巡山韻

送謝堯章

涿州先主廟

送蘇伯修淮東廉使

甕天

高氏四景亭

雨竹山房

東平段千戶挽詩

寄題留槎閣

送太里蔣良軒赴闕

卷之十

七言律詩

中秋月

上享太廟禮成

送祁伯溫御史

梅所

再調編修

沙河舟中

過京口有懷先兄淮海山長

挽王繼學中丞二首

壽吳宗師

南郊大禮慶成

題丁元善陽明樓

送高承之赴崇政巡檢

中秋宿中山值雨

和趙子期侍郎延春曉直韻

春闈簾外紀事

和葉敬常危太樸同遊四明東湖

除夕偶成

寄題雪堂重建

赤松宮

智者寺

虎邱寺

送夔子山平章赴杭省二首

始皇

長城公

明皇

子房

蓮花

七夕

寒食西湖上分韻得聲字

和方韶卿遊涵碧韻

和葛介軒對雨

禪悅庵

寒食雪寄葛介軒

和師古姪孫遊禪智寺

同李此竹遊西明巖

贈閑雲屋長老

寄濬圭杜隱士

禹廟

水北山房

寄泰里蔣良軒

卷之十一

七言律詩

蔣山

寄古學兄

金山寺

送張鵬飛僉事福建

次韻楊友直遊茅山

送趙伯升江東照磨

送鳳山講主歸天竺

古學兄自京口至

春雪

玉晨觀

虎邱寺

畫山水

和袁伯長韻送繼學伯庸赴上都四首

次韻楊友直偶作

和閒閒真人悼鶴

和道心姪遣興

赴美化書院別親友

送董仲禮赴察院

遊小赤壁

新試院

西山晚歸

訪孫幹卿州判

效侯良齋諧音一律體贈幹卿

多景樓

三月廿八日喜雨

讀文山集

和李息齋留別南歸二首

和張希孟學士拜命不赴四首

淮安忠武王祠

松竹軒

賀歐陽圭齋除翰林承旨

試院和察士安韻

送王公儼代祠南鎮

告老得請留別諸公

卷之十二

五言排律

壽柳道傳博士

壽吳間宗師

壽馬伯庸學士

和王治書題商學士山水

和治書春日臺中獨坐

送史秉文助教祠西嶽還家

胡安常侍郎父慶壽八十

元夕王參政席上賦翦燈

壽虞伯生學士

劉仲彝御史孝廉

送趙宗吉西祠隴蜀

胡母李孺人挽詩

新成八詠樓呈張毅甫廉使

和趙可學御史試院紀事

送袁雪樵河間治中

王致道母壽七十

遊赤松宮

酬和古律詩

卷之十三

五言絕句

白雲

石鼓嶺

黃秋江耕釣山房十詠

清江釣月 空谷耕雲 蒼峯卓筆 碧嶽開屏 楓林葉鴉 雲澗浮龜 峻嶺扶車 圓岡揭斗 雙溪合璧 古寺垂虹

希夷像

山水小畫五首

劉令像

子昂枯木竹石

秋晚小景

蘆雁四詠

新涼二首

勸兄弟十首

越上寶林寺八詠

飛來峯 應天塔 靈殿井 大布衲 羅漢泉 古鐵鉢 深竹堂 盤翠軒

除夕

大能仁寺五詠

支蓮室 玄度橋 天鏡閣 傲雪軒 見月亭

孔子泣麟圖

布袋和尚

雨水竹

畫虎二首

尖帽山

彈琴峽

仙人枕

白海

隱趣園八詠

君子池 待月壇 蜀錦屏 天香齋 香雪壁 晚香徑 竹澗亭 歲寒亭

附六言絕句

嵇鍊師秋山小景二首

羣魚龜蟹圖二首

虎溪三笑圖二首

北山不老泉

卷之十四

七言絕句

安山見王繼學侍御

商學士山水

蘇李祖別圖

羅稚川山水

戲詠鶴

桐江舟中

柯敬仲枯木竹石

登舟口號

用柳道傳韻題天王講主墨梅

贈懷空上人

草堂歸來圖

錢氏孝感紫芝圖

東坡書三馬贊真蹟

錢清道中

李息齋墨竹

戲作東門竹枝詞五首

僧元卿御史送米

得家書

送道士楊一可歸儒養母

墨蘭

畫猿

鑄橘樓

郭天錫山水

子昂秋岸牧牛圖

懷遠五首

謝饒士悅惠楮衾二首

朝賀退赴南城試院三首

題七賢過寒林

值初度

蘆溝南道上三首

上京紀行見玉泉山下荷花

榆林

槍竿嶺二首

再賦李老谷

過桓州

題望都鋪

滌陽雜詠十首

偶題

宿牛羣頭

御花園

看雲步虛詞壽吳宗師十首

柯敬中竹石枯木

訪王用亨丹房又題墨梅二首

卷之十五

七言絕句

題宋理宗御札賜王霆後二首

九日同晉卿攜酒訪士悅二首

題秋粟銀鼠卷

題蔡君謨家書二首

懷李亭

祠山張廟

春雨

和張毅夫右司燕集

折枝來禽

聽松樓

江鄉捕魚圖

又詠

遊李氏園

湖山堂

六一泉

過瓜洲

羅稚川雪景

赤壁圖

又題

湖學感興四首

戲呈黃晉卿博士

望仙都二首

過馮公嶺

又題馮公嶺

追和洞賓留題玄妙觀蕉池二首

車上

九日書寓居壁

又詠

鐵木迭兒丞相斷碑石二首

眉菴爲伯生賦三首

班姬題扇

徐孝子

鷺鷥野景

寒齋漫成二首

漫興二首

瓊花

題涿州驛

題崔鵬龍圖家傳二首

南歸舟中雜興七首

初度口號

用王玉成韻題鮮于伯我五郡紀行詩二首

瓊花

題泮東徐原明甫山水圖

卷之十六

七言絕句

元旦卽事二首

墨雨竹

寓舍偶題二首

宿貢泰甫書齋二首

夏日寓僧房有感三首

正月三日王仲能載酒同飲湖山堂二首

過陵州

初度遊西山

溪山過雨圖

暮冬感懷

又題

初度偶題

良鄉道中

過涿州

水仙花

沃青閣

追和荆公留題龍泉二首

東湖十詠

東湖秋月
五度朝暉

巖山蒼翠

南浦春流

禪悅白鏡

陳莊水亭

葛園花竹

秋堂湖石

秀野沙洲

四邱夕照

子猷訪戴

雪窗墨蘭

古松

余景山枯木

庚寅歲旦

隱趣閑步二首

卷之十七

七言絕句

月下曲

山行

過釣臺

山中寒食

聽雨

和靖墓

冷泉亭

泊桐江

禪悅庵

玉繡毬二首

尋僧

鳳凰臺

畫馬

渡水羅漢

王陵母伏劍圖

瓦缶浸梅戲成二首

桂花

枯木

盤菊

畫馬

次韻書懷

春雨書懷二首

贈相士周可山

送周良臣補廣東書史

題良道人房

發建康二首

寓居夏日二首

題黃清夫秋江釣月圖二首

都下春日卽事十首

次韻春日漫成二首

和馬伯庸送南歸韻二首

挽三十八代天師步虛詞十首

初度寓普照院

幽風圖二首

花下口號

湖上

舊內白塔寺

九日感興二首

壽星寺

偶題

送祝丹陽鍊師祠武當山三首

和道心姪湖上三首

過常州

子昂畫馬

聞進士唱名

送劉僉事閩南決獄二首

四月十九日恩榮宴

示兒

告老

卷之十八

銘類

誠銘

忍銘

看雲道院銘

義門銘

尙志齋銘

純一齋銘

聽竹軒銘

太乙舟硯銘

筆銘

芳遠堂銘

省心齋銘

敬止齋銘

惟善銘

時思銘

虛齋銘

頌類

慶雲頌并序

傳類

大拙先生小傳

純白先生自傳

廉侯遺愛傳

卷之十九

贊類

皇朝元會板位圖贊

張夢臣真贊

古佛像贊

仇公度山林小像贊

純白道人贊

如愚贊

古賢贊

附傳

桂坡李至愚先生期頤傳

真西山小像贊

仇公哲真贊

南極老人贊

蕭鶴野真贊

達摩贊

別峯法師真贊

陸賈 周亞夫 申公 魏相 黃霸 卓茂 竇融 馮異 袁安 羊祜 杜如晦 張巡 李光弼 李晟 李泌 段秀實 楊綰 曹寶 彬 錢若水 呂蒙正 李沆 王旦 張詠 林逋 魯宗道 胡翼之 范鎮 包拯

東李李至愚期頤先生贊

題跋類

題黃清夫耕雲釣月圖

跋羅進士墓誌銘

跋王宗甫臥雲集

跋陳氏義莊記

題竹隱老人

跋余廉訪所篆東浙第一家五大字後

碑銘類

重修雙林禪寺碑銘

達魯花赤亦璘真儒林公去思碑銘

卷之二十

序類

玉海序

桂坡李公澤先生石門六觀圖序

浦陽淵穎吳先生文集序

上京紀行詩序

胡氏族譜序

記類

古愚齋記

隱趣園記

李氏木香亭記

宋氏世譜記

附錄卷一

詩類

奉題雜興

王士熙 馬祖常 虞集 歐陽玄 貢奎 曹元用 謝端 段輔 李端

趙由辰 張起巖 周仁榮 湯彌昌 王肖翁 龔璣 劉汶 楊剛中 黃清老

蘇天爵

送胡古愚赴古威衛教授

胡滅 寄題胡氏隱趣園

吳澄

次胡古愚韻二首

柳貫 次古愚剪燈詩韻

吳師道

次胡古愚陸翰林編修

王士熙 歐陽玄 馬祖常 王士點 王士然 宋沂 趙由辰 湯彌昌 龔璣

王肖翁 劉汶 金壽祖

題上京紀行

王思誠 王士點

純白齋類稿 目錄

題大拙小拙傳後

王士點 吳全節 劉 聞 楊維禎 歐陽玄

奉賀送古愚先生致仕贈行 張起巖

奉和古愚太常留別高韻

許有壬 馮思溫

奉酬見寄清製韻元敬賀致政榮歸惟面同一捧腹

述律杰 蘇天爵

次韻奉答古愚先生留別之作

汪澤民 馮福可

依韻奉酬

于文傳 仇 濟 劉尙質 呂世元 吳 當 張 翥 方道壑 班惟志 王士點

陸宗亮 林 奇

奉和太常博士古愚先生致仕歸金華述懷高韻 林奇

題胡博士嘉樹詩卷後 宋 濂

文類

送胡古愚序	許謙	胡太常餽山存稿序	張以寧
題古愚詩集	吳澄	題康里子淵贈胡助古愚序後	柳貫
題上京紀行詩後	王守誠	題上京紀行詩後	王士熙
題上京紀行詩後	蘇天爵	題上京紀行詩後	王理
題上京紀行詩後	黃晉卿	題大拙先生傳後	王士點
題大拙先生傳後	陳旅	題大拙先生傳後	揭傒斯
題大拙先生傳後	李好文	題大拙先生傳後	蘇伯修
題大拙先生詩後	周伯琦	題大拙先生傳後	吳師道
題大拙先生傳後	王守誠	題太常胡先生隱趣園八詠	蘇天爵
跋古愚上京紀行詩	李朮魯	跋上京紀行詩	呂思誠
跋上京紀行詩	陳旅	跋上京紀行詩	曹鑑
跋上京紀行詩	吳師道	跋上京紀行詩	王沂
跋上京紀行詩	揭傒斯	跋大拙先生傳	趙亨
跋大拙先生傳	錢良右	跋大拙先生傳	張雨

跋古愚升學祭器文

李源道

跋升學祭器文

鄧文原

跋古愚鑿坡小錄

吳澄

記類

胡氏瞻族莊記

孫德之

送胡主簿詩序

馬國章

附書

拜覆博士相公

宋濂

再拜狀上太常相公

宋濂

拜覆太常先生

宋濂

純白齋類稿卷之一

元胡助撰

郡後學胡鳳丹月樵校梓

古賦

西峴山賦 并序

西峴者東陽望山也。稽縣誌前修詩雅之什頗多。顧未有爲之賦者。豈其不登載歟。助操觚牘有年。伏居里下。輒采其事。以寓微意焉。其詞曰。

二儀之氣凝而爲山。陽鍾秀麗。陰結巉巖。君尊者五嶽。而天下之山皆臣屬。雖小邦與下國。亦必有望居其間。是故天台雁蕩。匡廬禹穴。專美一方。千古誇說。世蓋有實同而名異。或形容之未至。得不貽林澗愧者乎。粵稽東陽之壤。實肇建於孫吳。西峴雄峙其南。今憑重鎮於邑都。東峯崑然而對拱。兮儼大賓之欲趨。蒸嵐鴻洞。疊巘崎嶇。崇岡衆皴。修澗縈紆。鱗然若積。吁然若虛。蜿然若動。駭然若通。飛瀑澎湃。鳴籟喧呼。深林灌薄。蒼鬱蔽虧。坡陀相屬。連綿委蛇。朝以畫溪。表以石笋。傍聯涵碧。下瞰市井。飯山莪莪。雲洞隱隱。前揖摘星之峯。後控風門之嶺。數百千仞。莫測其高。數十百里。盤踞周遭。攀緣登陟。踰證疲勞。踐莓苔之蒼石。爭線路於猿猴。灑松風於絕壑。驚翻天之海濤。白雲生於步履。丹霞拂於巾袍。至若懸崖峭壁。萬

木嶺崒。凌霄翳。駭綠紛紅。太空倏變。幻施神功。斷虹殘照。烟霧朦朧。或青或紫。若淡若濃。詭態異狀。模
寫難窮。爾乃秀於物。則有靈藥芳茗。珍蔬果木。橡栗鷓鴣。黃精杞菊。瓜勝東陵。酒妙天下。鳥獸連山。魚鱉
盈沼。可釣可羅。可茹可飽。秀鍾於人。則有名公巨卿。忠臣孝子。文學英俊。不可勝數。元與詞藻。爲唐儒紳。
二馮競爽。高蹈韓門。昭諫舊隱。墨沼猶存。孝哉斯許。正節忠魂。又若南渡以後。喬葛馬李。官顯于朝。望尊
閭里。派拓名園。崢嶸甲第。曾幾何時。荆榛滿地。嗟夫。終南之居。佳則佳矣。莫逃捷徑之譏。鍾阜之隱。美則
美矣。不免山靈之移。矧茲山之擬峴。始立名以何徵。稽故老之流傳。本仲文之遺榮。彼晉氏之賊子。豈羊
公之擬稱。惟戴令之遺愛。儼泮宮之碑銘。俾易之曰戴峴。斯善惡之昭明。慨茂陵之傑作。破千載之昏冥。
有若空山石壁。泉流琮瑤。非絲非竹。節奏自成。揭名水樂。一洗洼淫。坡公寄詠。高視古今。又有龍湫碧澗。
曰不老泉。飲之不竭。莫窮其源。昔人之登臨者何限。其遺跡蕪沒於荒烟。若唐宋名流之鐫刻。亦皆燒侵
土蝕而莫完矣。孰與我居泉上而老焉。乃爲招隱之歌曰。振衣高岡兮。水樂潺湲。磬襄入海兮。遺音空山。
秋風嫋嫋兮。桂可攀。驂鸞翳鳳兮。扣雲關。招赤壁之謫仙兮。弄明月以俱還。又歌曰。薇荒兮。芝老。四海清
兮。起商皓。蕙帳空兮。曉寒。樹蒼蒼兮。雲漫漫。疇能侶猿鶴兮。佩明月於空山。

秀野園賦 井序

僕營小圃久矣。願以奔走南北。遂就荒蕪。丁巳秋來。歸日涉。始一構茅亭。今春草木生意蔚然而。僕以
病廢葺理。嗟人事之易違。慨園池之難就。故爲賦以紀其實云。

余觀夫古人之遊息兮。擅山水之清佳。築亭館以臨水兮。騁觴詠之逸懷。或窮達之不齊兮。固性情之匪異。澄心源之鏡淨兮。乃有得於真意。矧愚黷之所趨兮。與流俗而背馳。旣膏肓於簡牘兮。復寄興於園池。嘗引流而種樹兮。始茅亭之云構。慨江湖之放浪兮。至今十年其未就。賦彭澤之歸兮。尙松菊之如舊。竹瀟瀟而夏玉兮。栢凜凜其歲寒。輦太湖之蒼石兮。幸故人之破壑。餐野梅之浮香兮。植小山之叢桂。樹忘憂之萱草兮。藝盈畹之蘭蕙。方桃李之成蹊兮。開步障之紅雲。美葵榴之當晝兮。水華淨而含醜。伊四時之花木兮。聊封植其一二。客與我而同遊兮。唯飲酒而琢句。嗟數畝之閑壤兮。在夫人之經營。步石徑之幽曲兮。與魚鳥以忘情。後有臺之孤峙兮。環溪山之秀麗。可登覽以自娛兮。吐胸中之奇氣。揭秀野以爲名兮。取獨樂之詩篇。豈專專於學博兮。庶幾景仰夫昔賢。若有人而清嘯兮。實同得於斯時。杖屨之往還兮。慰索居之牢落。彼貴盛之名園兮。在往昔其焉窮。極勢力之營造兮。曾不一瞬而已空。惟種德以爲根兮。獵文藝而培植。敷芳陰之茂密兮。綴纍纍之佳實。灑清風於田里兮。寧光景之留連。諒出處之難必兮。樂吾生之餘年。擷畦蔬以侑尊兮。蓋惟日而超然。

小赤壁賦 井序

延祐六年夏四月望後一夕。宋氏子具舟邀余同二三客遊于小赤壁之下。明日旣歸。乃爲之賦。其辭曰

小赤壁者。蓋美化溪山之勝處也。其上則蒼崖巨石。其下寒泓澄碧。雲出雨空。變化莫測。烟霞宵冥。風月

無極。敷異草之茸茸。蔭長松之落落。蟠老蛟之蜿蜿。鳴幽禽之磔磔。蹲釣磯於中流。隱丹竈於深穴。遺笙鶴之清音。留穀竦之巨跡。故老相傳以爲劉晨修煉之室。是蓋異人之窟宅者矣。繫後來之好事。慕周郎之赤壁。庶風流之可追。故小字之名錫。矧縉雲之古邑。實山水之奧區。屬觀遊之清麗。多仙佛之所都。直蒼山之嶽峯。連左庫之膏腴。維昔流風之未泯。至今冠帶兮于于。爾乃孟夏旣望。林巒蔚如。爰有儒生。具舟載壺。邀胡子與客。遨遊于其下。浮雲脫壤。明月東升。風行水上。穆然而清。淨影涵虛。魚鳥不驚。玻璃萬頃。流光熒熒。於是舉酒相命。客接商聲而歌之。歌曰。周郎兮功成。山川鬱兮炳精英。遷客兮興懷。橫大江兮擊空明。兩賦出兮洗千古。水與月兮含餘情。胡子乃扣舷而和之曰。劉郎兮登仙。溪壑峭兮神清寒。英雄兮安在。邈高風兮山水間。同赤壁兮誰小大。化白鶴兮遲來還。歌罷酒酣。移舟碧潭。我欲然犀。下照幽潛。戒取樂之或過。懼鬼物之弗堪。客仰而望俯而嘆曰。吾聞峴首非高。因羊公而始著。山陰匪奇。託右軍而永譽。嗟惟此山。峻美實異。何聲聞之弗馳。殆名世之難遇。彼何澹之俗書。非老坡之妙語。故山川之顯晦不同。與胡子忻然而笑曰。客何知之晚也。豈惟山川人事固然。世有乘時徼利而成名。亦有刻志勵行而終蕪沒者矣。倘是山之居通邑。曾何患聲聞之不大出耶。今我與子。遺棄憂慮。終夕酣嘯。徜徉于此。惟其真樂之是適。豈虛名之足取。況夫太平盛際。文治方興。窮書林之騁騫。肆藝苑之憑陵。漱芳潤而養浩。將待賈而揚庭。期接武於先達。庶無愧於山靈。

有美君子。築室宇秋。左右書史。於焉藏修。輪奐之美兮。不侈不陋。軒窗之曠兮。既固既周。豈尙友於千載。匪專美於一邱。方其殘暑未退。火雲在霄。忽中夜之送溼。開六合之新窰。爽氣浮於几榻。商聲振乎枚條。或舉裳而拄笏。發孤詠於風騷。爾乃金井寒兮疎桐。畫蘭香兮桂樹。室幽幽兮蟲鳴。窗罔罔兮蟾吐。水鏡淨兮潦收。百草衰兮墜露。於是主人命童奴。卻桃笙。延毛穎。進陶泓。修臨池之故事。覺逸興之橫生。貌猗猗之玄象。肖磊磊之瑰形。琴七絃兮古操。酒一瓢兮閑情。客或過而笑曰。異哉。主人之字。夫堂也。其將照昌黎公之短檠乎。其將賦歐陽子之秋聲乎。吾嘗北走燕趙。東過齊魯。而南遊吳越矣。知秋之爲狀者。宜莫余若也。嘗試爲主人言之。主人亦嘗試聽之。其氣至清。其容至明。人稟之而神秀。物受之而形成。是蓋收兩儀之妙運。而擅一元之利貞者也。若夫洞庭兮波生。吳江兮楓落。夜雨兮孤舟。殘陽兮高閣。天空兮淩厲。鴻飛兮寥廓。恨久別之音稀。顧山川之非昨。歎客子之無衣。感騷人之有作。又觚稜出兮宮樹。曉角弓鳴兮沙場陰。泣藏箏之紈扇。悲出塞之胡琴。屬刑官之進用。雖貴盛而驚心。復有辭家千里。去國十年。杯殘炙冷。衣弊履穿。慨功名之未就。傷歲月其脫絃。恨遷謫之已久。望君門兮九天。其或隨時見幾。守道知足。思千里之萼鱸。懷三徑之松菊。駕西風而言歸。蓋超乎榮辱者也。是可以知江湖之秋矣。若斯堂之秋。則又有說焉。今夫人生千載之下。而知千載之上者。莫備於書。一身稊米之微。而參天地之大者。莫貴於儒。方庭戶之清肅。宜簡編之卷舒。覽萬物之成遂。添滿懷之瀟灑。觀聖人之筆削。示嚴威於亙古。窮則秋歸於一堂。達則秋行於天下。方今郡國賓興。斯文增重。凡含毫持牘之士。孰不自陳而願用。矧卓犖之

奇才兮。切獨悲此蕭索。吾恐將有事於四方兮。又烏能專秋堂之獨樂也。主人矍然謝曰。子姑置四方之事。吾將與子逍遙於斯堂之上。以遊乎顯氣之始。勿敗佳致。客曰。唯唯。

圍棋賦

閑居適意。惟棋甚美。子圓局方。法乎天地。分白黑之兩奩。妙動靜而爲智。斯乃神仙之用心。蓋亦聖賢之游藝。若夫剝琢琢。琮琤丁丁。寂無人語。惟聞子聲。潛斡化機於經國。默運方略於制兵。初磊落以布勢。漸縱橫而見形。察形勢之向背。識去就之重輕。顧雁行之斷續。審象眼之虛實。守邊角之無虞。憂腹心之有疾。將欲取而與之。勿貪得而固必。至於一著爭先。詎宜妄下。觀勝負之善籌。係取數之多寡。始自固以迫人。貴知權而御詐。投閒隙之造次。據要害而整暇。若臨敵以見幾。實千變而萬化。稽前古之戰爭。殊可明於鑑戒。嘗試評其一二。良以小而喻大。或持強而致敗。或徼倖而有成。喪符堅之百萬。天陰相夫衛青。或用奇而不濟。或得志而橫行。師蜀道之再出。火赤壁而飛英。或詭計以設險。或乘危而制勝。縊樹下之龐涓。嚴背水之號令。或百勝而一敗。或屢危而僅存。聞楚歌之四面。成劉備之三分。或輕奮而深入。或重圍之無援。傷覆軍之李陵。慨忠烈之巡遠。或孤城之堅守。或長驅而席卷。猶卽墨之不下。平六國而制郡縣。諒深謀之莫盡。矧雅度之難能。喜成功而折屐。臨死生而不驚。復有勢均力敵。無間彼此。何虧何成。不生不死。兩忘所爭。揖讓是似。至若花陰兮深院。竹色兮虛庭。青燈兮夜雨。愛日兮牕明。敵手相逢。時對一杯。高懷逸韻。實倍常情。輒隨機而應變。非苦心而勞思。驚脫兔於楚女。笑虎穴之得子。爾乃固深根於商

嶺。寄。白。日。於。柯。邊。勝。忻。然。而。敗。亦。喜。庶。足。以。順。神。而。保。年。

純白齋類稿卷之二

五言古體

京華雜興詩二十首有引

余待選吏部。貧不能歸。塵衣垢面。憧憧往來。蓋亦莫自知也。於是日所聞所見。感觸於中者。輒形爲詩。五言五韻。凡二十章。題之曰京華雜興詩。率然而作。曾無呂律之次。譬如候蟲之鳴。不能自己。姑亦偶寓其一二微意焉。他日南歸。將以誇示田夫野老。俾略知京華之風云爾。

其一

朔方古燕國。今爲帝王都。建元大一統。萬世恢寵摹。聲教日以遠。巨麗昔所無。梯航極山海。寶玉殫貢獻。冠裳集詭異。親見王會圖。

其二

通門十有二。萬雉雄都城。崇天壯宮闕。朝賀臨大明。禮樂參今古。郊廟薦德馨。中書總庶務。比屋皆公卿。時有能賦者。揚揚頌休聲。

其三

兩院最文館。優游玉堂仙。扶杖會朝議。秉筆光史筵。辟雍訓胄子。濟濟登才賢。人時正歷象。星舍儀渾天。東觀圖書府。圭璧何爛然。

其四

聖心資啓沃。曠典開經筵。大臣領其職。諸儒進翩翩。講陳堯舜道。庶使皇風宣。恭惟帝王學。繼統垂萬年。方將耀稽古。寵遇光屬聯。

其五

漕渠越千古。海運連萬艘。百靈咸受職。長風駕洪流。都人仰陳腐。日糴太倉籌。本根貴儲蓄。經費無沈浮。巍巍廟堂上。必先天下憂。

其六

嗟彼西方教。崇盛何煒煌。至尊猶弟子。奴隸視侯王。禪衣爛雲錦。走馬趨明光。民賦耗太半。永言奉祈禳。寂寂東家老。絃歌守其常。

其七

京師聚人物。固足廣見聞。經術宗濂洛。詞章軼卿雲。致理三代上。漢唐何足云。銓衡有定法。刑憲無深文。端能守官戒。豈羞獻曝芹。

其八

峩峩十石鼓。列置太學陴。懇懇韓公志。厥今乃見之。文明日以盛。好古如渴飢。千載一俯仰。陳迹何容窺。荒城長春草。寂寂金臺基。

其九

翠華慰民望。時暑將北巡。牛羊及騾馬。日過千百羣。廬巖周宿衛。萬騎若屯雲。甍房貯窈窕。玉食羅羶葷。珍纓飾駝象。鈴韻遙相聞。

其十

水深土良厚。物產宜碩豐。瓜菓饒夏實。棗梨絢秋紅。槐陰蔽門巷。喬木多古風。廣收壓漚酪。皮羽邱山崇。一葦可萬里。河流誠會通。

其十一

君子貴名爵。藏器將俟時。難進每由道。晚成寧覺遲。豈無英俊士。流落日以卑。亦有庸瑣才。附驥千里馳。何用多感慨。古人亦如斯。

其十二

天衢肆寬廣。九軌可並馳。晴雷震奔軸。輕蓋常披披。長風一飄蕩。塵沙漲天飛。憧憧有玄相。貿貿無素衣。亦擬頌功德。何如歌式微。

其十三

修綆汲深井。劬勞出甘泉。皮服禦寒冽。土床煖冬眠。寓客延歲月。區區計陞遷。都城百萬戶。喪車日喧闐。洪鐘發晨省。達者斯歸全。

其十四

久安誠富庶。豪華恣奢淫。優坊飾文繡。酒館書填金。市中商賈集。萬貨列名琛。馳騁貴遊子。車塵如海深。翩翩江南士。駭目還驚心。

其十五

富饒有臭肉。貧衣無完襟。販夫逐微末。泥巷穿幽深。負戴日呼叫。百種聞異音。馬流爭決拾。曝藏比乾薪。苦樂諒習慣。貧富何由均。

其十六

北風吹海子。徹底成堅冰。冲冲誕收鑿。往來堪騎乘。春陽一以轉。凍解聞裂聲。依然拂堤柳。綠波照人明。彷彿江南岸。遊冶多歡情。

其十七

一自書雲後。家家成蟄居。寒向紙爲戶。啓閉猶卷舒。風塵不能入。盎然春意如。石火永終日。飲食與之俱。標圖計陽盛。九九寒消除。

其十八

我來寓京邑，興懷舊遊遨。春風有遺恨，不見玄都桃。世事若雲變，矧茲居市朝。物理忌滿盛，榮華易蕭條。布衣抱玉雪，寧羨宮錦袍。

其十九

好名與好利，清濁無異宜。譬如尙經術，以及工文辭。同此慕光顯，胡爲分等夷。捷哉終南徑，逸矣西山薇。車馬紅塵際，滔滔良可悲。

其二十

世治化由北，風氣今咸通。生長太平日，千載能幾逢。又幸冠章甫，文思發泉蒙。微吟識百一，浩大能何窮。他年老田野，尙想京華風。

上京紀行詩 七首

同呂仲實宿城外早行

我行得良友，夜宿建德門。晨征帶殘雨，華星綴雲陰。局轡乘羸馬，沿途共笑言。兩京隔千里，氣候殊寒暄。聲利汨清思，山川發雄文。平生所未到，扈蹕敢辭煩。愧予雁鶩姿，亦復陪鸞鶴。歷歷紀瑰偉，一見勝百聞。茲遊償夙愿，庶用歸田園。

昌平

經過昌平縣，實惟劉子鄉。當時直言策，至今有耿光。功名直瑣瑣，氣節橫八荒。斯人寧復見，閱世徒慨慷。

奉祠表諫議。化俗崇賢良。賊臣偶同里。遺臭亦難忘。嚴程懼稽緩。古迹嗟莫詳。揮鞭事前邁。居庸翠蒼蒼。

居庸關

居庸古關塞。老我今見之。天險限南北。亂石如城陴。朝光暎蒼翠。征袖涼颼颼。澗谷四十里。崖巒爭獻奇。禽鳥鳴相和。草木蔚華滋。佛廬架巖上。疏泉匯清池。民居亦棋布。機磴臨山陴。清幽入行李。緩策遂忘疲。黃屋年年度。深仁育黔黎。從官多名儒。山石徧題詩。伊余備史屬。斐然愧文辭。矧茲中興運。歌誦職所宜。皇靈符厚德。豈曰恃險巖。

懷來道中

百千僦一馬。日行百餘里。未明卽戒途。將至輒中止。人困馬思睡。馬疲徒用箠。驅馳失情性。老病侵髮齒。可憐翁鞅掌。豈知固如是。徑行古關塞。形勝那盡紀。荒落久寧靜。富庶或成市。清晨過懷來。沙草風烟美。想當用武時。滿野控弓矢。白塔遠招人。揮鞭渡流水。

李老谷

人言桑乾北。六月少炎熱。我行李老谷。流汗還病渴。疲馬鞭不進。況復礙車轍。翠巖石幽幽。久晴澗泉竭。牛羊放山椒。穹廡補林缺。投宿山店小。子規夜啼血。南歸空有懷。聞之愧剛決。願方上灤陽。玉堂看秋月。更闌不成寐。聲聲山竹裂。期是明年春。相聞在吳越。

赤城

山石似丹堊。赤城因得名。土異產靈瑞。永宜奉天明。市廛集商賈。有驛通上京。觸熱此經過。忽看風雨生。平原走潢潦。河流浩新聲。斯須卽開霽。燦爛雲霞橫。

鰲峯

乾坤氣磅礴。山石鍾奇形。鰲峯纔數尺。濯秀何亭亭。勢欲負厚地。岌若霄漢凌。一峯更旁聳。玲瓏穴虛明。青膚縈白障。微扣宣金聲。中涵太湖潤。瑰偉專上京。想當初鑿時。山鬼泣以驚。置之玉堂前。幾閱瀛洲登。年來對閣老。岷峨眼中青。雨漬生古色。月寒見霜稜。靡望助文思。一揮九制成。諒勿憂豪奪。長茲託佳名。

春日言懷

春寒不見花。陰陰生晝暝。隱几羣書間。神清一甌茗。時光忽已逝。撫卷發深省。夷齊與盜跖。俱得千載永。借問超榮名。何如事幽屏。偶起看歸雲。鳥啼山自靜。

落葉吟

一葉飛秋空。萬物無好容。千葉萬葉脫。遊子淚如傾。涼風朝暮吹。蹤跡無定時。高枝漸稀少。何處庇棲鳥。

湖上燕集

風吹翠篠長。雨過黃梅熟。茲時屬清和。湖上佳草木。水寬納空明。山淨呈新綠。張筵俯龜魚。盡日醉醞醑。劇談幽鳥驚。妙語高僧伏。酒酣學楚狂。起舞歌躑躅。山水趣不同。所得皆自足。困眠掃落花。洗醉汲寒玉。澹然雜紛華。一笑謝羈束。明朝還獨來。白雲滿空谷。

發婺州

扁舟發雙溪。春流浩如瀉。轉岸失孤城。欹枕蘭江下。江雲日千變。花雨一時灑。翩然午夢回。篷低樹老瓦。不暇惜清景。風檣疾於馬。快哉千里心。誰是同懷者。

和桂坡李宅仁甫山園八詠 井小引

僕歸自京師。僵臥空山。人事殆絕。李宅仁甫寄示山園八詠。句清景勝。樂意超然。高蹈之風。益可仰也。輒次嚴韻以謝。殊愧不工。胡助再拜。

草臺春意

靈雨從東來。積潤漬苔石。池塘夢初覺。春草連竹色。臺上書帶長。臺陰土花碧。乾坤總生意。幽人同當識。

竹逕秋聲

一逕入修竹。清風在其間。主人時得句。擊節書琅竿。翩翩清鳳尾。肅肅羣仙環。商聲忽吹散。日暮碧雲寒。

冰壺避暑

清景似冰壺。葛衣風露入。六月不知暑。翠筠森玉立。展席俯長流。歌呼羽觴急。探韻及冥搜。醉墨題偏溼。

雪嶠尋春

昨夜飛天花。南山白巍巍。樵徑迷行跡。壓折澗底梅。乾坤有春意。先向南枝迴。從此露消息。日日穿屐來。

石壇夜月

明月懸中天。萬古秋骨冷。石壇一片雲。桂魄流清炯。良夜寂無聲。露坐不知永。想見謫仙人。金樽長對影。

花嶂夕陽

名花植無數。綽有西蜀風。一笑卻嫣然。崇光泛千重。日永春睡足。斜暉映深叢。絕勝華堂上。夜燒銀燭紅。

翠屏微露

萋芳以爲屏。柔萼敷翠色。微露綴明珠。香風豈自滴。朝來溼錦袍。持杯聚靈液。止渴慰文園。怡神躋壽域。

土銼茶烟

東白採薪茗。最宜櫻笋廚。土銼烹石泉。詩腸沃雲腴。輕烟避孤鶴。花暗修竹疎。依稀魏處士。寫作山居圖。

純白齋類稿卷之三

五言古體

黃樓懷古三首

我懷蘇子瞻。昔年守彭城。河決勢方橫。四面如海平。晝夜具畚鍤。窒罅防墊傾。斯民免爲魚。妥帖無震驚。水退安敢逸。相方益經營。曰土能勝水。築樓以黃名。至今受其賜。燕樂清風生。君看子由賦。千載有餘情。我懷蘇子由。嘗宿逍遙堂。中夜聽風雨。對牀如故鄉。平生友于樂。江海真難忘。臨分出苦語。愛篤情惋傷。長公不忍讀。悽然攬中腸。人豈無兄弟。誰共千載光。當時此盤薄。德星聚煌煌。坐中老文學。里人陳履常。我懷陳履常。向來有斯人。分然修苦節。寧畏丞相嗔。文章提一筆。閉筆黃樓賓。送遠曠官守。不負知己恩。正字未溫飽。忍凍甘死貧。彭城古形勝。英雄昔成羣。勳業亦何有。青史不滿嘖。俯仰三歎息。浩浩黃河奔。

分義田詩

昔我先君子。好義希范公。買田踰千畝。廩族若萬鍾。老幼無凍餒。衣冠樂時雍。聲名鄉黨振。碑碣文辭豐。庶幾合同姓。風俗由茲隆。立規具照列。繼志期無窮。海波忽清淺。世運迥不同。貪汙成一律。教化焉能崇。利私紛擾擾。賦役迫匆匆。遂令吾族子。操觚常瘠容。嗟我生已晚。艱難適相逢。甚欲圖永久。獨立夫誰從。

挾私出千變。屈曲心如蓬。勢孤事愈謬。力弱任匪充。復此遇盲宰。貪酷肆彼凶。質貸不遑給。債負日以穹。譬如河決橫。莫障狂流東。又似將顛木。朽蠹內交攻。後生靡從學。子弟多頑童。勤勞復誰恤。怨謗方忡忡。矧能辨名分。格暴惟卑恭。骨肉若讎旅。愧恥填心胸。藝我萬里足。假蹇棲雲松。安得除戶籍。惠好思其終。探丸議分畝。肥瘦均上中。計丁謝廉遜。悉力歸耕傭。無已出下策。有泚虧前功。受田念厥始。起廢疇爲雄。業散稅仍在。尙覺遺憂濃。吏貲不滿欲。駕說欺盲聾。縣延五紀過。倏爾一朝空。禍福塞翁馬。亡得楚人弓。寧不念爾祖。壞者非吾宗。作詩志慚憤。願獻觀民風。

寄柳道傳十首

柳子吾畏友。夙昔摠遠志。稽古超俗流。潛心養浩氣。翔集得時中。師資致身貴。碌碌嗟不才。釣竿老清渭。太學得名師。光燄騰薊北。晨入誨諸生。諒非謀飽食。聲華映朝紳。文字垂金石。永懷勞夢寐。安得生羽翼。憶昨都門別。斗柄六移春。還家如坐井。俯首混俗塵。溝壑憂不免。無乃甘賤貧。時時登隴畝。悵望玉堂人。雲祲魯柳下。大雅君獨賢。溫粹懷美璞。聖道知有傳。曳裾冠東閣。歲當官九遷。寧念寒郊否。相望隔遙天。殘暑忽已退。秋風入庭樹。有客北首轅。因之寓尺素。廣廈談道餘。霧牕灑新句。幾度雁南來。如何無一字。京師聚時彥。才美君疇雙。文章持憲律。夙昔受我降。毫端挾風雨。快意驅濤江。固宜煥王度。衣錦榮鄉邦。博士職訓詁。歌頌宣王風。周南方願學。老我浙水東。切磋無益友。頑鈍命之窮。用儒臻至治。耕釣萬山中。耿耿抱空懷。蒼顏非昔日。雲泥異升沈。歲月驚飄忽。學省始登進。斯文何炳蔚。要當配韓公。經濟由此出。

舊遊憶京國。故人多要路。金石心不移。推轂寧幾遇。讀書窗戶涼。朱墨研秋露。何期共言笑。復恐逼衰暮。文明近日月。清夢時見君。豈無薦士術。顧我耳不聞。野性在邱壑。糜鹿真同羣。道遠何所寄。不堪持白雲。

送永康縣尹范成父

縣宰登庸式。化行若郵傳。近民在平易。尙德還古先。花溪范令尹。善政居八年。庭空長秋草。野闢搖春烟。黔首自安業。窮山何晏然。鄰封亦欣慕。願借無由緣。能名屬久任。活民早租蠲。代間曾幾見。昔人美難專。吾宗老文學。秉筆不苟賢。侯去方顯達。遺愛青瑤鐫。

題熊仲岳鍊師雲巢

仙人好樓居。故以雲爲巢。雲行無定止。其巢亦飄飄。山中不肯住。天上參翱翔。從龍氣細縹。潤澤青林臯。終然載笙鶴。歸去嘗蟠桃。

孝思堂

純孝心永慕。作堂以思親。萊衣在篋笥。手澤時自陳。哀哉蓼莪篇。一誦一沾巾。纂纂庭前棗。沈沈冰下鱗。長號攀松栢。瞻彼原草春。

喜雨

熱極勢將往。屬茲近秋期。火雲一以洗。風雨來如馳。人心豈不慰。萬物皆熙熙。連朝成霖霽。清坐簷花垂。窺我園中蔬。青青秀如芝。盛衰有常理。貧病何足悲。閉門處窮巷。寧憂天下飢。新涼入牕戶。聊復吟吾詩。

飢嘆

靖節飢來時。扣門或求食。顏公拙生事。乞米形翰墨。古人貴真率。所向無慚色。叔世尙矯僞。孰謂微生直。我今坐旅貧。官寒不煖席。冬去燕之南。春還薊之北。及此米如珠。囊空無可糴。併日營一炊。微俸久未得。詎敢求諸人。愧乏古之德。僮僕生怨尤。忍飢長太息。思昔同僚友。飛騰多赫奕。寧願涸轍鱗。西江水傭激。間有知心者。虛談諒何益。

送復上人歸越

上人越中舊。夙昔參黃梅。諸方證有道。一念踰五臺。幾回到京國。說法金鑾開。邂逅聽談辯。從容笑追陪。雲山曉飛錫。月波夜浮杯。去來本無迹。俗子徒驚猜。物我俱幻化。乾坤聚飛埃。摩尼照濁水。真性何遼哉。卻懷舊所棲。千峯碧崔嵬。歸見韓處士。無言坐莓苔。

賦焚道送蕭存道元帥

漢武開焚道。雲南此初程。遙遙蜀山碧。湛湛瀘水清。緬懷諸葛公。深入揚威靈。嗟彼古戎俗。秉彝均性情。世皇闢土宇。六詔通上京。邇來或梗化。凱獻旋復平。有美述律侯。將業文武并。論功擢元帥。增秩萬里榮。威德夙所著。焚人道邊迎。益務懷遠略。永言垂令名。

嚴氏高遠堂

釣臺嚴先生。濯足桐江流。客星動光采。一竿老羊裘。高節世所仰。以氏名其州。賢者必有後。不在公與侯。

雲初歷千載。隱居擅林丘。築堂志高遠。祖風益以修。登覽物色佳。白雲爲我留。羣岫列蒼蒼。逝波去悠悠。借問雲臺裔。幾家能在不。客來勿笑語。恐驚沙上鷗。

題危太樸雲林隱居圖

窈窕雲林麓。青峯三十六。飛鳥度南澗。流泉出空谷。柴扉守猿鶴。苔徑入花竹。草堂讀書處。中有人如玉。神閒自蕭散。山靜更幽獨。盤薄意不盡。長歌招隱曲。

皆山樓

高居結重屋。四面皆青山。秀色滿虛楹。爽氣浮危闌。讀書靜相對。不厭終日觀。大峯似君子。小巒如侍鬟。羣岫見頭角。起伏猶龍鸞。朝暮呈百態。空霏碧牕寒。夜猿叫寂寂。春鳥鳴關關。連岡紫芝老。幾樹松花殘。撫卷或休息。曲肱聽潺湲。明月來席上。白雲宿簷端。勝處惟自得。世塵那得干。長歌招隱曲。窮年以盤桓。

柏友亭

新樹亭前栢。中含千歲姿。蒼蒼春不榮。落落冬乃奇。吾聞蜀相廟。上有青銅枝。君應得其種。故能植於斯。敬之若畏友。諸葛真吾師。

中秋月下小酌

中秋好明月。萬里天無雲。爭看白玉盤。清光滿乾坤。京華有獨客。對之酒一樽。今月卽古月。今人非古人。百年幾回見。但悲華髮新。我雖不解飲。小酌意自真。舉杯吸風露。肝膽成冰輪。出語驚流俗。一洗萬古塵。

宿定興有感

清晨發保定。風雨何淒淒。亭午到白塔。晴曦曬秋泥。一飯更馬去。擇地穿荒蹊。據鞍時傲兀。坡坂高復低。前宿定興館。解裝日云西。昔過踰一紀。悵然尋舊題。世途諒多險。人事那能齊。老我此行畢。歸與北山棲。

春闈對讀夜坐諸公

南宮試多士。作噩歲在酉。積雪勝冬寒。時維仲春首。京甸供給繁。儀曹文物阜。燈火夜堂深。至公鑑妍醜。朱衣頭暗點。天門榜懸久。主司有歐陽。頗識二蘇不。峩峩雙豸冠。執法揮星斗。簾外多英俊。顧余獨衰朽。斯文安敢興。所思在官守。寧知當此職。再見十年後。風簾官燭短。朗誦不停口。吻燥沃雲腴。眼花卻醇酎。疲倦間少休。連牀對佳友。得賢致平治。化俗歸仁厚。上林春色濃。麟鳳見郊薈。明朝開鎖院。騎馬看花柳。跋實彥卿鹽憲四詠軒

紅藥香風

霞影翻堦砌。紅芳表餘春。向來直蘭省。持贈思美人。綵筆發孤詠。和風散醲熏。宛然調鼎姿。歲晏承華勛。蒼松皓月

怪石博雲

明月出東城。先照蒼松頂。冰雪入懷抱。軒牕散清影。老龍吟瑟瑟。驪珠光炯炯。奈此良夜何。徘徊衣袂冷。巖巖太古色。岌岌神嶽狀。雲鶴觸其膚。勢凌霄漢上。千年軋蘇文。篆籀若可訪。注目敬拜之。實維丈人行。

綠筠擎雪

瓊英溼翠袖。珠璣綴琅玕。飄飄落飛屑。雜佩鳴珊珊。此君有高節。正爾逢歲寒。玉音清入耳。朝朝報平安。
賦青門送李侍御惟中
繡衣謫仙人。再見西入秦。春日長安道。驅車過青門。觀風省民俗。慨然一咨詢。東陵久岑寂。瓜地起寒雲。
故侯尙安在。唯有令名存。

溪橋行客圖

招提屏塵迹。窈窕蒼山根。樛木覆寒澗。小橋通遠村。泉石多古意。幽期誰與論。野老抱琴去。知不造王門。
天師墨竹木石

清心無塵雜。仙意獨已妙。娟娟歲寒姿。兀兀貞靜貌。不負山中期。永諧世外好。靈禽何處來。日有佳音報。
池臺春色

春到人間世。青紅紛可喜。誰知化工妙。乃寓毫素裏。花柳始妍媚。池臺更清美。膝上綠綺琴。洗心彈流水。
堪老園爲汪叔志作

先生江左望。實維龍溪後。壯歲掇高科。大名聞宇宙。從容佐州府。善政在人口。屢空吳郡獄。一麾出堯守。
衣冠化魯儒。文獻徵曲阜。前史允宜修。汗青書大手。平生春秋學。正色班馬右。清白揚祖風。筆削垂不朽。
仕宦三十載。榮華亦何有。歸來負郭居。種樹樊吾園。但令粗有養。寧計生理厚。世事老不堪。園亭堪老叟。

鳩杖一幅巾。隨意看花柳。臨流或舒嘯。孫子導前走。秋風擷晚蕊。春雨翦新韭。宛宛雙溪水。釀之可爲酒。翩翩敬亭雲。招之可爲友。飲酒對雲山。先生壽同久。

純白齋類稿卷之四

五言古體

古意四首

聖世白麟見。明庭丹鳳遊。仁風被草木。春陽煦巖幽。氣應自足致。光輝非所求。如何變哀泣。一息三千秋。

山梁貴翔集。百鳥方啾啾。

伯樂固知馬。子期固知琴。價重留一盼。所貴在賞音。逸足老伏櫪。雅操回人心。驪黃匪求外。寧作爨下沈。

抱才感知遇。一軌同古今。

蒼蒼松與栢。清陰庇夏涼。烟凝兔絲碧。露滋茯苓香。高枝巢老鶴。密葉棲鳳凰。固知抱貞節。不競桃李陽。

大哉棟梁具。歲晚凌風霜。

翩翩山中雲。溜溜澗下泉。無心出幽谷。明鑑澄深淵。一朝炎風來。人世苦憂煎。雲去成甘澤。泉流潤槁田。豈曰事閒適。端能致豐年。

除夕

翩翩江南客。復此遇除夕。九街正紛華。節物饒春色。爆竹聲轟轟。窮鬼驚辟易。千官習元會。金紫光奕奕。

而我獨何爲。寒齋守岑寂。有家去如遺。豈不懷內息。孤燈耿殘夜。危坐拂塵席。萬事窮則通。明朝看新歷。
苦寒

南方有大暑。北方有大寒。南北不同俗。寒暑各所安。揭來寓京邑。服食良獨難。重裘若絺綌。風射肌骨酸。年凶方禁釀。何以解愁顏。陰凝至斯極。陽動需潛還。土室四向塞。地爐雙膝盤。日高怕出戶。貴人那可干。

和繼學送王儀伯參政遼東韻

英英金閨彥。奕奕青雲朋。都門張祖筵。膏車思夙興。遼川渺何許。肅羽秋空澄。眷茲藩屏重。妙選賢俊登。譬彼萬里途。騏驥方躡騰。遐音徹鳴鶴。老氣摩揚鷹。參府退自公。得句清如冰。中和應律呂。正直宜準繩。華國挾高文。學富充才能。西風吹別袖。揮毫念同升。迢迢遠行邁。孤驛暎曙燈。疲氓慰瞻佇。寵光當益承。平生歷臺閣。所至不負丞。威名振荒徼。勳業方川增。愧余未識韓。渴想情可勝。貧賤少歡愉。富貴常持兢。逍遙寧有異。一視鷄與鵬。

題遜圖

粵從揖讓後。禮法日以茲。水或汚牛腹。矧食西山薇。斤斤洙泗間。頗覺此道衰。至德去已遠。滄風邈難追。紛然立名字。外飾爰相欺。一誠謝百僞。溫恭出天資。庶幾爲己學。勗哉以自持。

送康里子淵右丞赴浙省三首

恭惟行中書。江浙實云盛。天子惠東南。遴賢持政柄。公眞廊廟具。立朝色愈正。丞轄固優游。百司嚴法令。

小試作霖手。大慰蘇民病。行行諒勿遲。私爲鄉邦慶。
錢塘古都會。山水清且妍。出膺藩屏寄。光華映貂蟬。西湖了官事。冠蓋傾羣賢。登臨望吳越。酌彼六一泉。
秋風怒潮生。忠烈猶奮然。懸知發雄抱。勳業無窮年。
笛響適南邁。威行江海秋。平生周孔學。偉哉少其儔。方喜瞻依舊。忽茲成別愁。落落門下士。終歲將淹留。
何如理歸櫂。尙及從公遊。復恐非久外。起作商聲謳。

送胡允文楊廉夫趙彥直登第歸趙

秋鷲橫江來。越上得三士。吾宗及楊趙。聯翩鴻雁似。勗志俱妙年。英華振頽靡。淵源春秋學。同究尊王旨。
明年試南宮。勢若鼎足峙。桃花春浪高。禹門同上矣。文驚大宗伯。榮對聖天子。乃知穿楊手。賈勇更奇偉。
天門黃金榜。觀者實填委。四方已傳說。他郡固無是。而我客京師。目擊此盛美。敵廬隣越山。殊重鄉邦喜。
三子時見過。連璧照書几。瓊林燕酣罷。官拜君恩侈。朝紳多贈言。南歸戒行李。袍笏光參差。娛親耀閭里。
一綰會稽章。參軍錄城市。一宰天台縣。弦歌好山水。一佐海上州。寶陀攬瑰詭。國家重設科。羅才資治理。
圖報在忠貞。豈曰榮一己。矧膺民社寄。責效從此始。行行慎勿遲。郊迎喧老稚。郡侯宴高閣。蓬萊翠如洗。
雨中謝王治書作松石見贈
秋雨入毫素。總は無聲詩。牽聃小崢嶸。鬱鬱蒼髯姿。下有伏龜苔。上有巢鶴枝。清風古君子。寫此胸中奇。
咫尺千仞勢。歲晚相娛嬉。愧貽知己贈。永與白雲期。

苦雨呈治書

風雨晝如晦。淒淒撼高林。天街似銀河。盈盈秋水深。人馬良病涉。舟楫固可尋。屋漏牆頽盡。蛙生竈已沈。城東念歸客。獨作飢鳶吟。

東坡遊赤壁圖

赤壁忽在眼。畫史非常流。彷彿武昌岸。山川鬱相繆。英雄擅三國。謾說曹與周。何如東坡老。獨駕一葉舟。良宵天宇淨。乘興同客遊。風清水無波。月出東山頭。空明凌萬頃。白露沐新秋。飄然若遺世。從是登瀛洲。舉杯笑相屬。此樂未易酬。洞簫嫋餘韻。江蛟舞潛幽。風月亦何限。適意惟所求。逝者固如斯。妙理無停留。借問坐中客。頗識此理不。酒醒作新賦。一洗萬古愁。

和黃晉卿北山紀遊八首

靈源

山中念昔遊。曾借禪房宿。靈瀨洗幽耳。孤燈懸佛屋。晨興訪隱者。杖屨沿澗曲。

草堂

上方極清邃。人世有此景。水木圍燕坐。翛然吟骨冷。澗谷雲窈深。何止三萬頃。

三洞

洞府縣珠泉。山木舞蛟翠。遊屐印蒼苔。來往窺神祕。凡骨諒難仙。山中空久遲。

鹿田

雲深山寺幽。樹石盡蒼古。行行穿蒙密。衣滴松上雨。俗駕寧少留。清景忌多取。

寶峯

春陰雨時作。山險多沮洳。魚遊一泓泉。藤絡千年樹。偶此會禪心。坐久不能去。

潛嶽

蕙帳生春寒。幽棲擅雲壑。巖阿有長松。時見晴雪落。懷古心鬱紆。清風散寥漠。

山橋

書堂翳荒榛。石磴攀蘿上。陰崖少行蹤。空谷聞樵響。勿謂古人遠。千載有同賞。

寶石

北山夜來雨。春泉流滿路。招提水石會。憶我曾遊處。老衲不出山。長年臥雲霧。

過馮公嶺

嵯峨馮公嶺。一上數十里。時秋宿雨餘。林壑風日美。屈曲屢登危。平夷少休止。山田如蟻垤。縱橫翠微裏。層岡半天上。絕澗深井底。驛道通甌粵。郵亭雲表峙。斷崖懸丹竇。老樹結青樞。安知無隱淪。白首招不起。過客戀清勝。居人厭遐詭。逐逐利名心。憧憧來未已。

愛松軒

禪宮在空谷。而有高僧居。平生最所愛。長松三四株。一樹更古怪。屹立當前除。蒼髯似膏沐。朝旭霧露餘。滿地布雲影。微風奏笙竽。喚醒丘壑夢。好尙隱者如。陰移石橋畔。流水清可娛。袈裟坐其下。自讀貝葉書。夜久明月出。老龍吐驪珠。尙想陶宏景。與之談元虛。

遠碧樓

峴山入樓碧。衆皴爛成堆。南牕不受暑。長晝薰風來。坐臥有佳趣。心清寡塵埃。飛翔萬翠鳳。欲下吳寧臺。爽氣方掛笏。白雲度崔嵬。結廬傍城市。愧此山林材。日汲龍井泉。烹茶當銜杯。閉門讀書史。他年可徘徊。

題黃晉卿西園雅集圖

汴京文物盛。想見元祐時。迅掃開西園。勝事春遲遲。如何貴公子。雅有書畫癡。休暇足蕭散。羣賢會於斯。曲逕穿深竹。幽花俯清池。澹若忘世念。稍覺山林姿。堂堂眉山公。翰墨何淋漓。詞源倒三峽。旁觀但嗟咨。從容穎賓老。綬帶相追隨。或據案凝望。或曳杖委蛇。松陰羅古器。時復斟酌之。漱井坐晚涼。得句輒以奇。道人方摘阮。淮海音獨知。石屏峭崖立。揮毫者爲誰。豫章學空寂。危參方外師。茶烟落花畔。禪榻髮成絲。徜徉各有適。造物非吾私。諒能燭茲理。浩然無所疑。龍眠精繪事。展卷有餘思。我已後諸公。三歎題此詩。

李成江山風雨圖

李成善山水。神妙詣其極。想當盤礴時。天地俱動色。急揮不停手。工與造化敵。九天風雨來。千峯雲霧黑。老樹吹欲倒。前村已相失。勢若萬馬奔。淋漓元氣溼。草堂茅盡捲。詩老四壁立。但聞溪上聲。那見林間翼。

片帆欲何往。搖蕩正危亟。誰臥百尺樓。奇觀不下席。豈無隱居者。唯憂沒釣石。亦有山寺僧。沾灑出禪寂。無窮貌幽險。千里歸咫尺。吁嗟畫中見。長年愧行役。

史顯甫左丞小車行春圖

遠山秀如黛。朝來雨初晴。平原旣膏沐。桃李亦已榮。春風足行樂。禽鳥方和鳴。有懷杜陵興。里社尋舊盟。殺蔬雜山野。提攜雙玉瓶。整釋廊廟具。幅巾一身輕。小車過花間。隱隱疑有聲。兒童撰杖屨。老父相邀迎。班荆坐林麓。香醪時一傾。勝處卽小留。望遠增雙明。廓然天地大。適見萬物情。

水木清華亭二首

高人種松桂。結屋居其間。蒼苔無轍迹。流水自潺湲。高樹棲青鳥。幽池照白鵬。有時撫絲桐。有時持釣竿。暮看林月上。朝與野雲閑。豈無經世心。白首不出山。微風行水面。初旭散林影。魚潛水益深。鳥弄林逾靜。魚鳥悅清華。山人心悟領。嗟彼高蓋憂。何如事幽屏。採藥春雲煖。歸樵烟逕暝。庭草日日積。柴門無造請。

王公儼少監雲松巢

飄飄謫仙氣。神交契杳冥。厭彼承明直。駕言卜林坰。廬山曉看瀑。洞庭暮揚舲。雲來長松白。雲去長松青。結巢雲松間。服食千歲苓。眼高空四海。澹泊遺世情。月出漱寒瀨。哦詩走山精。

九日會晉鄉同鄉友小飲旣而往飲晉鄉所

佳節莫虛擲。黃花開滿枝。約我鄉中友。薄言飲一卮。亦有西江客。邂逅同襟期。小牕媚秋色。獻酬盤可持。醉來興未已。借馬俱北馳。從容博士席。盤饌羅珍奇。采石風味高。笑談益淋漓。西望搔白髮。青山沒斜暉。出門日云夕。微月光在衣。酩酊復酩酊。相攜徒步歸。

客居冬懷十首

冬日莫嫌短。南牕無限明。兀坐觀古書。愴然遺世情。好句有時得。興來自天成。好官貴盛年。好人貴晚節。六十白頭翁。歸懷胡不切。世道苦迂迴。我心良直截。食攬苦已極。寧覺微甘回。養生宜飲醇。竟日恥空羶。潛蟄需陽動。地爐畫寒灰。大風連日夕。萬樹吹盡禿。前塵似揚波。後塵如轉軸。吁嗟形勢途。正是勞馬足。清晨門未啓。野衲來諷經。須臾童子集。曉曉背書聲。何當返吾廬。逸老靜無營。良友居我隣。或在巷南北。日靜風不起。縱步時相覓。把酒細論文。一笑百憂息。詩豈解窮人。人窮詩自工。今我以身試。苦吟髮如蓬。老來益固守。窮達付天公。日光上牕紙。愛眠常起晏。近午不出門。舂米始朝飯。安閑息妄想。貧苦今已慣。旅困依僮僕。痛痒切吾身。交情少金石。病患疇相親。珍重遠方客。起居慎風塵。我隴真鶴形。固非食肉相。寓京又三冬。未悟平生妄。白髮還故山。笋蕨春可餉。

蒼雪軒

蕭然蒼雪軒。牕外萬竿竹。夏陰禪榻冷。翠霧沾衣綠。清風晝說法。白雲夜同宿。何以充朝飢。呼童饌寒玉。食飽漱石泉。林間自捫腹。

留雲軒

白雲從何來。就此石牀宿。有意棲長松。無心出空谷。挽之不容去。庶用媚幽獨。爽氣潤絲桐。寒光凝竹屋。盡日山中留。成堆封古木。長伴老僧閑。野田春雨足。

純白齋類稿卷之五

古詩

松柏歲寒圖歌

畫師不畫洛花妖艷萬枝紅。卻畫峨眉嶺上一長松。又不畫孤山橫斜千點白。卻畫孔明廟前一古柏。長松古柏成大材。萬牛之力挽不回。懸知勁節飽霜雪。石根尤帶蒼苔苔。直幹亭亭聳蒼翠。雙頂團團狀車蓋。蓋世誇桃李春風顏。不識虬龍後凋態。分明西山兩餓夫。化作松柏千年臞。韋侯老筆絕代無。我得此畫勝得驪龍珠。摩挲病眼看入妙。似聞蕭瑟清風餘。擲之書齋興不孤。歲寒人對歲寒圖。

弔臙脂井闌歌二首

二南本風化。鄭衛多淫辭。聖人刪詩亦見錄。乃知監戒良在茲。江南日夕窮歡宴。玉樹花新月長滿。龍驤飛渡天塹平。屋茅不直秋風卷。門前狎客散如煙。井底嬌娥共攀緣。當時香淚灑闌石。千秋化作臙脂色。幾人摩挲長嘆息。娟娟猶暎土花碧。劉郎曾入桃源中。噴花不似胭脂紅。桃花流水今安在。霜風淒其石可碎。石可碎。無奈何。醜汗青史不可磨。

綺窗美人酣未醒。催汲清泉飛兩綆。水晶簾空秋月明。井梧露滴銀床冷。後庭花謝知幾秋。淚痕尤帶當

年愁天長地久何嗟及。殷紅點點爛不收。夜雨鳴蛩更淒楚。古堞雲荒宮樹死。覆車長使後人哀。胭脂零落歸黃土。剛腸疾惡寧在斯。石應有語無人知。雀臺亦是貯歌舞。古瓦何傷成硯池。

清涼寺

城中車馬塵及腹。城外山林春翳木。二三佳士同我遊。到處登臨訪遺躅。石頭最風踰老虎。古寺清涼滿修竹。六朝形勝幾人爭。忽忽興亡互歌哭。寒潮無復打空城。八百年來變陵谷。南唐避暑翠微亭。荊棘叢生走麋鹿。躋攀絕頂何所見。江北青山來不速。晉宋諸賢安在哉。唯有年年春草綠。富貴何如一杯酒。斷碑零落無人讀。須臾客去僧掩關。颯颯山風動寒玉。

梅花吟

乾坤清氣鍾梅花。品題不盡騷人家。剛道橫枝有南北。風姿香韻無等差。南枝向陽開獨早。北枝向陰尙枯槁。陽和走上北枝來。北枝開勝南枝好。一樹自分南北枝。年來冷暖無人知。珠簾翠幙要調護。畫闌玉笛休輕吹。君不見春深千樹花如雪。南北枝頭孰分別。

續太古雪歌 爲楊友直作

君不見金華山中牧羊子。叱石爲羊石皆起。又不見神山開時石髓流。剛風吹合如琳球。君家古雪亦其匹。晴虹貫牕練光溼。傍人驚嗟見尤物。俗眼那知是仙質。子雲齋中有岷峨。彷彿太白連蓬婆。雪耶石耶竟莫辨。但覺芒寒銀海眩。陵陽老人歌楚章。吳興趙書鸞鳳翔。要與此石相顏頰。人間三絕誰其當。看來

自是洪濛太素光。仇池雪浪安敢鴻雁行。不知閱世幾萬古。蓬萊清淺凋扶桑。拂拭三扣春風香。請君貢之白玉堂。

題范文正公書伯夷頌

翰墨嘗託文章傳。文章益重節義全。使無節義照今古。文章翰墨空嬋娟。特立獨行不顧衆。萬世標準權亦用。吏部雄文破鬼膽。爲渠喚醒西山夢。范公相望餘千齡。人物自與臯夔并。黃素細書伯夷頌。白頭不草太玄經。一字千金價無讓。虹光夜徹星斗上。夷清韓頌高平書。再拜莫作文翰想。奸臣襲藏尤畏仰。面無生色泚流頰。珠還甕復子孫賢。我信斯文天未喪。佳辭善書常有餘。嗚呼節義不可一日無。

周權府墨竹

將軍絳侯之子孫。千年世胄仍雲屯。竭來出戍東陽郡。時平盜弭兼工文。雙溪清氣青冥翅。回首人間如夢寐。耆年在泮非吾志。斯文有續曾未墜。幅巾野服逍遙地。百年種德當平治。明經射策復古制。一郎高攀廣寒桂。異代科名父兄繼。光動邦家昌永世。寵錫賚恩泉壤賁。天之報善以子貴。焄蒿悽愴孝思至。春秋備物大夫祭。遺像儼然後人對。曉山峨峨千古翠。

黃河行

黃河之水貫九州。發源西自崑崙丘。渾渾深大江海勢。浩浩迅駛東南流。厥初疏鑿導末派。想見浮泛窮荒幽。狂瀾滔空或鯨駕。先民幾度爲魚憂。萬古不平呂梁險。老天永畀行旅愁。人生固非金石壽。一清可

待踰千秋。泝沿北上聊濯足。欲照白髮知無由。維舟彭城古岸下。慨然興感登黃樓。千載英雄春夢破。一朝富貴秋雲浮。眼明遺文尙可讀。歛衽前輩清風修。向來河清美金頌。豈知乃徽今日休。冠帶充朝文物盛。桑麻蔽野人煙稠。太平一統古未有。觀光萬里今重遊。快哉風帆日行遠。不將機事驚沙鷗。丈夫出處自有志。安得局束山中留。

塵外亭

結亭幽處車馬寂。流水泠泠山更碧。白雲滿地紫芝老。修木繁陰清暑夕。巖阿桂枝風露濃。澗底梅花冰雪積。山間四時靡不好。世上纖塵那得人。誰將圖本到京邑。中朝名士見之空歎息。

苦熱行

去年六月苦淫雨。日夕蕭蕭不知暑。今年亢旱連六月。烈燄飛埃人病暍。誰道朔方冰雪多。年來無奈炎蒸何。火雲停午驕閃閃。燕馬亦作吳牛喘。安得甘霖萬物蘇。扁舟南歸浮五湖。

青青柏一首壽王治書

青青柏。挺孤直。秀映中華參北極。儀表高臺陰四垂。商聲瑟瑟凝秋碧。香葉交柯鸞鳳巢。蒼烏朝集求其曹。勁氣森嚴醜怪伏。百鳥不敢妄鳴號。清風時來似流水。九霄雨露翠如洗。上有光芒老人星。持書一卷長生經。後千齡。柏青青。

題治書所贈松柏石

高人自昔例能畫。不比俗流空索價。偶然盤礴得新意。落筆豈在宏偃下。拂拭絹素生秋色。爲誰作此好
松石。一株翠柏飽風霜。我益敬之古遺直。獨行犖确山徑中。衣冠似是商山翁。心期綿邈贈歸客。中有歲
寒千古風。

和歐陽丞旨韻題金坡圖

臨江山水冠江右。洞府仙人日清暇。金坡玉笥更逍遙。道德黃庭幾回寫。昔聞修煉多真逸。避秦人隱雲
林下。四時瑤草長是春。百丈飛泉不知夏。尙方真人試寶墨。圖成秀色照山野。是間有路通桃源。流水紅
芳自容冶。臥雪耳孫哀道士。袖拂煙霞絕瀟灑。琳宮別館隔塵世。白石青松最幽雅。勝地胡爲不歸去。征
途誰是長年者。樓居高詠翰林詩。金坡回首懷金馬。

上京獨石歌

出自居庸北口關。千山萬山蒼石巖。龍門瑰詭莫敢拔。他山瑣碎不足觀。此石胡爲名以獨。魁然特起遠
林谷。堅頑未必中韞玉。夜疑伏虎空飛鏃。安得煉之補天漏。徒使千秋擎佛屋。

灤河曲

行人驅車上灤河。灤河水淺人易過。北入太液流恩波。潤澤九州民物和。天子清暑宮義義。兩都日騎如
飛梭。穹廡畜牧草連坡。青鸞白雁秋風多。勸君馬酒朱顏酡。試聽一曲敕勒歌。

再賦李陵臺

李陵臺畔秋雲黃。沙平草軟肥牛羊。常時不是漢家地。全軀孛戮寧思鄉。塞垣西北逾萬里。此去中原良邇止。安得有臺灤水側。好事千古空相傳。可憐歸期典屬國。雪埋幽窖無人識。

秋夜長

秋夜長。月微茫。七月已似十月涼。風傳禁折車馬靜。沙際誰廬燈火光。夢回酒醒衾絮薄。不知此身在灤陽。羣雁飛鳴向南去。問君何時還故鄉。

龍門行

龍門山險馬難越。龍門水深馬難涉。矧當六月雷雨盛。洪流浩蕩漂車轍。我行不敢過其下。引睇雄奇心悸懼。歸途卻喜秋泥乾。颯颯山風吹帽寒。溪流曲折清可鑑。萬丈蒼崖立馬看。

空閨詞

綺窗鎖春朱戶扃。雲和廢久塵冥冥。空有翠被淒餘馨。向來行跡莓苔青。返魂香銷夜寥閨。乘鸞一去無消息。無消息。淚沾臆。楚水吳山愁裏碧。悵然起望壁月斜。曉風吹盡櫻桃花。

三禽言

泥滑滑。泥滑滑。江南路長煙水闊。雲黑山昏雨又來。行人深窘嫌爾聒。休云蜀道費躋攀。只今平地亦行難。

脫袴脫袴。勸我聲聲淚如雨。富人脫故還着新。號寒執恤貧人苦。輸官未了償私逋。舊袴欲脫新袴無。

不如歸去落花滿地。催得春歸不自歸。啼血年年訴何事。蜀山萬木好棲身。何必江南愁殺人。

純白齋類稿卷之六

古詩

九月四夜夢與客賦詩覺而記其首一句甚異之因續成牛馬行

天子養馬農養牛。馬牛異養功同優。金鞍玉勒日千里。雨笠烟蓑春一疇。四夷入貢飽立仗。寸土不荒田有秋。主恩能酬稱爾德。人愧無良忍爾食。曾聞朽骨埋弊帷。亦見道傍微喘息。吾嘗載筆扈宸游。谷量馬牛青海頭。

夜雨思歸別趙敬叔章拱之

我昔郭西初到夕。橫雨狂風滿船溼。高岸泥淖不可登。蓬底僵眠愁悒鬱。明日新晴見故人。握手一笑百憂失。草池春夢久荒涼。康樂遺風猶彷彿。華蓋山頭屢遐覽。容城壇頂時獨立。西麓南塘盡醉遊。良辰好友爲余集。人間美味柑橘黃。江上秋光畫圖出。向來不作三年淹。兩月留連非所及。自嘆瘦削殊清健。胸中頗亦負奇崛。擬和楊公百詠詩。收拾萬象揮吟筆。龍湫雁蕩遠莫到。路幽怕見鬼神泣。中宵風雨從何來。歸心無寐聽蕭瑟。山水增波回棹喜。翰墨紀功能事畢。他年夜雨宿雙溪。卻話鹿城相會日。

雲松巢歌

雲飄飄。松落落。巢居其巔古之樂。右手招李白。左手揖劉伶。二子平生但恨飲不足。今我亦復昏昏醉不醒。乃呼雲而語之曰。爾慎勿爲淫雨害我稊與黍。又撫松而語之曰。爾慎勿爲棟梁徒遭斤斧傷。豪門廣廈千萬間。何曾庇士開權顏。不如釀酒雲松表。酣歌白首棲空山。

遊道場何山追和東坡韻

碧瀾萬頃雲林麓。伏虎道場在空谷。兩山窈窕一山門。勢若奔馬來駐足。野田春水白瀾漫。古松時見蒼虬蟠。吟諷坡詩訪塵迹。客行永見聆風湍。昔人隱居不輕出。雲水漁樵屢爭席。祗今危構須大材。斧斤伐盡千年植。峯巒青擁小姬鬟。霧雨冥濛杳靄間。樓閣新成却灰後。鍾魚撞擊聞他山。晦明變化忘昏旦。白雲橫截青山半。安定古墓屬隣僧。我來再拜徒興嘆。

溪月歌

開元真人冰雪輝。明月照徹餘不溪。溪光月色兩奇絕。白玉盤墮青玻璃。夜夜流光發清炯。孤雲飛去千峯靜。真人嘯詠玉塵頭。結廬正對金鼇頂。蒼虬翠鳳翔其中。上有縹緲之仙宮。瓊林琪樹散清影。此心此境將無同。溪山勝概獨盡得。黍珠長懸太虛碧。

贈韓明善先生

宋之咎夔韓魏公子孫。百世文獻風。建炎南渡雲從龍。清門一派浙水東。先生古貌古心胸。千巖萬壑神秀鍾。平生學術無不通。盛名遠震驚羣聳。東南縉紳知所從。會稽禹穴聲瀲灩。湖陽家法醅而雄。詞源浩

汗江漢宗。追還正始。何其工。鏡湖清波。濯芙蓉。大篇磊落。垂長虹。短章簡嚴。秀孤松。薦道功德。螭蟠穹。天球和鳴。聞笙鏞。胡不進之明光宮。隱居高臥。蓬萊峯。少微耿耿。光燭空。我來牀下。拜德容。大雅豈弟。祛愚蒙。先生豈是商山翁。先生豈與沮溺同。向來閔雨。致年豐。存誠濟物。不言功。清泉白石。佳趣濃。寧甘曳尾泥途中。著書脫稿。非終窮。世網安得羅冥鴻。

壽吳宗師七十

番君之胄。遊方外。錦江壽櫟。環仙佩。帝遣承慶。非常道。玄教大宗師。二代赤松子。手扶持。玉皇香案前。相對一品清。虛衆妙門。萬靈炳耀。天人際。看雲天上。閒閒老笑。閱人間。希有歲。蓬萊真境。一陽生。四海羽流成。大會紫炁丹光。守龍虎。御書新像。照天地。君不見。崆峒廣成。別有長生方。永贊萬年。天子垂衣裳。

孔明草廬圖

黃星脫耀。炎風息。中原板蕩。歸奸賊。三顧幡然。起臥龍。指揮草草。收荆益。王業偏安。天一隅。出師震動。民忘劬。人物自是。伊呂徒。甘服巾幗。遮長驅。偉哉廣漢。春秋筆。千載之下。懸漢日。草廬入畫。想英風。何人不愛諸葛公。

遊西孝友行

征東有士。遷遊西。孝友之行。如白圭。北堂萱草。春霏霏。堂下荆花。晝暉暉。伯兮撫季。心獨苦。教以詩書。勿工賈。季也成人。感伯氏。至今言之。涕如雨。空中鴻雁。原上鴿。嗟我安得。無此情。尺布之謠。古或病。相煎正

爾同根生。藝文先生新作傳。民俗可消風丕變。有弟有弟掾中書。天報孝友興門閭。

高彥敬亂石奔流

白雲微茫橫劍閣。興到時時自盤礴。高侯寫出胸中奇。亂石奔流美林壑。西風老樹三峽秋。雪花濺沫巖之幽。雷轉空山駭猿狖。豪端直與元化侔。倦客思歸結茅舍。丹青一幅千金價。誰知正乏買山錢。安得長年看此畫。

瞻綠堂

我瞻淇澳青琅竽。君子之節耐久看。森森綠玉鎖秋骨。肅肅青蘋生夏寒。濟陽美人心不兢。作堂種竹風騷盛。鸞鳳飛翔松雪書。誰其銘者龔子敬。

還家示親友

去家一千五百日。兩膺朝命躋清秩。我生孤苦抱一誠。遠行不計多逢吉。舍舟遵陸鄉山近。紅葉黃花秋露溼。歸來相見親舊喜。夜牕燈火談京邑。玉堂南土幾人登。蕪陋方慚職纂述。拜罷松楸又趨出。上恩未報安敢逸。

趙敬叔所藏漢天馬蒲萄鏡

武皇求仙仍黷武。不顧赤子顛崖苦。金莖露滴秋風起。天馬西來渥洼水。魑魅百怪無逃容。神工獻技鍊青銅。鑄成明月飛當空。千年精魄淪土中。識者望氣如埋劍。取之持入閩王殿。南國衣冠光閃電。茂陵尤

物人間見，蛟龍盤拏吐雲雨，照君肝膽萬萬古。

秦元之所藏墨梅

我家江南萬山底，屋角梅花雪相似。暗香疏影黃昏月，小園風致極清美。劫來追逐玉堂仙，梅花不見今三年。羅浮翠羽空入夢，窮冬雪片飛娟娟。秦君好詩仍好畫，展卷坐我孤山下。素衣縱使京塵化，標格天然自瀟灑。華光妙與梅寫真，簡齋句法尤驚人。我今解官歸舊隱，長歌玉樹無邊春。

郭熙雪林曉霽

雪壓梅花無處覓，曉起乾坤同一色。漁父蓑寒理釣綸，老樵擔重折山屐。怪來爽氣軒眉宇，有懷往事填胸臆。千年勁節還漢使，半夜奇功縛吳賊。剡溪棹回清興盡，秦嶺雲橫愁思極。梁園授簡賦先成，灞橋策蹇詩獨得。樞衣侍立契宵冥，閉門高臥甘岑寂。想當盤礴心良苦，中藏此意無人識。郭熙能事乞真宰，萬里之勢歸咫尺。要知詩畫本同源，筆端須有千鈞力。

葛稚川移居圖

仙人夫婦清如冰，牛背穩坐兒女并。兩童牽挽陟岡陵，兀然不廢看丹經。小鬟提攜擁前後，藥囊劍佩收神靈。狸奴雞犬盡同載，家具纖悉煩經營。人生飄飄無定止，稚川亦復勞其形。借問移居向何處，白雲流水萬山青。

瑞柳歌

兄弟初散柳彫零。兄弟復合柳亦榮。柳條弄色兄弟喜。青青上有枝連理。和氣致祥臻厥美。田家荆樹依稀似。陰澗秀春風饒。有耳勿聽淮南謠。詩人賦詠感物情。吳氏孝友聞上京。我願家家躬孝友。無惜行人攀瑞柳。

題張鍊師枯木竹石圖

洞府仙居森竹木。山陰之陽剡溪曲。千年老樹不知春。霹靂夜半龍起腹。冷風吹雨入叢篠。道人正把黃庭讀。黃庭讀罷風雨定。石根流水清如玉。平明騎鶴上青天。但見白雲滿空谷。

哀太師

自從天歷干戈起。四海一家如鼎沸。權奸簸弄貪天功。攀龍附鳳皆倒置。海內蒼生望太平。鼎湖仙馭俄上昇。老虎未死人莫測。孰扶日轂遲遲行。大夫當時秉大義。手挈神器親天位。爰立作相隆委寄。太師秦王勢益熾。朝廷大權旣已歸。斥賢用邪圖已私。變亂法度施橫政。賣官鬻獄誰敢非。王侯將相望塵拜。歌功頌德多豐碑。九重深拱方無爲。天下萬事由太師。起居玉食勝天上。生殺貴賤操主威。千兵萬馬常自衛。爪牙武士爭光輝。龍虎大符擅天寵。振古權臣無若斯。天變民災何足恤。神人怨怒宗社危。綱常萬古不可絕。君臣之分不可越。近郊出獵果何謀。飛揚跋扈當車裂。一朝天子奮乾剛。下詔薄責流遠方。太陽杲杲冰山摧。凶徒惡黨潛逃藏。家財簿錄不勝計。石崇元載猶豪芒。德音屢聞天下喜。治道復還舊典章。嗚呼太師權勢如火滅。鼎覆餗兮車覆轍。作詩哀之戒後來。遺臭百世何爲哉。

苦寒行

至元四年冬仲月。朝朝水冰夜飛雪。山川縞素積堅凝。義御杳冥厚地裂。僵臥馬牛縮如蝟。土居寒向人處穴。江南文士官更寒。竈突無烟薪炭絕。髮梳脫落鬚撚折。口吻悲鳴心鬱結。賴有元戎時慰勞。新酒巨觥話吳越。安得凍解回春陽。萬物熙熙生煖熱。

月食遇雨詩

昔在唐元和。中冬月遭食。玉川子盧仝再拜作詩牋。大吐胸臆怪怪奇奇不成句。屈曲聱牙口生棘。昌黎韓公豈効之。意欲潤色刪厥辭。玉川卒與甘露禍。書生章甫何必效此奇。世人好怪厭平正。風雅寥寥失其所。凡遇月食輒吟咏。無不以盧仝爲祖。方今世平治。改紀仍至元。黎庶安康今五年。誠是至元之曾孫。是年己卯歲。六月十五夜。月當食。有常數。星官太史食厚祿。推測盡占步。布告中外滿京城。百司庶府咸設香火具。小兒救月敲銅盆。街市鬧喧喧。仰頭但見滿天雲。不見月魄虧幾分。東南西北有神物。無路施功上青冥。安能用刑法。磔死蝦蟆精。夜深昏黑雨如注。蕩滌炎暑生涼氣。嘗聞日月食。陰翳不爲災。國家有道固如此。妖異衰。市人聞此言。開口笑哈哈。或疑上天公。諱疾忌醫深闕埋。目盲出涕泗。化爲霖雨來。嗟乎天人之際誰能了。一場怪事無分曉。我作詩。殊近理。不効盧仝効韓子。

東坡載酒堂

儋州秃髯東坡翁。平生自是人中龍。才高見忌時不容。暮年再駕鯨波風。南荒萬里懸孤忠。堂堂氣節世

所宗。中原消息誰其通。夢魂猶遠蓬萊宮。雷州別駕老更窮。瘴海相望雲重重。桃榔林麓荔子紅。真一仙
釀香浮濃。黎生父老欣奇逢。載酒登堂時一中。先生微醉春融融。人傳海外文益工。似聞張蔡方登庸。萬
事變滅如飛鴻。玉局歸老吾誰從。百年廢址深蒿蓬。彭侯佐州化時雍。作堂肖像追古蹤。春秋祀事報德
豐。樂府新歌被蠻童。從此華夷風俗同。儻人世世祠蘇公。

七十吟

我生愚拙少孤苦。疾病仍多煩保乳。年壯志立超俗氓。獨好詩書力稽古。采芹泮水事遠遊。遂令二子持
門戶。史館編摩凡幾載。歸老勉恩霑父母。豈知舊宅化桑麻。高臥空山無伴侶。人生七十世稀有。今我已
閱此寒暑。爲仁不富鄉黨忽。清節康強天所與。但得娛老堂三間。孫子綵衣羣戲舞。純白道人七十吟。再
作東湖風月主。

贈寫真汪鏡湖

鏡湖流水涵秋清。照見萬物無逃形。懸知悟取金粟法。况乃家傳獨擅名。虎頭燕頰靡不似。紫髯鐵面何
其英。善貌高僧說法相。巧模處士哦詩情。我本山林麋鹿姿。少壯偶爲世網嬰。顧今歸田事閑暇。邂逅逢
君眼輒青。欣然點綴寫衰朽。病骨昂藏太瘦生。朱衣象簡差少貴。雪鬢霜鬚老可憎。旁觀側目良眈眈。婦
女失笑兒童驚。往年芝田挾此藝。黃金堆屋官蓬瀛。君胡不往遊上京。上京比屋皆公卿。

春草曲

春風如水流。春草生芳洲。遊子有遠志。孝子無別愁。吁嗟孝子芝蘭美。不出庭闈奉甘旨。可憐遊子飛蓬似。春愁草綠千萬里。兒衣母線春風吹。春暉滿堂草菲菲。遊子歸來慈母喜。階前鬪草看兒戲。

孝養歌示大兒

夫養父。婦養母。夫婦孝養今稀有。園池花竹娛老境。甘旨杯觴開笑口。夫夫婦婦一家範。子子孫孫百世守。木有根兮水有源。水流無盡木陰繁。白鹿峯頭飛白雲。隱居讀書思古人。

遊赤松

赤松樹下流丹泉。白石巖巖如羊眠。萬古山川獨神秀。二黃兄弟皆成仙。我來又值玄冬候。澗寒水落梅花瘦。野人應笑白頭新。羽士相逢青眼舊。焚香閉閣飯胡麻。留宿雲牕夜煮茶。約我春風二三月。小桃源裏看紅霞。

上都回

去時兩馬行遲遲。回時四騎如風馳。良友勗我虞險阻。不知漸老筋力衰。赤松風度鑿坡客。襄陽浩然愛哦詩。回仙笑談時絕倒。路人逢我呼太醫。秋光晴日殊可喜。向所未見今得窺。一朝風雨天莫測。泥塗爛熳衣淋漓。黃昏下馬投土室。薰然煖榻舒四肢。五更睡熟又催起。此身安樂知何時。居庸山水新霽色。左右清景軒鬚眉。健德門前一杯酒。崎嶇已復還京師。長歌紀述上都回。聚散行心非人爲。

孫澹如墨梅

寫梅老手稱花光。誰其並者楊與湯。孫郎晚出亞三子。筆端造化分毫芒。澄心古紙生秀色。枝柯瘦硬骨老蒼。疎花冷蘂隨手出。直恐勾引蜂蝶狂。眼明見此橫斜影。鼻觀已作春風香。何妨尙玄不尙白。妙意有在終難忘。小牕棐几風日靜。坐令孤山歸草堂。是真是畫莫生別。爲歌一曲傾一觴。



3
4
2089

純白齋類稿附錄

二





成集書叢

編初

者編主
五雲王

行發館書印務商



稿類齋白純

錄附

(二)



3 0645 1873 5

撰助胡

純白齋類稿卷之七

律詩

春遊三首

門掩青山靜。鶯啼白日長。滿壺攜轔蟻。在處賞春芳。樹煖行新影。花多散異香。余心有真樂。豈學少年狂。
空谷窮幽討。深春少定期。澗花和露折。寺石帶雲書。山煖獨開闢。水清時見魚。吟成歸較晚。長嘯月明初。
古洞春香遠。尋芳步不停。崇桃熏眼醉。急瀑洗心醒。鶴睡石雲煖。馬嘶沙草青。誰家修竹好。幽戶隔花扃。

秋夜旅懷

棲棲何所慕。林暝鳥飛還。秋意水邊樹。鄉心雲外山。月寒知暑退。夜靜覺人閑。索索葉成語。西風滿竹關。

病中述懷

藥裏經營久。吟懷尙愀然。園池荒病日。草木厄饑年。梅逕落香雪。柳堤生煖烟。西湖春事好。那得理征船。

雨中臥病二首

雨脚何曾斷。簷花滴到明。水流床下出。雲自屋頭生。野港渾迷岸。村船直入城。民方病艱食。撫字可無情。
簷滴穿愁耳。蕭齋獨臥時。貧方奇善賈。病始憶良醫。市遠囊無藥。人癯髮有絲。平生丈夫志。猿鶴豈能知。

再用韻答季仁伯二首

襄雲山木暗。然雨石榴明。沙鷺吹魚落。舟人看水生。烹茶驚困魅。呼酒破愁城。泥滑無來屐。脩然絕世情。
風雨無虛日。黃梅熟盡時。塵纓泉可濯。俗病竹難醫。蝸壁行蚪斗。蛛簷設網絲。小窗吟苦處。唯有故人知。

李息齋墨竹

今代湖州筆。渾無半點塵。霜竿餘老瘦。雨葉極清新。變化孫吳法。風流晉宋人。可能醫俗骨。莊氏此凝神。

送師古姪孫之杭

三酌陽關酒。臨分思黯然。寒燈欹客枕。瘦馬聳吟肩。木落江風外。潮生海月邊。孤山梅鶴在。爲我醉逋仙。

和許振古溪上晚晴

春寒花事晚。何處暢幽情。石雨苔紋積。沙風鳥篆平。山明雲有影。溪漫水無聲。夕照烟光紫。歸牛一笛橫。

和古學兄秋日山行

扶竹歷寒墟。幽尋靜者居。秋深山漸瘦。病減友仍疎。世網夢中鹿。天游濠上魚。黃花忽到眼。彭澤興何如。

對梅

坐牕觀復妙。搖落見孤芳。數點雪爭白。一枝春破荒。冰池沉瘦影。月屋老清香。與爾同枯槁。凝然到坐忘。

挽凌吉叟教授

惜甚雲霄志。傷哉露電身。青衫沾一命。黃壤闕千春。俸爲收書盡。家緣好客貧。茂才充貢者。寧復似斯人。

挽方存雅先生二首

平生山水屐。眉壽益詩昌。古意回風雅。清言越晉唐。仙華秋月冷。江浦夕雲荒。博士當銘筆。門人著耿光。
黍熟南朝夢。劬書但苦吟。一編風雨集。千載友朋心。猿鶴驚長往。湖山憶共臨。鄉閭遺老盡。清淚滿衣襟。
宿元符宮呈王牧齋宗師

草木皆仙氣。丹房閉寂寥。山高星斗近。洞閩水雲遙。夜醮鳴金磬。秋吟和玉簫。明朝騎鶴出。別館謁王喬。
冷泉亭得炎字

靜定燭豪纖。山僧看不厭。一泓澄碧冷。千古滌朱炎。流出仙源遠。飛來佛國兼。香塵那有污。潤物本無嫌。
次韻聞鵲

啼到天津上。繁華一夢空。東西猶異產。南北豈同風。月冷依秦樹。雲晴遶漢宮。錦城歸去好。誰解駐春紅。
次韻先仲山過錢塘

禾黍遺千載。東南第一邦。望雲生海嶠。帶雨絕濤江。忘世浮鷗聚。留人語燕雙。君詩鍾萬石。寸筵曷能撞。
和道心姪山居

高榭何能構。空臺漫自基。水邊梅白處。霜後橘黃時。掃葉穿林遠。看雲坐石遲。清吟興微醉。此道卽軒羲。
挽王雪溪二首

臥疴纔半日。遽作玉樓仙。野服成親賻。松棺製學錢。謀生真泫露。取友獨忘年。遺稿如山積。兒孫豈解傳。

擾擾百年內。翩翩一夢中。有形均是幻。無色不歸空。老懶添詩債。逍遙策酒功。斯人今已矣。誰復與吾同。

長至

雲物有佳色。梅花何處香。乾坤回始泰。律呂動初陽。歸夢憐宵永。清愁又日長。遠遊成底事。兩鬢欲蒼蒼。

春日言歸

春色明宮柳。京華獨縵袍。雲霄崇世祿。臺閣聚時髦。有道貧方樂。無官歸亦高。光風滿天地。隨處可遊遨。

哀李清臣侍御

慷慨由中定。顛危見處真。全生多失守。一死獨成仁。正氣扶皇極。忠風動紫宸。易名褒典在。千古勸爲臣。

寒食

花柳平原盛。提攜滿路傍。時思當火令。野祭哭春陽。裂紙標青塚。傾壺酌白楊。油然追遠意。吾亦憶吾鄉。

過青州呈丁幼度御史二首

南下逢初暑。兼行帶曉星。雨雲垂野黑。水樹入船青。愁絕吟難就。涼生夢易醒。暫回風半度。醜酒乞江靈。

李海務和御史韻

魚貫帆檣集。郎君氣勢雄。河源晴易泄。水脉暮皆通。復此留終日。何煩得便風。所思歸越上。高臥白雲中。

挽胡石塘先生二首

久矣錢塘客。儒林志獨勤。力行修古道。邃學琢雄文。絃誦三年佐。聲名兩浙聞。凜然生氣在。尙想唾青雲。

吾宗文學老。義氣晚彌剛。寄迹青蓮宇。無心白玉堂。飲瓢甘菽水。易簪正冠裳。一葦靈輻遠。西江恨渺茫。

東昌道上

長河春欲暮。高柳綠成陰。野迥雞聲遠。沙虛馬迹深。雨來雲潑墨。月出水浮金。此景憑誰繪。停橈付短吟。

過淮安

喜過淮安郡。風帆掛落暉。席偏坐不穩。岸轉去如飛。宿麥連雲秀。春花入夏稀。渡江知有日。浙水竟東歸。

姑蘇書所見

闔閭城最古。臺榭俯長川。水國船如屋。人家屋似船。扳罨黃鳥外。倚棹白鷗前。日暮吳歌發。滄浪濯足眠。

挽劉師魯二首

學古成清隱。義冠似舊時。中興名將裔。盛世老儒師。騷雅詩千首。風流酒一卮。平生求益友。後死愧相知。
名滿江湖上。身居陋巷中。典刑存冠帶。冰雪貯心胸。高論驚流俗。雄文復古風。武林遺老盡。清淚滴秋空。

道館夜雨

道院吳山下。梅花歲事闌。人皆忙裏過。我獨靜中看。丹竈松雲暖。青燈竹雨寒。胎禽鳴夜半。有客夢長安。

挽揭曼碩學士二首

白首陪經幄。丹心侍玉除。兩楹俄夢奠。三史未成書。誠一宗君實。浮誇厭子虛。東南遺老盡。吾道竟何如。
清苦平生節。聲名夙有聞。朝廷方用老。翰苑久摛文。眷遇身難退。裁成志獨勤。坐隅驚鷲入。萬里哭秋雲。

春風軒爲蔡士安作二首

氣象唐虞在。微和拂面吹。杏壇聞講日。沂水詠歸時。窗靜草光合。簾虛花影移。乾坤生物意。能有幾人知。
近午看花柳。春風入草廬。坼他方長物。吹我讀殘書。富貴三生夢。中和一月居。微吟飲醇酒。半醉與何如。

遂心堂婺源汪氏

堂構佳山水。優游日醉吟。隱居增別業。逸老遂初心。亭館爲花盛。園池竹樹深。平生樂志論。何必羨朝簪。

寓樂樓

花木繞重屋。雲烟含令姿。鳥飛瞻廣宇。魚泳俯深池。秋月清吟夜。春風微醉時。此中千古意。寧許俗人知。

春日卽事

京華寒食近。客思轉淒迷。春巷一宵雨。天街三尺泥。宮花紅影溼。野草綠痕齊。寂寞抄書坐。扃門到日西。

和王治書題道士幽居韻

幽居塵事遠。燕坐古松邊。劍氣衝丹室。琴聲落澗泉。春雲生白石。秋露洗青天。獨得山中樂。長年此學仙。

營中述懷

開國先鋒騎。屯耕古戰場。老儒甘寂寞。此地極淒涼。曉露凝沙白。秋雲覆草黃。更無人問字。終日面頰牆。
野甸寒威極。燒茅擁敗緡。懶能梳白髮。愁祇對青燈。雪夜一輪月。霜天萬木冰。越南歸路杳。清興不堪乘。

挽袁伯長學士二首

鯨吸朱提餼。龍吟綠綺琴。著書稽古學。掌制擅詞林。氣宇青天杳。淵源碧海深。斯人寧復見。淒斷越山陰。孤舟歸鏡水。無復夢金鑾。古器雲雷富。高懷星斗寒。東南喪文獻。朝野哭衣冠。十載坐中客。驚呼涕淚酸。

送崔遜齋兵部奉祠還高麗

恩重君親報。唯知孝與忠。溫恭寧事外。出處貴時中。萬國衣冠會。三韓禮樂同。鴨江春水綠。朝日正生東。

和王繼學廉使樓上獨坐二首

千障烟雲溼。雙溪草樹長。平生耽水石。是處卜林塘。日靜清冰暑。春深白玉堂。當年門下客。復此獲徜徉。退食看山坐。凭闌覓句時。晴天鴻去遠。春雨燕歸遲。山藥和雲煮。江花帶石移。所欣公病減。物物詠新詩。

送方縣尹

百里子男國。松陽近古瀆。飛鳧花縣曉。佩犢野田春。家富招名士。官清恤小民。京華塵夢遠。棠樹綠芳新。

挽宋正獻公誠甫二首

至治龍頭選。端爲天下奇。東曹持正議。西掖擅雄詞。吾道誠無間。同年匪獨私。新遷封馬鬣。揮淚讀銘碑。苦學修清節。逢時道亦行。朝端儀典禮。海內仰聲名。宗伯方推轂。成均遽奠楹。易名虞祭畢。稽古極哀榮。

松巢

太古遺民在。巢居適所安。白雲封戶牖。青露滴衣冠。鶴夢三更寂。龍吟六月寒。幽棲無外慕。肯作大夫官。

端午謾題

老罷離騷讀。青銅雪鬢雙。久貧交易絕。多病酒難降。節物薰風館。歸心夜雨牕。當時蕭艾盛。吾欲駕濤江。

挽許益之二首

講道宗濂洛。窮居樂孔顏。平生黃卷上。多病白雲間。嗣派歸東浙。傳衣自北山。丘園終不起。天爵貴疇班。易簣驚鄉黨。東南喪碩師。化人唯篤敬。稽古獨精思。雲谷生徒散。河汾弟子悲。遺書應有託。千載耿光垂。

題清白泉亭

一酌泉清白。三年政善良。鑑明全體靜。物潤活流長。吳令今無忝。梅公古有光。作亭貯風烈。歌詠比甘棠。

除衛教

屯田營細柳。易水覓漁竿。白髮新文學。青衫舊史官。饑方謀飯足。老未脫氈寒。人道軍中樂。弦歌處處安。

挽馬伯庸中丞二首

稽古陳三策。窮源貫六經。文章宗館閣。禮樂著朝廷。執法頭先白。掄才眼更青。堂堂寧復見。老淚滴秋冥。魁然成傑出。霄漢久翱翔。獨秉代言筆。頻修薦士章。苦心詩草在。雅志石田荒。夢冷淮南月。令人益慘傷。

聚星圖

矯矯陳荀氏。龍鸞子弟佳。軒居閑有適。尊俎靜無譁。天意分三國。星輝聚兩家。流傳好圖本。彷彿古烟霞。

中秋寓僧舍

西風吹客袂。堪笑此盤桓。萬古月長好。中秋人共看。明生虛室白。清入定僧寒。來歲知何處。禪房憶倚闌。

竹雨山房

古宅千竿竹。蕭蕭雨滿林。寒聲驚睡鶴。亂點滴歸禽。人語燈牕暗。泉流墨沼深。兒童游釣處。白首重追尋。

和治書題九成宮圖韻

九成清暑殿。華靡卽隋家。遺曲轉春鳥。殘碑塗暮鴉。天池涵日月。宮樹鎖雲霞。千古看圖畫。浮生豈有涯。

和治書題驪山宮圖韻

致理開元後。繁華孰與京。山頭曾駐輦。谷口未聞鶯。浴殿泉流煖。霓裳國勢傾。西歸重幸日。揮淚獨淒清。

笑閑亭

結亭山水曲。此樂幾人知。一笑忘機久。長閑覺老遲。虎溪相送處。栗里獨吟時。會得其中意。春風滿酒卮。

智者寺二老亭

當年方外友。長此共登臨。二老遺風在。雙親古意深。澹忘經世念。靜見住山心。一段川雲樂。宗門有嗣音。

藏六處士

太極本無極。化生陰與陽。一從何處起。六向此中藏。白日龜齡永。青天鶴髮長。人心元有易。領會卽羲皇。

潭心齋

純玉寒潭碧。心源向此逢。千秋涵日月。一鏡照蛟龍。靜極天同體。澄虛物自容。邈哉川上老。未泐永朝宗。

送曾止善孔廟司樂

奉檄趨東魯。嚴恭事聖人。虛堂金石奏。新廟豆籩陳。雲氣泰山曉。杏花沂水春。優哉游藝圃。復此泝通津。

黃晉卿同遊靈隱天竺

靈鷲飛來古。清遊興頗濃。泉音穿積石。雲影翳長松。好友常難約。高僧豈易逢。更尋天竺去。山水翠重重。

大駕還內

清暑還宮闕。靈源秋氣分。袞龍飛白日。天馬駕紅雲。麾仗儀爭視。簫韶奏總聞。都人增喜色。萬壽祝吾君。

木尙書耆壽市居

黃髮尙書老。塵居雜笑言。市朝忘隱顯。鐘鼓自晨昏。聽履多賓客。縣車盛子孫。西山時引睡。北海日盈尊。

和仲實韻

兩崖夾修澗。亂石列千峯。形勝可強國。笑談能折衝。貴人常此過。隱士不曾逢。六月忽風雨。淒涼如早冬。

雲州

暑雨不時作。山流處處狂。牧羊沙草軟。秣馬地椒香。夜宿營氈帳。晨炊頓土房。雲州今又過。明日到滌陽。

李陵臺

西照荒臺遠。猶慚太史公。君恩如水覆。臣罪與天通。汗簡家聲墜。降幡士氣空。河梁他日別。淒斷牧羊風。

過青州呈丁幼度御史

一葦江湖上。誰占執法星。柔桑採還綠。短髮薙纔青。月照歸心折。風吹醉面醒。清時盡忠孝。不愧北山靈。

純白齋類稿卷之八

七言律詩

元會口號

大明元會肅朝儀。萬舞充庭翠袖低。千羽龍鸞翔下上。衣冠鶴鷺列東西。星環黼座韶音振。日輔瑤階仗影齊。咫尺天顏知有喜。九重春色煥文奎。

天壽節和韻

曉開閭闔九重霄。仙仗繽紛擁旒旄。萬歲齊呼中嶽近。衆星環拱北辰高。日臨析木儀丹鳳。雲遶蓬萊醉碧桃。白髮詞臣同率舞。彤墀班末是青袍。

上巳從康里子淵拜魯國文貞公墓

宰木森森馬鬣封。肅然生敬若從公。漢廷儀表羣賢右。魯國衣冠百世崇。想見英靈環北極。永思時序奠東風。我來陪拜增瞻仰。厚德清芳繼不窮。

王氏德符堂

高堂華扁記雄辭。善慶成功有所思。俛仰先人樹種處。徘徊使節過家時。綿綿瓜蔓深根蒂。鬱鬱槐陰茂

本枝更喜校書天祿閣。青箱遠業付佳兒。

送余德撫南歸燎黃

聖恩深重勸臣休。喜泮春冰解去舟。隧碣製登三品貴。璽書光燭九原幽。外臺舊肅觀風使。宗伯追榮列郡侯。此日更知公有子。燎黃纔了上瀛洲。

和馬伯庸同知貢舉試院記事

宗工羣彥列如牆。半是先朝白髮郎。柱史獨還評月旦。諫書頻上惹天香。鸞儀夜靜奎明室。雁塔春深笏聚牀。得士無慚龍虎榜。盛時一變古文章。南宮樹棘闕蕭牆。周衛仍煩執戟郎。初聚五星紅燭影。纔分一夕繡衣香。峩冠儼侍趨宸極。射策詳看近御牀。盛事流傳文治洽。銀臺通進少封章。

杜清碧思學齋

先生高尚芰荷衣。結屋藏書入武夷。泉石洗心無別事。皇王經世有遺思。據梧朗詠秋清夜。隱几冥觀晝永時。求志獨修天爵貴。故應荷蕢接輿知。

送王治書分臺上都二首

翠華巡幸度桑乾。萬騎如雲衛後先。北嶺高寒天氣別。南屏蕭爽地形偏。薰風帳殿青冥上。微雪氍毹車白海邊。獻可從容惟覓句。繡衣元是玉堂仙。

臺端咫尺近天威。霄漢星懸執法輝。夜靜周廬傳禁柝。暑清甲帳進宮衣。龍門曉日乘驄過。澗水秋風看雁飛。想見從官多賦詠。時巡無逸諫書稀。

開府大宗師張公遊仙詞五首

羽服初歸虎豹關。貞姿秀骨動天顏。式昭聖眷風雲會。早著神功日月山。歷事五朝聞國論。載升一品冠仙班。詞臣像贊承恩詔。玄教宗風滿世間。寶冠文物偉龍光。鵝尾爐薰衆妙香。道贊有元宗教始。功扶詞漢正源長。至誠齋肅通宸極。重賜便蕃出尚方。濁世糝糠俱掃盡。翩然翳鳳白雲鄉。始終異數獨能全。玉印親承黼展前。一代宗師百代祖。三分宰相七分仙。玄功有赫惟誠爾。大道無爲本自然。弟子得人光入室。顯揚嗣教永流傳。開府榮名久具瞻。化爰清靜慰黎黔。持身約素損中損。照世焜煌謙外謙。芝圃春恬延瑞集。桂宮風肅致祠嚴。山中龍虎神仙宅。虹貫丹房冷玉蟾。慈祀忠勤歲扈從。聖神誕育重遭逢。一編輔治傳黃石。千載眞游繼赤松。但見仙人身化鶴。寧知老子道猶龍。江東會葬衣冠處。五鳳樓深草木濃。

和治書寄吳真人韻

江西方士候鄱君。迎笑天香滿袖雲。石室異書松下讀。竹齋清磬月中聞。青牛駕出飄仙氣。白鶴歸來語

夜分。溥海蒼生均錫福。鳶魚飛泳總欣欣。

送王繼學江東廉使

宣城草木起清風。謝眺青山在眼中。赤壁仙人來海上。繡衣使者過江東。盤鵬勁氣凌蒼栢。鳴鳳祥輝映碧桐。一道澄江如練靜。還朝仍作黑頭公。

蘇伯修滋溪書堂

曾過灤城有所思。溪光野色靜朝暉。三楹老屋藏緗帙。四世儒冠到繡衣。君子流風開遠業。史官直筆著清輝。試看燕趙多豪貴。金壁如山轉眼非。

送徐中孚祠武當歸桃源

白日飛光急景催。秦人避世古巖隈。霓旌絳節穿雲去。春水桃花出洞來。朝罷玉晨吹鳳管。讀殘黃老坐莓苔。長松樹下逢真逸。笑說求仙海上回。

次韻治書題九成宮圖

冠山臺殿壓雲平。貞觀初隆四海清。晝靜侍臣窺染翰。暑微宮女學吹笙。醴泉新爲翠華出。御榻長依紫氣橫。可是丹青誇妙絕。至今殘刻價連城。

次韻治書題驪山宮圖

晚妝慵困內人催。幾度華清賜浴來。萬室笙歌連谷響。千門錦繡倚天開。傷心蜀道傳鈴曲。回首漁陽送

穢埃莫說向來亡國恨。水光山色冷如灰。

送周本心修撰祠南嶽

紫烟縹緲御爐馨。萬里光華候使星。榕暗修途雙隻屐。花飛古驛短長亭。海灣日湧鯨波赤。衡嶽雲開石廩青。奇觀盡收還玉署。天顏有喜問生靈。

送史正翁嘉興經歷

萬里扁舟幾賦騷。蓬山不戀故人袍。賓筵但得尊鱸美。幙府寧知案牘勞。澤國春波鴻去遠。華亭秋露鶴飛高。都門送別花如雪。使我歸心折大刀。

送王安道處州知事

馬行馮嶺鬱嵯峨。草舍民淳奈樂何。孔廟韓碑天下少。黃祠李篆洞中多。郡齋晝靜依蒼栝。幕府風清泛碧荷。地近雁山堪吏隱。謝公屐齒在烟蘿。

送鄭彥禮同知

聲華先已播南雍。暫輒朝班赴治功。掌制昔居詞苑右。分符今與使君同。馬行石磴秋雲上。人在榕陰古木中。廉政歡謠民俗阜。絲絢還侍大明宮。

送唐梅宇真人歸江陵

真館承恩久服勞。翩然歸賦遠遊騷。九天星斗蒼龍佩。萬里烟霞紫鳳簫。苦竹泉傍祠老子。梅花宇下列

仙曹。明年我亦江湖去。何處相逢酒一瓢。

萬安寺觀習儀

衛士金吾塞梵宮。旌麾妍麗映寒空。做陳元會千官肅。恭習朝儀萬國同。禮樂雍容全盛日。衣冠文雅太平風。小儒拭目還心醉。歸對書燈守歲窮。

聽琴

勇士軒昂馬赴坡。絲桐古意妙如何。高山流水知音少。飛絮浮雲變態多。三疊秋風巫峽雨。數聲落木洞庭波。請君試鼓陽春曲。坐使乾坤萬物和。

王氏自得山居用陳衆仲韻

高人情性愛吟詩。卜築山間樂四時。明月清風真自得。白雲流水是深知。鳥鳴春意巖中樹。魚泳天光石上池。空羨隱居無限好。素衣化盡負幽期。

春闈對讀同趙子期黃子肅夜坐

卷束如山塞坐隅。通宵無寐亦良劬。雄文往往驚投壁。清誦琅琅美貫珠。花眩眼明親蠟炬。聲乾舌本沃雲腴。朝來喜色逢春雨。襍被連牀二妙俱。

和虞學士讀廷對策玉堂有賦

直廬讀卷有元臣。善沐恩波物候新。楊柳微風奎閣曉。杏花初日玉堂春。檢書慶衍雍公澤。發策文明孟

氏醇。焜耀天門龍虎榜。周家百世育深仁。

奉祠三朝御容

三祖皇靈儼若存。孝思時薦像臨軒。山河降準天威近。日月重瞳玉色溫。赫赫聖神開朔甸。明明英武拓中原。貽謀功德咸歌頌。獨有微臣愧討論。

題蘇郎中墓碑

蘇公敬獄慶源長。偉績流傳在發揚。幕府平反疏枉滯。塞垣委積化饑荒。蕭曹事業今無及。班馬文章古有光。教子義方書滿屋。鯉庭史筆最稱良。

南城試院和王子肅韻二首

閱卷匆匆永夜過。風簾官燭淚流波。冥心學術蟠千古。快意詞源導九河。仙伯金華司桂籍。文儒玉潤聚鑾坡。春闈卻是龍飛榜。依舊燕臺得士多。
風簷光景莫虛過。變化鯤鵬北海波。但覺銜枚如赴敵。敢談辯口似懸河。點頭卷好逢宗匠。執法星明近諫坡。簾外官閑深院鎖。詩筒來往不嫌多。

試院和主文魯子翬僉院韻二首

興賢求治萬方懷。干羽敷文舞兩階。宗伯率先司主試。史官例得預堂差。天香縹緲來深院。燭影朦朧坐小齋。卻憶少年勤夜讀。山牕月下落松欒。

京尹興賢蘊素懷。盛張騶從入賓階。但聞計吏趨科選。無復行人說點差。霜氣稜稜御史府。禮容穆穆太常齋。臨池筆法知何用。書榜縱橫折股斂。

試院和程厚甫韻

白袍吹送上青雲。幸會龍飛萬象新。君子揚庭鳴彩鳳。聖人在位見祥麟。諸公舊夢攀仙桂。獨我清時起釣綸。遺逸更求科舉外。故應林下不逢人。

上京記行再賦居庸關

澗谷纔容兩軌行。全燕阨塞自天成。折衝險道四十里。制勝中原百萬兵。過者但知今北口。居人不識古長城。清泉白石幽深處。暑氣絕無寒氣生。

龍門

龍門兩岸倚霄漢。禹鑿神功壯九圍。日月東西自吞吐。乾坤南北總樞機。片雲作雨千峯暝。頃刻流泉百道飛。老病詞臣逢偉觀。吟鞭緩策不須揮。

灤陽七夕分韻青字

家家綺席設中庭。兒女諠譁擁碧軒。天上樓臺當七夕。河邊機杼會雙星。橋橫鵲背秋疑恨。窠結蛛絲夜乞靈。曉別西風洗車雨。龍沙漠漠遠山青。

灤陽述懷

翰苑何曾紀聖謨。灤陽萬里一身孤。秋風起處黃榆落。夜雨盡時青草枯。雪壓黑山屯戍帳。雲飛白海獵圍圖。屬車來往常親見。神武開基自古無。

再用韻答虞學士

稽古雄文自典謨。先生忠義立朝孤。秋生灤水情偏逸。爽入鼇峯思不枯。經世大書光制作。奎章諸老盛儀圖。岷峨山色青長好。一任浮雲自有無。

三用韻答吳宗師見和

宣室從容昔進謨。玉烟劍氣鶴飛孤。千年骨換丹砂熟。幾局殘棋白石枯。天上仙人承露掌。山中老子看雲圖。碧牕隱几清秋日。萬籟蕭蕭聽到無。

四用韻贊虞公爲宗師書看雲記

八分古隸軼君謨。思入風雲態不孤。墨潤長驚雙鳳翥。筆乾時見一槎枯。諸儒灤水清秋會。老子函關紫氣圖。自昔通家成故事。覈玄講易世間無。

龍虎臺

縹緲神京五彩邊。丕基開拓肇全燕。地形龍虎臺千尺。國勢山河卜萬年。畿甸周遭明日月。居庸險阨古風烟。都人長此迎青蹕。湛露光中白雁前。

題鄭義門井序

鄭氏義門。旌表久矣。邇者余僉憲行部經過。大書東浙第一家。五篆文以褒之。此觀風職也。助嘗造義門。獲拜期頤之老於牀下。見其長幼有序。衣冠濟濟一家。三代之風也。嗚呼盛哉。輒賦近律一章以紀云。

相國鴻書護碧紗。鳳麟淵藪闕烟霞。南方禮義無多族。東浙衣冠第一家。天上經筵資檢討。里中文學被光華。觀風善俗加褒表。厚德清芬豈有涯。

助告老南歸。述懷一首。因留別館閣諸公。既承和章。以耀其行。而書鄙句於其端云。

來往京華三十載。自憐孤苦傍人門。白頭始遂歸田志。朱紱新承致仕恩。上苑鶯花春夢老。故園松菊晚香存。太常博士古官職。贏得虛名遺子孫。

純白齋類稿卷之九

七言律詩

送簡秋碧管句還孔林

孔廟摧頽久不修。下僚銜命走神州。浮雲疊武斯文晦。殘照林亭古木秋。天歷聖人祠闕里。太平元士贊皇猷。輦飛改觀光鄒魯。金石鐫辭頌德優。

和馬伯庸道宮夜坐

退食儀曹日影西。玄都下榻似仙棲。羽衣仙藥傾新曲。石鼎詩聯補舊題。火軟丹房溫坐毳。酒消冰盃凍羹藜。道人靜聽尙書履。萬丈寒芒聚壁奎。

和趙秉彝夜坐見寄

北風朝暮撼松檟。詞客相過始啓扃。汲井層冰敲碎玉。烹茶宿火撥殘星。愁吟筆凍書難好。僵臥氈寒夢易醒。無補明時嗟欲老。此身如鶴瘦伶俜。

次韻遂彥常遊江心寺

東甌山水勝他邦。突兀胸奇向此降。不使一塵生絕壑。長留二塔峙中江。月移松影橫蛟室。潮漬苔花上

石幢安得相逢共遊覽。浩歌醉倒玉瓶雙。

敬亭春雨樓爲繼學廉使賦

嵐氣山光接太空。詩樓新製擅江東。官居憲府雲霄上。人在敬亭春雨中。花木護寒陰漠漠。琴書生潤晚濛濛。千年謝李風流遠。一代聲名屬我公。

坐邀山色軒

高人拄笏澹忘形。賓接千峯主敬亭。排闥相看仙眼碧。款門長對佛頭青。雨來送爽鳴瑤瑟。雲度飛陰臥玉瓶。獨攬光華成百詠。能令李白醉魂醒。

陪廉使遊昭山亭

宛陵春色有餘芳。出郭清陰逸興長。雲樹深藏金刹古。山花時拂繡衣香。唐僧卓錫湧泉水。裘相讀書留草堂。休日從容陪勝賞。微吟淺陋不成章。

送蘇伯修分院上都

詞臣扈蹕更遭逢。共沐恩波喜氣濃。下直錦袍淋馬酒。大酺甃帳割駝峯。白河秋早旌旗合。黑谷雲深劍佩重。想見翰林蘇應奉。樂章進擬動天容。

送李仲甫應奉祠西蜀

詔選詞臣太白豪。西馳代祀豈云勞。仙盤映日華峯峻。棧道緣雲劍閣高。中肅祠庭陳玉幣。前驅使節擁

旌旄還朝應爲扶衰老。印竹過肩贈我操。

送蘇伯修南臺御史

九重明達選英髦。豸角峨峨展素操。才學久居文館盛。聲名更入憲臺高。風霜總避新驄馬。冰雪相看古錦袍。建業青山真似洛。咨詢歷覽遍江臯。

送王君實西臺御史

經世書成煥璧奎。風清臺閣映金闈。佇聞丹鳳鳴岐下。又見青驄到隴西。漢苑故基春樹遠。秦川平隰暮雲低。封章稍簡尋詩去。好在唐人向上題。

冬日書懷

天北雲容雪意稠。東風何日上歸舟。小兒鄉里當差發。老子京華尙滯留。道義寧非一身貴。功名總是百年愁。平生有志成迂闊。堪笑還家已白頭。

秋月寒潭

一輪桂魄挂長川。百頃寒潭古岸邊。水影淨涵天上月。月光清澈水中天。洗空河漢秋無際。冷射蛟龍夜不眠。收取釣絲歸去好。三更冰雪滿漁船。

送周伯溫廣東僉事二首

詞林藝苑擅豪雄。異數升遷出帝衷。三載侍經環北極。一朝僉憲振南風。身居栢府冰霜上。恩入梅坡玉

雪中未必羊城能久駐。青春有詔趁歸鴻。
過家綵服映朝紳。忠孝純全益顯親。祕殿結知聖天子。高堂喜動太夫人。威行風采搖山嶽。胆落奸貪泣鬼神。從此鵬搏知遠到。他年勳業畫麒麟。

王氏壽慶堂二首

舊隱蒼苔滿石田。使君家世本潼川。槐庭陰古多培德。荆樹花榮半學仙。錦水天風黃鶴外。綵衣春晝白雲邊。懸知慶壽堂中老。細酌流霞不計年。
風流江左故侯家。逸興超塵豈有涯。兩袖天香朝北極。一杯秋水誦南華。舊藏竹簡參黃石。新製萊衣翦碧霞。自古丹成由孝行。銀潢八月試乘槎。

太白樓

齊魯平原綠樹頭。登臨遐覽憶風流。鑑湖一曲知章宅。濟水千年太白樓。宮錦酒酣飄逸氣。金鑾月落照清愁。自從采石騎鯨去。此地何人更唱酬。

送袁慶遠潮州經歷

嶺海崎嶇到揭陽。民風吏治獨稱良。學師趙子遊芹泮。廟祀韓公奠桂觴。幕府移文鮫鱗靜。郡齋下榻荔蕉香。懸知畫諾今尤盛。千仞岡頭見鳳凰。

茶屋

武夷新採綠茸茸。滿院春香日正融。浮乳自烹幽谷水。輕烟時颺落花風。醉欹紗帽局雙戶。靜聽松濤起半空。喚醒玉川招陸羽。共排闥闥訴詩窮。

又詠

竹屋山房雅致幽。惠泉建茗濯春愁。柴門閉後俗客少。石鼎烹時道士留。苦入肝腸疑骨鯁。香回齒頰儘風流。北牕睡足供三碗。不願人間萬戶侯。

賀天師禱雪靈應

綠章夜奏曉雲同。黃閣精誠已上通。龍虎千年傳祕授。乾坤一雪顯玄功。天花密散人心悅。陽氣潛回物象豐。爲報新春好消息。也知喜色動三宮。

賦喜白髮

舉世凝愁君獨喜。白紛固與歲寒期。陽春不化垂顛雪。清曉惟梳滿面絲。朝士鬢邊多爲國。山人頭上半緣詩。今年我亦周花甲。正好銜杯介壽眉。

歸來漫題

矯矯冥鴻避網羅。征途歲月易消磨。故園安在黃花少。老友相看白髮多。司馬壯心寧止是。淵明歸興欲如何。兒孫繞膝豐年喜。時醉新醪一浩歌。

追和宋誠甫題蓬萊閣韻

長吟得句勝封侯。況是蓬萊閣上遊。萬壑飛流春雨足。千峯列筆曉雲收。山藏史冊抽金匱。帝召詞臣記玉樓。惟有留題在高處。緇衣無復繼風流。

壽吳宗師二首

孔李通家輔世長。兩都來往幾星霜。龍川曉扈迎天仗。鳳闕春朝侍玉皇。圖寫風雲千載會。鋪張道德九霄光。玄門殊絕無今古。壽櫟山中一瓣香。

又詠

瑤池碩果蟠桃懸。南極光中窺老仙。眉壽七旬又一歲。至元再紀方五年。鍊成丹火飛紫雪。看盡白雲上青天。縹緲仙家日月永。靈椿樹下錦溪邊。

宿智者草堂呈輝公

京國歸來訪舊朋。祇園樹下試閑行。青松夾道石雲冷。紅葉滿山秋雨晴。重到上方驚半世。清談良夜欲三更。新碑琬琰傳江左。師表禪規集大成。

送王溫夫宣城教授

束書襆被過江東。師範宣城道最隆。禮樂絃歌千里化。衣冠文物六朝風。裴休綠野開禪苑。謝眺青山繞頰宮。會見聲華騰憲府。相思回首暮雲中。

濟州阻水

梧葉初飄暑氣煩。任城留滯過中元。風雷又送他山雨。川瀆方增會水源。天井千艘交纜繫。斗門三峽怒濤翻。常時憂澗今憂漲。危坐船牕看浪痕。

括蒼道中

層巒霧氣午纔收。蒼壁飛雲古木秋。馮嶺危盤九天上。劉山勝絕萬峯頭。結茅成屋依巖穴。疊石爲田繞澗流。未必居人識幽趣。長令行旅似清遊。

送于壽道知婺源州

分符出守向星源。竹馬郊迎二月春。共仰高科推國士。獨持廉節化州民。香凝燕寢黃堂靜。仗引熊軒阜蓋新。朱子故鄉山水窟。豈無遺逸白頭人。

范文正公忠烈廟

萬石叢生泉一源。太平香火獨長存。西邊事業歸青史。先世英靈臥白雲。義廩久肥吳下族。孝祠遙省洛中墳。我來景仰懷忠烈。幾度徘徊到夕曛。

嘉樹軒

昔人種德百年期。嘉樹深根閱盛時。薤薤當軒蟠秀色。森森遶舍沐華滋。閒階鶴下鳴陰遠。空谷鶯來語晝遲。疇賦角弓勤頌美。無忘封植有遐思。

送上官來復祠嶽瀆名山

翩翩霞佩兩瞳青。袖有天香筆有靈。上應星辰馳使節。遠窮海嶽禮祠庭。四方樂歲祈民福。萬壽長春錫帝齡。閒暇題詩尋勝侶。山陰重寫換鵝經。

李氏遺經閣

乾淳殘刻護神靈。華構崢嶸接鯉庭。易代文明三建閣。承家業廣一遺經。鄴侯舊讀垂籤白。宅相新休照汗青。學自五峯傳統緒。湖南章甫盛儀刑。

寄陳玉林鍊師

羽衣道士識重瞳。冠劍芒寒星斗胸。赤壁月華驚夢鶴。蓬萊雲氣護飛龍。新宮突兀三清殿。故國蒼茫六代松。忽憶舊遊今白髮。何期再聽蔣山鐘。

和王君實員外巡山韻

元臣執政肅留都。小隊巡山近甸初。曉月旌旗穿水國。秋風劍佩入林居。社公酒熟田間醉。朝士詩成石上書。白髮史官遲外補。此生猶負氣凌虛。

送謝堯章

青冥無路志多違。金谷冰山亦易非。萬里天風雙鬢老。五湖秋水一帆歸。東籬菊花古來好。澤國鱸魚今正肥。羨子束書尋故隱。長松巢上看雲飛。

州先主廟

先主故鄉今涿郡。我行其野慨英雄。猶存古廟龍顏異。無復高桑葆羽同。西蜀偏安付諸葛。東吳遺恨失關公。漢家正統終然在。千載神遊卽沛豐。

送蘇伯修淮東廉使

觀風使者輟朝紳。張祖都門柳色新。玉節光寒淮海月。瓊花香老繡衣春。岷峨文獻傳家學。山嶽威名廓吏塵。有美皇華臨遣意。澄清一道悅吾民。

甕天爲謝堯章作

古甕空中納九州。誰能從我事遨遊。好謀莫作商人喜。知命長懷杞國憂。百萬醢雞同日暮。大千野馬自春秋。何當造次發吾覆。莊列驚猜讓一頭。

高氏四景亭

冉冉年光鬢易星。太行山色滿虛櫺。野花流水春雲白。佳木繁陰曉日青。種菊閑官吟竹屋。愛梅處士倚松亭。人生適興須行樂。萬事無過酒一瓶。

雨竹山房

山房舊隱種琅玕。靈雨鏘鳴古佩珊。入戶清音閑自聽。映牕秀色靜相看。翠搖溼溼琴絃慢。玉立娟娟鶴羽寒。三世對牀書滿屋。幾回吟罷獨凭欄。

東平段千戶挽詩

太尉名家魯國英，資兼文武識高明。雲飛紫塞朝橫槊，水落黃河夜渡兵。四十九年如大夢，百千萬劫悟無生。郎君惟肖能傳業，何止遺芳在柳營。

寄題留槎閣

龍泉爽氣干牛斗，處士幽居意自閑。高閣臥雲超物表，古槎流水寄人間。尙疑星石千年在，曾泛天河萬里還。不用城都重訪卜，此生真遯好溪山。

送太里蔣良軒赴闕

遠送故人上帝臺，臨歧握手總堪哀。長亭細雨沾行旆，祖道飛花撲酒杯。萬里蒼生待雲雨，九重明主憶賢才。諒知此去承恩後，故國咸瞻衣錦回。

純白齋類稿卷之十

七言律詩

中秋月

冰鏡團團掛碧空。山河大地影朦朧。中秋明月年年好。萬里清光處處同。秦華蓮花凋玉露。廣寒桂樹起金風。明朝塵世那堪說。但見童顏變老翁。

上享太廟禮成

太乙鉤陳盛羽儀。躬祠清廟早冬時。裸將冊諡崇徽號。奠定工歌儼孝思。穆穆降升三后假。洋洋左右百靈熙。明朝法駕還宮後。民望恩波四海垂。

送祁伯溫御史

國學師模養浩然。臺綱扶植賴忠賢。一封直氣榻前奏。百世高名天下傳。剛介獨鳴能決去。奸諛內愧豈安眠。要令宗社斯文重。砥柱中流障百川。

梅所

竹外橫斜野水濱。歲寒何處識吾真。蠻烟瘴雨面如玉。雪谷冰崖身是春。東閣巡簷青眼舊。西湖傾蓋白

頭新。光風霽月梅花所。盡屬當年上國賓。

再調編修

山野逢時久治安。曾經執筆遠遊觀。一生清苦惟文學。十載迂迴復史官。白髮方新銀海眩。青衫依舊玉堂寒。老來未遂歸田計。換骨猶遲九轉丹。

沙河舟中

夜來好雨潤桑麻。綠暗園林去路賒。天上雲衣變蒼狗。水中日影動金蛇。老吟苦處愁爲客。春睡濃時夢到家。漸近淮鄉風物美。揚州准擬看瓊花。

過京口有懷先兄淮海山長

淮海向時曾對榻。江流浩浩莫窮源。金山骨立成焦土。瓜步潮平沒舊痕。萬里孤飛鴻雁渚。百年有感鶴鷓原。禪宮劫火生悽愴。憶共登臨更斷魂。

挽王繼學中丞

玉堂揮翰瀉珠璣。家學光華世所稀。但覺高才無滯事。安知平地有危機。妙年臺閣祥麟出。晚節江淮退鷁飛。惆悵百年曾莫贖。生芻一束淚沾衣。

又

平生忠耿豈消磨。報國當時薦士多。烏府風清中執法。鳳池日求載賡歌。人間富貴如春夢。海外文章似

老坡慚愧白頭門下客。傷心無復聽鳴珂。

壽吳宗師

蓬萊深處老仙卿。閒看飛雲眼更明。此日廣成千歲壽。明朝太極一陽生。玄功無迹非常道。造物同遊不世情。晚集瑤池青鳥下。天風吹徹紫鸞笙。

南郊大禮慶成

齊宮至敬格穹玄。奠璧鳴韶達燎烟。萬世配郊尊聖祖。一人端冕對皇天。旂常婀娜三光會。雲漢昭回五色連。海內歡心成大禮。恩波同沐慶堯年。

題丁元善陽明樓

陽明福地神仙宅。縹緲樓居鎖翠微。瑤草長松凝古雪。桃花流水駐春暉。黃庭已換羣鵝去。華表方看獨鶴歸。人世千年一彈指。蓬萊清淺是耶非。

送高承之赴崇政巡檢

初試朝衫剪綠羅。蘭亭回首舊絃歌。且騎擒賊將軍馬。休換書經道士鵝。雁蕩雲飛山有澤。龍湫日靜海無波。太平時世官偏好。崇政安居樂意多。

中秋宿中山值雨

擇吉相期出國都。寧知遇雨昧良圖。馬行不穩人頻險。泥陷方深路轉迂。易水蚤寒雲氣重。中山秋半月

光無明朝局。鬱燕南道。更苦淋漓到日晡。

和趙子期侍郎延春曉直韻

曉開閭闔日華東。入直承恩傍袞龍。水淺御溝生薄凍。霜嚴宮樹脫初冬。立朝正色階前栢。報國丹心石上松。業在濟時方向用。願言卽取富民封。

春閣簾外紀事

南宮會試集羣英。簾外官曹職事輕。對讀文場四君子。監謄筆吏二先生。連朝虛食惟慚色。長晝高談起笑聲。鎖院若開星散後。他年莫忘此時情。

和葉敬常危大樸同遊四明東湖

連壁鰲頭蔚有光。東湖勝概甲吾鄉。青山帶雨秋偏早。積水生陰夏自涼。太史方紬藏閣祕。老儂深炷古祠香。承宣安得如前輩。澤及斯民百世長。

除夕偶成

節物紛華除夕至。嗟余幾見客京城。身輕謝事無官責。年老還家有子迎。紫陌糟丘連夜飲。朱門爆竹半空鳴。歲寒固守清貧樂。窮鬼年年送不行。

寄題雪堂重建

東坡遺迹久荒榛。遷謫名高寂寞濱。竹院再營新繪雪。海棠重發舊時春。一襟風月超前古。兩賦文章絕

後塵安得登臨拜公像。江波浩蕩白鷗馴。

赤松宮

萬樹烟霞一水迂。叱羊福地卽蓬壺。林泉松石到今別。兄弟神仙自古無。山骨莓苔長是潤。巖腰芝草不曾枯。桃源小有更奇絕。鐵笛數聲秋月孤。

智者寺

古木寒流物外心。赤松智者獨登臨。草堂訪舊隔存沒。禪院談空無古今。石磴巉巖黃葉積。林亭窈窕白雲深。嗟予老矣無他念。洗耳靈源聽法音。

虎丘寺

海湧峯藏萬壑冰。虎丘奇觀列仙靈。劍光湛湛沉寒水。塔影層層上小屏。蘇子題詩山亦喜。生公說法石曾聽。小吳軒上一長嘯。極目平原禾黍青。

送夔子山平章赴杭省

公卿祖席上東門。花柳芳菲氣始暄。輟侍經筵辭禁署。分持鈞軸鎮雄藩。湖山日靜居民樂。江海春深品物繁。丕振儒風資治道。芟除蕭艾長蘭蓀。

又

德厚才弘簡上知。冰清玉潔映黃扉。詞林載筆真無忝。相業傳家更有輝。野渡潮平舟楫濟。新堤沙軟旆

旌飛東南父老勤瞻佇。請爲疲氓斡化機。

始皇

祖龍才略亦雄哉。六合爲家席卷來。函谷出師從約散。驪山築苑後人哀。可憐萬世帝王業。祇換一坑儒士灰。環柱中車幾不免。沙丘同載鮑魚回。

長城公

三閣飄香樂意濃。賦詩酣飲謝春風。金陵王氣六朝盡。玉樹庭花一曲終。門外干戈南北混。井間嬪御死生同。他年親上東封表。卻在開皇宇宙中。

明皇

一曲霓裳四海危。禍胎爲洗錦襦兒。豈知勤政開元日。翻作荒游天寶時。九廟蒙塵慚父老。六軍駐馬怨蛾眉。問關蜀道歸來後。南內淒涼更可悲。

子房

一擊豪揮博浪中。韓讎未報氣如虹。運籌垓下烏騅逝。留謝鴻門玉斗空。取履早師黃石老。定儲晚致紫芝翁。功成卻棄人間事。長使英雄仰素風。

蓮花

隔岸新妝笑浣紗。香風清遠屬詩家。留侯雅稱婦人貌。茂叔深知君子花。碧淨秋波千柄玉。紅酣落日一

川霞蘭舟桂楫紛紛去。憶聽吳歌宿若耶。

七夕

靈鷲成橋夜未央。佳期萬古益難忘。人間漫道經年別。天上祇如一日長。玉果蛛絲傳巧意。銀河鳳駕碾秋光。歸時不似來時好。淚溼紫綃雲霧裳。

寒食西湖上分韻得聲字

湖光激灩雨初晴。喜對良辰更合并。柳絮暖風吹釣影。梨花寒食起簫聲。吟成見竹敲門看。酒渴思茶入寺行。薄暮歸來忘息火。客牕猶理讀書檠。

和方韶卿遊涵碧韻

拂袖高吟夢得詩。緩探陳迹扣林扉。古亭禪刹自興廢。野水閑雲無是非。一沼淨沉秋樹影。數峯長帶夕陽暉。風流縣令今何在。惟有蒼苔滿釣磯。

和葛介軒對雨

積雨終風八表霾。簷牙衝溼燕飛回。滿池芳草夢初覺。一徑落花門不開。春事從教隨雨盡。老容暗覺逐愁來。我今祇作歸田計。門外鷓鴣莫浪猜。

禪悅庵

雨後尋僧到上方。松風吹鬢道衣涼。四簷蒼樹綠陰合。一榻閑雲清晝長。竹屋鳴琴連谷響。山泉洗藥入

池香。俄驚猿狖攀藤出。隔水紛紛盧橘黃。

寒食雪寄葛介軒

惆悵東風禁火天。春寒積雨興蕭然。安貧羞乞墦間祭。追養力耕綿上田。滿地飛花猶見雪。千門插柳已藏烟。龐公上塚歸來後。應採新茶試石泉。

和師古姪孫遊禪智寺

竹院松門風自開。齋殘幽鳥下生臺。懸崖瀑近喧清晝。壞壁詩昏長綠苔。花柳盛時春易老。山林好處客稀來。攜觴野飲疎狂甚。祇恐巖棲隱者猜。

同李此竹遊西明巖

翩翩數騎入林幽。落照西明轉眼愁。同社已非一日約。仙巖方作片時遊。青枝露下雲巒暝。黃葉風高石室秋。安得春天卻來此。臥看飛瀑瀉山頭。

贈閑雲屋長老

古衲龐眉棲北山。山中來往盡名賢。蘇仙解帶施元老。韓子留衣別太顛。霞煖蓉峯春覓句。雲寒竹屋夜安禪。何時卻入東林社。小結茅茨傍鹿田。

寄濬圭杜隱士

先生高尚製荷衣。結屋藏書入武夷。泉石洗心無別事。皇王經世有遺思。據梧朗詠秋清景。隱几冥觀晝

詠時。立志獨修天爵貴。故應荷蕢接輿知。

禹廟

陵廟丹青樹篆文。梅梁窈石昔人言。千年嶽瀆神功在。三代衣冠古塚存。日落鏡湖春水遠。雨來秦望野雲昏。憑高一覽桑田闕。空翠山霏滿寺門。

水北山房

水北山房處士廬。松筠蕭爽興何如。汲泉自試烹茶鼎。眠石常攜種樹書。碧色映窻新草長。紅芳被徑落花初。幽深不減東西瀼。澗底瓜畦手自鋤。

寄秦里蔣良軒

故家喬本喜鶯遷。危坐談經思湧泉。竹徑垂青春有主。草庭交翠意無邊。夜來風雨思重念。塵世參商各一天。小子學詩興感慨。蓼莪讀罷欲潸然。

純白齋類稿卷之十一

七言律詩

蔣山

鍾阜龍蟠自古今。寶公塔畔足幽尋。穿雲碧溜寒聲細。夾道蒼髯古意深。千載有懷窮澗壑。幾人無愧老山林。齊梁遺跡多蕪沒。聊把閑愁入醉吟。

寄古學兄

東望南徐卽故鄉。寒氈困坐晝初長。池塘有夢生春草。風雨何時對夜牀。空巷燕歸迎客語。廢宮花發惱人香。登臨曾有書來約。綠淨秦淮正可航。

金山寺

淨槎乘興到金山。樓閣眈眈極偉觀。吞海江光明法界。過淮帆影落僧闌。青銅磨月秋偏早。白雪翻空夏亦寒。長嘯天風來萬里。登臨無復泣南冠。

送張鵬飛僉事福建

冰壺玉節氣英英。正快扶搖九萬程。攬轡慨然新臬事。埋輪籍甚舊家聲。瘴雲暮捲三山碧。閩海秋澄一

道清風采從茲殊俗震。老榕陰裏遍巡行。

次韻楊友直遊茅山

雨過三茅翠滴衣。冰壺高士入山時。翻思塵世千年事。未了仙家一局棋。寶劍飛空丹化久。秋雲滿地鶴歸遲。洞門不鎖天壇靜。風管時將月下吹。

送趙伯升江東照磨

風憲用儒吾道盛。蕭然琴鶴是行裝。昔聞洛水羅溫石。今見鍾山起趙楊。十載黃塵烏帽影。一朝冰鏡玉壺光。公閑笑傲宣城上。疊嶂雙溪入錦囊。

送鳳山講主歸天竺

道人說法寶花零。照夜摩尼濁水澄。衲惹天香辭玉陛。錫飛空影過金陵。譯經三藏見真性。衣錦萬迴真異能。我亦從來世緣淺。願參巾履躡峻嶒。

古學兄自京口至蔣甥教授自廬州至不期而會是夕大雪

家山何在久飄蓬。兀坐寒齋歲又窮。兄弟舅甥千里隔。江湖風雪一宵同。舉觴痛飲消愁外。秉燭相看似夢中。明日不堪回首處。孤雲依舊在江東。

春雪

膏雨纖纖長麥苗。翻成六出舞春霄。模糊柳眼輕難積。點綴花房暖易消。雲暝長途隨馬去。風迴虛幌逐

人飄臘前賦瑞連牀樂。此夕寒齋始寂寥。

玉晨觀

三茅山下玉晨觀。陶許玄風古道場。仙桷千年閱晉宋。丹泉二井分陰陽。烟浮石鼎牕紗碧。雲護靈壇秋葉黃。過客徘徊不能去。殘碑斷碣滿長廊。

虎丘寺

闔閭荒塚鹿麕遊。化作蓮宮跨碧湫。海氣潛通龍躍劍。金精祕泄虎蹲丘。陰風颯颯雙崖古。白日寥寥萬木秋。說法道人無復見。空餘羣石臥山頭。

畫山水

浮空積翠弄烟霞。能事丹青屬意賒。野水碧澄涵釣艇。秋林黃落見人家。豈無倦客思蓴菜。亦有閑官採菊花。真似坐餘巖壑裏。不知漂泊在京華。

和袁伯長韻送繼學伯庸赴上都四首

紫薇朝雨溼胭脂。玉署深深弱柳垂。書法謹嚴當載筆。家聲燁奕在論思。瀛州易縱青冥靶。人世難酬白雪詞。扈蹕年年九天上。微涼殿閣載賡時。

江海詞源正瀾漫。南屏老翠幾回看。花廳蹴踏雪消盡。宮錦淋漓酒吸乾。鑾掖承恩揮寶札。駝峯沾賜出冰盤。英才得展當年治。誰說冷官魚上竿。

清暑宮衣疊雪脂。上京雨露故多垂。人間炎赫無因到。天上高寒有所思。內府舊傳廷對策。教坊新被雅歌詞。由來勳業須青鬢。二妙風流擅一時。居庸關外陰漫漫。異境蕭條拄笏看。沙草低風泉韻咽。崑雲開日露華乾。天閑鳳臆三千匹。世路羊腸百八盤。想見玉堂多盛集。宿醒睡起日三竿。

次韻楊友直偶作

萬事紛紛歸去休。採山釣水卽良謀。青衫不直田園樂。白屋那關時世憂。壯志奈何成濩落。殘年如此愧淹留。會當共駕牛車去。卻泛春江樹杪舟。

和閒閒真人悼鶴

胎禽住世不知年。真逸成功獨爾憐。華表留聲終解化。浮丘相法豈虛傳。舊乘羽服空軒蓋。新葬銘章有墓田。惆悵碧牕觀易罷。祇騎一隻上寥天。

和道心姪遺興

高人自得丘園趣。何用腰金束九環。宿雨乾時耕白水。春雲香處斲青山。東林淨社形骸外。西洛耆英伯仲間。記取清明時節好。相逢莫放酒杯閑。

赴美化書院別親友

遍參名勝走黃埃。俛仰京華一夢回。此日束書遊美化。當時薦稿上清臺。甍寒但得無迎送。地近何妨數

往來自笑半生成。濩落猶期教育見英才。

送董仲禮赴察院

三策淵源濟世才。簡書嚴肅震風雷。分司歷遍東西浙。貢剡還升內外臺。八詠溪雲愁易別。半山松月候重來。交遊袞袞登清要。誰億寒儒困草萊。

遊小赤壁

釣磯彷彿壘西邊。遙想英雄一概然。崖谷空鑄小赤壁。文章誰續老坡仙。落星久化山頭石。孤月長懸水底天。此夕舟遊殊勝絕。惜無佳句與人傳。

新試院

宰臣屬意構鄉闈。繪事輦飛土木奇。欲爲清朝羅俊士。豈於華屋計崇貲。豐碑外樹陳王道。高閣中嚴奉聖師。會見秋風燈火夕。朱衣暗點校文時。

西山晚歸

金刹紛紛壓翠巒。瘦藤扶我試躋攀。清時更覺湖山好。樂意極知魚鳥閑。西浦新鴻秋水外。南朝古木夕陽間。逢人爲問歸何晚。笑答幽尋上筮還。

訪孫幹卿州判

元夕持螯酒興濃。喜君夙昔志英雄。相思京國十年外。再會江陰一夢中。輿誦安恬循吏化。家傳清白古

人風功名事業從茲始。不與膏粱筮仕同。

效侯良齋諧音一律體贈幹卿

判州儉德似羔羊。廉幹聲名日播揚。僵臥獨憐吟夜永。勝遊同約踏春陽。賞心雲觀臨江渚。快意風濤接海洋。今古無窮詩酒興。此生隨地得徜徉。

多景樓

來往南徐又十秋。人逢好景易生愁。驚心鴻雁飛孤影。滿眼江山憶舊遊。雲淨金焦浮暖玉。雪消吳蜀漲春流。文章未了相如再。志駕長風萬里舟。

三月廿八日喜雨

久旱山川徧禱祠。翠華徐動北巡時。俄瞻萬里風雲合。沛作一天雷雨垂。爽濯飛埃泥沒馬。潤流枯壑水浮龜。輿情鼓舞均霑被。想見行宮進壽卮。

讀文山集

學問淵源見性真。志扶傾廈不逢辰。少時大策魁多士。晚節忠風愧幾人。亟上封章誅嬖倖。肯回直筆媚權臣。遺文字字英靈氣。玉潔珠光萬古新。

和李息齋留別南歸

漢廷耆俊愛桐鄉。聽唱驪駒抑更揚。祖帳都門華轂盛。歸驂江路白雲長。平山楊柳□□□。□□□□瓊花入

酒香。一代幾人如此老。淮南草木□□□。
壯日勤勞徧楚鄉。于今歸夢有荆揚。名高藝圃承恩重。貴極傳神閱世長。靜几蒲團依白傅。暑風竹簟趁黃香。玉堂回首如天上。籬菊江梅共耿光。

和張希孟學士拜命不赴四首

人生適意早歸來。日日杯觴笑口開。雲谷長歌招隱曲。玉堂空避謫仙才。子房素志惟松石。仲蔚高居正草萊。馬上朝雞曾慣聽。故應無夢到鸞臺。
孤雲野鶴本情親。詩酒生涯樂更真。已屬諸公行治道。獨容老子作閑人。琴樽夜醉華峯月。杖屨朝吟濟水春。心與海翁同一靜。烟波浩蕩白鷗馴。
脫卻朝衣寧再來。竹牕松戶傍巖開。但從林下得幽趣。不管人間論逸才。夜雪釣絲西澗玉。春風屐齒北山萊。相逢採藥多仙侶。清嘯時聞月滿臺。
勇退孤風孰可親。笑談吾自愛吾真。百年勝事無多日。一代高名有幾人。茶竈棋枰消永夏。酒瓢詩卷樂餘春。門前客散張羅地。花落閑庭鳥雀馴。

淮安忠武王祠

丞相祠堂又一新。蛩飛金碧耀麒麟。故郊尙想屯師日。遺老猶談誤國人。泥路迎降歸孺子。江潮失候避元臣。豐功盛烈英靈在。廟食千秋福我民。

松竹軒

松竹軒開絕世氛。鈞天九奏靜中聞。山林獨立蒼髯叟。冰雪相看直節君。天矯撐空龍作雨。參差鳴玉鳳棲雲。千年化石須臾事。刻遍琅玕古篆文。

賀歐陽圭齋除翰林承旨

廬陵居士後來身。衡嶽湘潭萬古春。江表名流知幾輩。翰林極品見三人。綸言播告金鑾舊。史事裁成玉帶新。一代宗工方倚注。未容鱣棹五湖濱。

試院和察士安韻

科場得失有神司。爲國求才孰敢私。三日文鋒雷動處。五星德耀夜深時。公心明鏡持衡重。老眼昏花讀卷遲。桂籍廣寒先已定。不由天命卻由誰。

送王公儼代祠南鎮

天香玉帛禮祠庭。原隰皇華候使星。弭節雲門探禹穴。榜舟鏡水訪蘭亭。梅梁廟古苔衣綠。石室書殘草帶青。應向山陰尋故宅。興懷重寫換鵝經。

告老得請留別諸公

來往京華三十載。自憐孤苦傍人門。白頭始遂歸田志。朱紱新承致仕恩。上苑鶯花春夢老。故園松菊晚香存。太常博士古官職。贏得虛名遺子孫。

純白齋類稿卷之十二

五言排律

壽柳道傳博士廿韻

昌運通神嶽。長庚應吉占。仙華巍峩峩。江浦潤漸漸。間氣鍾名世。奎光燭畫幃。宅心推廣大。成德本沉潛。魯下傳宗遠。河東問學兼。修辭精以密。稽古博而嚴。脫穎非常調。彈冠詎久淹。笑談春入坐。吟諷月窺簾。考試文丕變。分雍教不厭。容臺儀有據。清廟器無嫌。積累培良厚。操持取甚廉。銘章垂竹帛。謚筆卻金縑。朝饋收佳譽。恩波喜沛沾。仲秋當吉月。湛露沐威炎。桂蠹冰盤爽。松醪壽罍添。鸞坡方直上。鳩杖未須拈。海棗香堪剝。蟠桃味正甜。水蒼新玉佩。綳縹舊牙籤。旋逼躋華要。寧容卽退恬。太平資潤色。里閭極榮瞻。

壽吳閒宗師

瀛海仙源遠。崆峒景運長。真人希代出。大道翼時康。教雨師門盛。宗風祖德光。讓流吳子國。慶衍蓋公堂。愆祀精潛達。迎年樂未央。太玄由我老。永命贊吾皇。忠孝承殊渥。勳庸表異章。蓬山遊縹緲。弱水濟汪洋。華旦開千祀。崇朝轉一陽。羽儀真肅肅。霞服偉煌煌。清奏聞天上。黃封酌帝傍。龜麟呈瑞簡。龍虎衛靈場。瑤圃羣仙集。冰壺百怪藏。大椿齡益茂。古樛壽彌昌。期棗仍多實。蟠桃又再嘗。閒閒歸衆妙。一一見真常。

曠劫虛無炁。長生道德香。玄都蕭爽地。笙鶴永翱翔。

壽馬伯庸學士廿韻

嶽瀆神光降。乾坤爽氣浮。偉人驚間出。昭代獲旁求。應詔高科始。揚庭大策優。華登文翰屬。顯擢法冠儔。天下無多士。朝端第一流。抗章彈老鳳。乘興狎輕鷗。耕釣蟠三楚。聲名播九州。高吟淮海月。清嘯石田秋。宣室趨前席。承明厭舊遊。四人寧避漢。二老已歸周。載筆銘鐘鼎。談經侍冕旒。青宮資善翊。黃屋訪洪疇。捫馬淋袍錦。團龍沃賜甌。變風回大雅。稽古耀前修。華旦初逢臘。遐齡曷計籌。俗憐青眼顧。恩重赤心投。龜息春長好。虹光夜不收。玉堂真學士。碧海古瀛州。仙棗香堪剝。蟠桃味欲偷。壽祺齊廣老。文統接韓歐。

和王治書題商學士山水十韻

盛時宗翰墨。學士擅丹青。逸興開山水。高名仰日星。樵斤空谷應。漁網暮潭腥。晴塢雲無迹。寒崖樹有靈。幽篁奇石瘦。野蔓怪花馨。猿鳥林間見。舟車水際停。齊梁圖作障。吳蜀寫爲屏。萬壑歸深院。千峯列廣庭。滄波鷗泛泛。空宇雁冥冥。遐想巢由輩。中藏隱者扃。

和治書春日臺中獨坐十韻

攬轡獨遲遲。清朝百度宜。憲綱爰自肅。危坐若無思。封事通丹扆。吟鞭詠素絲。烏棲多好樹。鳥弄幾新枝。沙軟連春草。波澄解凍澌。興懷金馬夕。言餞碧雞時。深院花陰合。閒階栢影移。芹香來燕子。水暖出魚兒。白日寧虛擲。青雲不負期。甘泉崇報祀。應待續周詩。

送史秉文助教祠西嶽還家

蜀郡文章古。離庠聞望嘉。放懷吞七澤。歸夢繞三巴。秘祝祈民命。分祠遣使華。孝思寧奪席。恩意許還家。海嶽皇威暢。乾坤聖歷遐。銜香辭紫禁。負弩迓青緇。令伯人方敬。相如俗漫誇。錦江浮竹葉。玉壘漲桃花。壽筭千年會。慈顏八袞加。暑風清劍閣。秋月上褒斜。飛雁河源遠。看雲棧道賒。高堂榮祿養。晚節著天涯。

胡安常侍郎父慶壽八十

盛世躋三壽。清心養一元。肖形傳洛會。種德邁于門。安定新封貴。中庸舊望尊。菊潭澄夜月。藥砌弄朝暉。大蓋齊申呂。高風蹈綺園。枌榆崇素節。橋梓沐皇恩。家慶金章絢。庭趨彩袖翻。珍羞嚴日愛。旨酒樂春溫。水曲扶筇杖。花陰駕小軒。何當床下拜。同姓古彌敦。

元夕王參政席上賦剪燈

元夕同清賞。華燈此是魁。玲瓏峨鳳閣。縹緲疊鸞臺。楮葉羞雕刻。并刀快剪裁。水紋多曲折。絲縷細縈迴。一巧由心起。千奇應手來。紅搖驚舞袖。彩散入銜杯。雲母長疑畫。冰綃不染埃。瑞光明百寶。春色映三台。玉燭和風轉。金花午夜開。追陪東閣履。吟咏愧無才。

壽虞伯生學士廿韻

雍國光來裔。岷江產世賢。朝廷聲夙著。館閣望推先。學問諸儒服。文章四海傳。楷書誠美甚。古篆更蕭然。王李真齊駕。韓歐可比肩。持衡歸鎖院。進講侍經筵。壁水聞精義。蓬山玩秘篇。題詩紅藥畔。草制紫薇邊。

竹汗成新史。芸香入舊編。立班金帶重。下直綵旌懸。歷已三春候。時方二月天。長庚開壽域。南極祝遐年。花院藏烟後。蘭亭禊事前。高明瞻斗漢。雅志屬林泉。顏渥黃封酒。心清白社蓮。松筠宜晚節。龜鶴映華顛。眞率甘枯澹。逍遙屏麗妍。丹爐同永久。鐵杖鬪清堅。前輩風流在。斯文統緒延。佇看升一品。冠絕玉堂仙。

劉仲彝御史孝廉

親喪吾自盡。營葬族人兼。樹栢哀何極。居廬制獨嚴。夜泉臺寂寂。春露草纖纖。行義還瀛古。科名舉孝廉。青宮趨簿領。白簡肅壬儉。汝穎先賢傳。遺風尙有瞻。

送趙宗吉西祠隴蜀

山川崇代祀。有詔遣鄒枚。駿極瞻西嶽。華文煥上台。靈光通漢時。嘉氣候秦臺。望秩精誠達。迎年淑景迴。函香天上至。使旆日邊來。馬度邛徠坂。舟行灩澦堆。劍門垂薜荔。棧閣長莓苔。鳩杖扶商皓。斑衣舞老萊。過家多會集。駐節少徘徊。賦詠誇詞筆。登臨騁逸才。錦江春雨足。玉壘暮雲開。宣室他時對。皇風暢九垓。

胡母李孺人挽詩

孝奉尊章久。仁施德厚培。治家皆懿範。教子總英才。敬對一椿老。芳聯五桂開。萱春方有喜。薤露遽生哀。采服幾年別。衰麻萬里回。聞喪悽六館。致賻動三台。無復跳魚出。唯應弔鶴來。朝紳歌楚些。亦足慰泉臺。

新成八詠樓呈張毅甫廉使

八詠登臨地。荒涼昔久堙。溪山千古勝。棟宇一朝新。起廢眞奇事。觀風得偉人。赤松光世裔。繡斧映朝紳。

露井休文迹。星壇婺女隣。前楹蜂蠹蝨。西浦水粼粼。天遠冥鴻羽。波澄泳錦鱗。闌干危倚徙。蟬鯨屹橫陳。秋落高梧影。雲埋老樹身。參差烏鳥集。浩蕩白鷗馴。三洞飛仙宅。雙流合劍津。鶴歸華表上。羊臥石泉濱。片泮恢儒業。冰壺肅吏塵。勳庸銘琬琰。壯麗關荆榛。要路多名士。清時少隱淪。川原良可愛。林壑美無垠。境曠才難盡。詩工筆有神。舉杯邀皓月。鼓瑟轉陽春。縱目連南極。馳心共北辰。遊觀資治理。同樂太平民。

和趙可學御史試院紀事十四韻

春闈多士集。五日試三場。懇懇言爲治。拳拳策救荒。朝曦穿席舍。殘雪擁茨牆。筆落風飄忽。廉垂燭煒煌。詞源寧有竭。露索豈須防。胸次精忠白。眉間喜色黃。溫溫明玉質。耿耿耀珠光。對卷翻朱墨。凝眸老雪霜。縱橫周禮樂。馳騁漢文章。側席求賢俊。安民化善良。仁恩推廣大。景運極延長。宗伯持金鑑。歐公擅玉堂。考文流電彩。執法染天香。我后今堯舜。垂衣冠百王。

送袁雪樵河間治中

漢世三公裔。鴻名四海聞。衣冠傳典則。閥閱聚氤氳。秀挺當年少。才弘史學勤。槐花驗秋賦。金榜炫朝昕。正議回鈞軸。清風動香芸。致身紫薇署。拂袖青瑣熏。南邁遭炎瘴。北征苦寒皸。去思勒民社。樂育歌泮芹。馬邑古邊障。雁門今榆粉。雪樵清峻極。風俗美華助。佐理煩耆彥。承恩報聖君。古瀛近霄漢。別駕翔烟雲。綠野桑麻合。黃堂風月分。天官資妙畫。桂子播清芬。趣召金臺上。還歸潞水濱。成均念同舍。翰長敘斯文。

王致道母壽七十

嶽神騰瑞霧。婺女耀寒芒。生子非凡近。榮親是顯揚。斷機齊孟母。躍鯉繼王祥。史館明褒貶。成均化善良。闕宮歌實實。泮水頌洋洋。燕喜開東魯。忘憂樹北堂。高科儒業遠。介福壽源長。鸞誥天花燦。魚軒象服光。七旬初度日。三月正春陽。翠釜珍羞味。黃封旨酒香。聰明如少壯。步履更輕強。姻友歡同會。門生迭舉觴。遐齡岡峯峩。眞節栢蒼蒼。五福膺全具。兒孫笏滿牀。

遊赤松宮

眞境玄冬際。空山靜窈然。舊遊如隔世。清坐欲通仙。蓬島虛無地。桃源小有天。寒雲依竹屋。晴雪漲丹泉。林影日光薄。梅花春意先。盤桓松鶴外。舒嘯石羊邊。未暇窺龍洞。何由訪鹿田。山人朝覓句。羽士夜談玄。

酬和古律詩廿四韻并序

僕歸自京師。承子晦翰製惠書見督。學識超然。追古人而從之。殊增降歎。日者伏謁。辱款盛筵。眷意綢繆。益悅情話。且又贈遺古律詩廿四韻。大音希聲。寵光行李。異時中朝諸公見之。亦當爲之擊節也。輒次韻奉答。甚愧續貂。幸裁正焉。胡助頓首再拜。

乾坤森萬象。一氣實網維。尉此文風盛。方當世運熙。青山玫瑰琰。白水照摩尼。士樂吳尊美。年荒魯酒醜。遠才猶昔日。藏器諒需時。瑚璉周宗廟。衣冠漢羽儀。喜因趨燕寢。暫得脫塵羈。文翰功深著。鄉閭德厚施。遠懷纒略布。妙語數相遺。燕客華觴集。娛親彩服奇。乘軒憐野質。招隱慕幽姿。孰謂淹槃澗。行看貢禮闈。感君崇道義。愧我拙言辭。磨琢資良友。溫恭本聖師。克勤逾澹泊。加禮益操持。雲軌長虞履。天閑每斥嘶。

萱堂春意永。竹徑歲寒期。西峴霜空壑。南溪雨漲堤。古心稽典籍。逸興寄園池。習俗行誇疾。隨時論稍卑。椒盤春獻頌。蓮炬夜催詞。博學端成務。愚言敢傲危。行藏俱有合。用舍孰非宜。年妙才華富。飛騰豈厭遲。

純白齋類稿卷之十三

五言絕句

白雲

片片白於雪，山人共隱居。
豈無作霖意，太空時一舒。

石鼓嶺

經過石鼓嶺，不見石鼓文。
兩澗流寒玉，半山生白雲。

黃秋江耕釣山房十詠

清江釣月

江月澄秋色，垂釣沙岸邊。
得魚固可喜，無魚亦欣然。

空谷耕雲

農事不可緩，躬耕以養親。
隱居雲谷裏，老作太平民。

蒼峯卓筆

孤峯卓毛錐，何啻萬鈞力。
誰能蘸秋江，顛草書空碧。

碧巖開屏

神工琢方玉。爲障紅塵路。翠屏生晚寒。白鳥忽飛度。

楓林巢鶴

蕭蕭楓樹林。上有仙鶴巢。獨宿白雲遠。數聲秋月高。

雪澗浮龜

激湍浮石龜。頑若不知事。澗低得高年。殊勝江湖使。

峻嶺扶車

行險虞傾覆。居高慮易非。上車挽不進。下車去如飛。

圓岡揭斗

山脈應天象。壁星布圓岡。肅容靜相對。拱北心不忘。

雙溪合壁

寶劍千年合。山輝神氣通。深清環釣石。餘潤作年豐。

古寺垂虹

空山出清磬。蕭寺隱林端。掃葉僧歸後。夕陽橋影寒。

希夷像

肚皮包太極。鼻息應黃鍾。天下事已定。先生睡得濃。

山水小畫五首

小山如虎踞。大山似龍蟠。草堂人已出。蕙帳生春寒。
春香花泛泛。水渺山重重。漁艇時來往。桃源有路通。
結廬水石會。高居把釣人。前峯春雨足。一派垂天紳。
古寺雲峯頂。微茫一徑開。時逢林下客。興盡抱琴回。
茅棟臨松壑。飛流不厭看。何勞揮白羽。長夏自生寒。

劉伶像

一鋪埋身計。相隨入醉鄉。形骸雖放浪。生死未能忘。

子昂枯木竹石

幽篁微有韻。枯木寒無枝。石生方傲兀。歲晏以爲期。

秋晚小景

茅宇清溪曲。秋風老樹疎。空中羣雁過。知有北來書。

蘆雁四詠 飛鳴宿食

蕭羽遵寒渚。渡江蘆葉黃。誰云南去遠。不敢過衡陽。

萬里西風急。送書時一聲。從教驚客夢。可待主人烹。
沙汀棲處穩。夜漏有奴看。月暗蘆花白。一身秋夢寒。
飲啄殊自得。水田梁稻秋。寧因謀一飽。失卻網羅憂。

新涼二首

夜來牕戶涼。一枕聽秋雨。曉起絕飛埃。門前有流水。
雨將殘暑去。風送新涼至。安得歸夢成。夜長愁不寐。

勸兄弟十首

田氏好兄弟。初焉念少差。一朝仍會合。荆樹再開花。
鄴下然其句。淮南布粟歌。相煎容不得。奈爾二人何。
勿苦毫釐較。當思手足親。丁鴻與劉愷。讓國是何人。
鴻雁天邊過。鶴鶴原上飛。尋聲還顧影。次序不相違。
父慈子必孝。兄友弟須恭。倘使誠心在。如何不感通。
連床聽夜雨。長枕共姜衾。棣萼相輝映。何由外侮侵。
金昆與玉季。和樂奏墳簾。氣象自然別。清風復古詩。
生來同一氣。兄弟是天倫。祇要長和睦。休論富與貧。

友愛言無間。從教耳屬垣。恬愉崇遜讓。寬厚福之源。
古有難兄弟。今無好弟兄。何由風俗厚。凡百近人情。

越上寶林寺八詠

飛來峯

寶林從何來。飛空錫同住。天風吹海濤。長恐復飛去。

應天塔

浮圖成再世。巖岌高入雲。妙應人天果。鈴音上界聞。

靈鰻井

巖穴如流井。潛潤通海脈。靈鰻久蜿蜒。歲事時有獲。

大布衲

清涼大布衲。七帝師道德。流傳五百年。未減鍼綫迹。

羅漢泉

應真曾卓錫。百尺井泉深。汲取天人供。泓澄印佛心。

古鐵鉢

鐵鉢生古色。曾經飯胡麻。黃龍此降服。更長碧蓮花。

深竹堂

禪宮庭宇靜。深翠萬竿竹。忽悟瓦礫聲。香嚴道機熟。

盤翠軒

獨擅月中秀。軒牕四面山。紅塵飛不到。長共白雲閑。

除夕

今年盡今日。明日是明年。客況蕭條處。春寒雪後天。

大能仁寺五詠

支遁室

支遁開山祖。千年古道場。坐看秦望碧。門對鏡湖光。

玄度檜

許公手親植。上有晉苔封。應悟無生話。蒼然化老龍。

天鏡閣

淩虛高閣迴。一鑑懸秋空。山河與大地。盡在光明中。

傲雪軒

松竹持高節。清香獨讓梅。歲寒同傲雪。風月更悠哉。

見月亭

夜夜見明月。殘經可了看。半牕橫塔影。玉露三更寒。

孔子泣麟圖

麟爲聖人出。聖人爲麟泣。見獲何不祥。春秋成絕筆。

布袋和尚

一筇挑布袋。萬物此俱收。開口嬉嬉笑。人生枉自愁。

雨水竹

楚雲飛不起。翠羽溼低垂。南望九嶷遠。湘妃泣舜時。

畫虎二首

踞坐視眈眈。空山將落日。一嘯風滿林。獸驚不敢出。
橫行負蝸坐。風林欲暮天。威猛服羣獸。孰敢撓其前。

尖帽山

山似高簷帽。青尖插晚空。何人堪戴取。付與筆頭翁。

彈琴峽

白石似琴身。流水似琴絃。阿誰彈此曲。遺音千萬年。

仙人枕

石作仙人枕。枕邊流水聲。借君眠一覺。神爽到蓬瀛。

白海

雲淡青蕪遠。風高白海寒。君王圍獵處。人道近長安。

隱趣園八詠

君子池

池上藕花開。香從太極來。亭亭清淨觀。君子日徘徊。

待月壇

天遠雲歸早。山高月上遲。夜坐發孤詠。秋風生桂枝。

蜀錦屏

濯錦爲屏障。紅妝擁萬妃。試看春睡足。何羨買臣歸。

天香臺

三月韶華盛。名花傾國人。何期真率會。同賞洛陽春。

香雪壁

醱醱春意好。百尺走條枚。壁立堆香雪。風流入酒盃。

晚香徑

彭澤歸來後。東籬菊正黃。秋光無限興。晚節有餘香。

竹澗亭

竹澗茅亭外。泉流石澗中。一天秋月夜。千載隱君風。

歲寒亭

松竹如佳士。梅花更典刑。歲寒千古意。笑指鹿峯青。

附六言絕句

稽鍊師秋山小景二首

緱嶺鳳笙明月。茂陵仙掌秋風。雲臥楚山飄桂。練靜吳江落楓。林下手招歸鶴。水邊目送飛鴻。莫道秋山是畫。分明身在其中。

羣魚龜蟹圖二首

羨爾水鄉三物。濠梁之樂誰同。慎勿橫戈沙上。正須曳尾泥中。風味獨傾郭索。吉凶莫問波臣。便當拍浮湖海。長作龜魚主人。

虎溪三笑圖二首

東林一段公案。送客不過虎溪。今日爲誰破戒。欣然拍手分攜。
陸道士靜兀兀。陶淵明醉如泥。笑殺遠公相送。何曾踏着虎溪。

北山不老泉

千載有懷慈母。一泓不老寒泉。欲窮源而莫盡。竟坐石以安禪。

純白齋類稿卷之十四

七言絕句

安山見王繼學侍御

綠暗園林杏子熟。安山泊船端午時。南歸喜見王侍御。薰風入座談新詩。

商學士山水

雨斷雲林溼翠幢。漁舟一葉釣清江。好山秀水商公筆。付與幽人臥北牕。

蘇李祖別圖

持節生還海上身。酒酣泣盡別愁新。河梁分手天南北。千古長憐異域人。

羅稚川山水

稚川山水足幽奇。點綴分明□□□。何事舟人歸意速。風吹溪雨欲來時。

戲詠鶴

白鶴翩跹日日來。道人庭宇啄莓苔。祇愁煉得丹成後。騎上青天去不迴。

桐江舟中

潮送歸舟過浙東。嚴陵灘下一帆風。桐江秋色真堪畫。回首釣臺烟雨
中。
柯敬仲枯木竹石

瀟灑幽篁不受塵。千年枯木口口文。揮毫鶴落清新意。不減湖州古墨君。

登舟口號

舉家送我上扁舟。一路溪山憶舊遊。小槳如飛人漸遠。無窮離恨懶回頭。
用柳道傳韻題天王講主墨梅

妙入毫端老更妍。河東向落簡齋邊。天王祠下春風面。時見飛花雨法筵。

贈懷空上人

卓錫爲庵了上乘。高風孤絕護山靈。我來試叩祖師意。直指芙蓉一朵青。

草堂歸來圖

草堂雲水靜含暉。荆樹花梢掛衲衣。卓錫有聲慈母喜。萬回方向北山歸。

錢氏孝感紫芝圖

孝子當年泣血時。蓼莪一詠一回悲。冰魚冬笋何嗟及。瑞應猶多見紫芝。

東坡書三馬贊真蹟

圖成天馬歸何處。墨妙辭雄耐久看。當日儀曹五花判。他年遷客一忠肝。

錢清道中

斜風細雨過西興。越上山光見未曾。夜宿錢清愁不寐。可憐春盡冷如冰。

李息齋墨竹

勦邱老息竹傳神。密葉寒梢不受塵。相對碧牕風日靜。嗒然疑是古仙人。

戲作東門竹枝詞五首

東門歲晚竹枝歌。白髮無情奈老何。古意猶存風俗厚。南人不似北人多。
病卒攜筐拾墮薪。東門稍僻少車塵。久從叫佛樓邊住。慣見深降高鼻人。
酒力微微夢易回。地爐宿火已成灰。飛霜帶月寒駝吼。知有氍毹車直北來。
寒林不動靜無風。小酌瓜薑面輒紅。晚向東門回首處。西山正在夕陽中。
馬通火軟穴居溫。不管狂飈縞帶翻。舊歲闌珊新歲近。短轅何用出東門。

僧元卿御史送米

曝背晴軒柳影疎。履穿衣弊且安居。朝來御史分清俸。飽飯紅陳讀古書。

得家書

老子飄飄出岫雲。從教二息自持門。忽逢驛使平安報。更喜秋來得一孫。

送道士楊一可歸儒養母

劍門春老畫啼鶻，負米還家草太玄。若識孔融無異趣，人間孝子卽神仙。

墨蘭

翠袖瑤華浥露香，所思渺渺在三湘。九嶷日暮碧雲合，空谷無人亦自芳。

畫猿

長臂黑猿棲鷲嶺，攀藤接果捷於風。冷泉亭上僧歸後，長嘯一聲明月中。

鑄橘樓

商嶺老人何處藏，結樓賓日攬秋先。金烏飛出東海水，鑄作洞庭千樹黃。

郭天錫山水

危峯千仞翠蒼蒼，彷彿匡廬有草堂。聞道山人徵不起，紫芝春暖白雲香。

子昂秋岸牧牛圖

野岸秋風木葉稀，兩三穀觶度荒陂。玉堂學士歸田興，寫出山溪放牧時。

懷遠五首

朝投諫書夕遠竄，詩史誣訕亦南遷。玉人自昔宜烟瘴，文采風流今謫仙。
中書落筆萬人驚，海外爲文更老成。若使青氈還舊物，也知造化忌聲名。
停車綠葉暗枕榔，荔子蕉花取意嘗。何日賜環誇北客，西牕剪燭話南荒。

醉墨留題發興新。遐方景勝必因人。零陵山水聞天下。亦是當年遇逐臣。
起居服食異中原。瘴海茫茫何處村。愧我真成翟公客。不能一往候寒溫。

謝饒士悅惠楮衾二首

漂楮爲衾雪色鮮。軟於冬絹煖於綿。詩人持贈師清儉。穩向寒齋夜獨眠。
麥光如練瑩無瑕。蜀錦吳綾未足誇。煖入詩脾長熟睡。夢成踏雪看梅花。

朝賀退赴南城試院三首

天子龍飛朝會罷。卽開貢院到南城。燕臺桂樹秋風老。奎壁光芒五夜明。
籬外良勞小試官。棘闈列卒謹防閑。夜深危坐看謄卷。蠟炬燒殘筆吏寒。
文場戰藝似銜枚。學術源源筆下來。不負皇家圖治意。端從鄉薦得人才。

題七賢過寒林

踏雪崎嶇有底忙。僕夫寒窘度林塘。他時張蓋紅塵陌。卻憶黃罏舊酒香。

值初度

塵滿衣巾好宦情。玉堂閒暇得虛名。侍祠太室清宵短。不記今朝是我生。

盧溝南道上三首

彰義門前楊柳陰。過街塔畔井泉深。行人飲馬向南去。歷歷穹碑好墓林。

柱頭獅子巧雕鏤。橋下湯湯走濁流。五月燕山日如火。寫碑兩度過盧溝。
翁仲新阡又一時。忠奸百世託雄辭。史官清暇知何補。奉勅來書賈傅碑。
上京紀行見玉泉山下荷花

西山咫尺玉泉清。無數藕花香氣生。立馬岸邊看不足。卻疑五月過臨平。
榆林

倦客出關仍畏暑。居庸回首暮雲深。青山環合勢雄抱。不見舊時榆樹林。
槍竿嶺二首

九折盤紆過客愁。適當載筆扈宸游。長年見說槍竿嶺。今日身親到上頭。
下馬徐徐陟澗岡。山風微動十分涼。桑乾嶺上一回首。何處雲飛是故鄉。
再賦李老谷

李老谷中聞杜鵑。江南遊子不歸田。利名引得滔滔去。竟渡灤河朝日邊。
過桓州

陰雲慘淡滿天秋。馬上龍鍾擁毳裘。漸近灤京涼又別。斜風細雨過桓州。
題望都鋪

坡陀散漫草茸茸。地接烏桓古塞風。仰止神京三十里。樓臺縹緲碧雲中。

灤陽雜詠十首

帝業龍興復古初。穹窿帳幄倚空虛。年年清暑大安閣。巡筆山川太史書。
綠闌青草玉花驄。馴鹿遊眠殿閣東。西梵祝釐環地坐。曠曠初日曉旗風。
西清學士草黃麻。閣老承恩扈翠華。昨夜司天臺上望。文章光燄照龍沙。
小西門外草漫漫。白露垂珠午未乾。沙漠崢嶸車馬道。半空秋影鐵幡竿。
板屋松烟染素衣。天街暑雨沒青泥。夜來沙磧秋風起。鳴鏑雲間白雁低。
御天門前聞詔書。驛馬如飛到大都。九州四海服訓誥。萬年天子固皇圖。
斗北高寒無點暑。舉頭正見七星文。玉堂近與琳宮接。清夜步虛聲最聞。
朝來雨過黑山雲。百眼泉生水草新。長夏蚊蠅俱掃迹。葡萄馬潼醉南人。
萬騎橐鞬列旆旌。周廬嚴肅駕將興。帳前月色如霜白。曉汲灤河窟裏冰。
玉堂視草屋三間。盡日鼇峯相對閑。身遇太平鈴索盡。題名篆畢又南還。

偶題

頭上陰雲如潑墨。塔前白雨似跳珠。秋來日日風雷作。併入灤陽八景圖。

宿牛羣頭

蕎麥花開草木枯。沙頭雨過苗蘼菇。牧童拾得滿筐子。賣與行人供晚廚。

御花園

朱屏金鎖綠如雲。雨露恩光草木新。若識九重臨幸意。花時人世一般春。

看雲步虛詞壽吳宗師十首

南極光華世壽昌。羽衣滿袖是天香。蓬萊殿上神仙客。長見紅雲擁玉皇。
青霄萬里出瓊英。神運無方孰可名。魯觀朝來書瑞應。一陽生處卽長生。
冥冥雲漢鶴飛高。密勿真藏豈用勞。燕坐空同千百歲。丹霞萬樹熟蟠桃。
真人羽化有還丹。寓意看雲閑更閑。舒卷從時皆道妙。寧分天上與人間。
萬象陰陽一氣分。要從靜處見天君。太虛同體無凝滯。始識吾身是白雲。
動靜無端長又消。妙觀元化共逍遙。文章準易傳千古。唯有青城一老樵。
手招歸鶴同棲處。目送飛鴻見起時。幾度塵寰作霖雨。閑心祇有老天知。
山林歸夢是耶非。海棗如瓜別有期。看盡浮空千萬態。不知倚杖立多時。
一片閑雲孰與儔。長空湛碧自周遊。星移物換人間世。倒影寒潭萬古秋。
雲錦溪山紫翠圍。仙宮縹緲護玄扉。林梢片片飛來溼。知是從龍行雨歸。

柯敬中竹石枯木

山石蒼蒼老竹修。機材一派落丹邱。虛牕晝靜無人到。風動天壇碧玉秋。

訪王用亨丹房又題墨梅二首

道人危坐碧牕紗。客至呼童旋煮茶。深院日長無一事。薰風開遍石榴花。
京洛相逢塵滿面。孤山老樹日蕭疎。何時歸去茅簷底。瘦影橫牕夜讀書。

純白齋類稿卷之十五

七言絕句

題宋理宗御札賜王霆後

蹙國防河事可知。錢塘綴息強支持。權臣債師無庸責。天命方開混一基。

又

穆陵訓敕耿遺珠。盛世足徵文獻餘。王守宜登良將傳。孫曾上送史官書。

九日同晉卿攜酒訪士悅二首

菊花時節蟹螯肥。風起天街木葉飛。長記九重重九日。都人瞻望翠華歸。
秋風紗帽客京華。幾度重陽不在家。清俸尙堪供一醉。與君隨意看黃花。

題秋粟銀鼠卷

銀鼠何如永某氏。皮毛如雪秋正肥。黃粟原頭慣偷食。不知捕作貴人衣。

題蔡君謨家書

家問勤勤一紙書。榻前奏疏此權輿。直將忠孝貽千古。不獨聲名耀里閭。

又

一節功名耐久看。奉親報國寸心丹。當時閩產如公輩。尙得輸忠作諫官。

懷李亭

何人懷李弔仙靈。千載春風醉不醒。吐出驪珠二十顆。敬亭山色更青青。

祠山張廟

祠山古木庇宮庭。傳說埋藏別有靈。不見題詩羅處士。將軍對立鐵衣青。

春雨

京城春雨似江南。客況蕭條苦不堪。又報中臺除白下。諸公袞袞赴朝參。

和張毅夫右司燕集

階藥老紅春意靜。牕筠新綠夏陰閑。西垣燕集刑期措。天下安寧似泰山。相府羣英佐治安。獻酬尊俎樂餘閑。留司整暇時延佇。太液波涵萬歲山。

折枝來禽

寫生沙果似妖姝。映日紅腮霧露餘。想見江南此時景。薰風池館正臨書。

聽松樓

小樓月白奏笙簫。數樹長松倚碧霄。夜半忽驚風雨至。不須更聽浙江潮。

江鄉捕魚圖

蒼崖老樹日蕭蕭。一片秋光水動搖。漁父滿罾頭似雪。兒孫歡喜白魚跳。

又詠

中原文物說金人。二百年間墨尙新。何限江湖漁者樂。至今展卷動朝紳。

遊李氏園

小舫清遊一日閑。林亭高處倚闌干。西湖前面孤山後。水態雲容不厭看。

湖山堂

綠樹殘紅夏氣清。湖山樓觀雨初晴。水雲陰裏笙歌起。多少遊人醉太平。

六一泉

湖上興懷二百年。文章太守玉堂仙。我來醉倚長松下。三酌孤山六一泉。

過瓜洲

去年六月過瓜洲。今夏還來此繫舟。堪笑在家能幾日。一來一往白人頭。

羅稚川雪景

獨釣寒江似凍蠅。五樓千尺挂枯藤。山陰道上無行迹。林外人家雪滿罾。

赤壁圖

扁舟赤壁興飄然。白露橫江水接天。三國英雄渺何許。千秋風月屬坡仙。

又

山高月小水聲聞。二客從遊酒易醺。孤鶴橫江夜將半。羽衣入夢揖予言。

湖學感興四首

斯文行世古猶今。安定先生教育深。湖學四齋天下式。先將經義淑人心。
經殘教弛尙虛文。風俗何由使再淳。進德明明貴天爵。豈圖溫飽似庸人。
漢唐殘刻有餘妍。文定雄辭百世傳。明善固非求墨妙。蔡奸蘇節自昭然。
芹香茗水碧於藍。六籍醇醲味正酣。格物工夫精治事。莫教俗吏笑清談。

戲呈黃晉卿博士

壁水西廳國子師。天街遇雨獨歸遲。豈知不與朝參者。正是微吟睡足時。

望仙都

清溪白石樹扶疎。山骨蒼蒼潤不枯。無數花流春水出。行人指點近仙都。
嶺上嶠然一拄笏。千巖萬壑縉雲東。洞天可望不可到。石笋峨峨春雨中。

過馮公嶺

披雲橋上馮公嶺。借問何由嶺姓馮。人道馮公有遺愛。故將危嶺號馮公。

又題馮公嶺

肩輿咿嘍畫圖間。峭壁攢峯碧玉環。上到嶺頭一回首。不知身歷萬重山。

追和洞賓留題玄妙觀蕉池二首

山房不見道人回。池上蕉花幾度開。午夜雲歸秋月白。題詩好待我重來。
一氣元爲萬物胎。誰將混沌鑿分開。斷崖水石幽深處。時有仙人自去來。

車上

山川奇氣子長文。今日輿圖古未聞。行盡河流上車去。北來喜見橐駝羣。

九日書寓居壁

隨寓書齋也自奇。主家種菊似東籬。黃花爛熳西風冷。時向牕間得一窺。

又詠

破帽飄飄老孟嘉。驚逢重九客京華。故園今日知誰賞。卻傍人門看菊花。

鐵木迭兒丞相斷碑石二首

昔見忠賢鐫黨籍。邇聞奸相立勳碑。雷霆震擊分邪正。唯有蒼天不可欺。
立馬東風感慨生。桑田無定幾枯榮。權門回首如冰冷。春草離離斷石橫。

眉菴爲伯生賦三首

正色騰騰結喜緣。菴中老子卽蓬仙。長豪垂雪如羅漢。小住人間五百年。
腳踏寶來應不皺。眼生花後卻成攢。乾坤清趣無人賞。山月半輪江影寒。
取名廉甚道函三。居上無功或爾慚。千古文章宗蜀郡。眉山今日屬眉菴。

班姬題扇

漢苑秋風太液波。承恩多處怨還多。欲將心事書紈扇。時有炎涼可奈何。

徐孝子

刲股頻頻母疾瘳。徐生孝行與神謀。聖人垂訓雖殊此。叔世聞風實少儔。

鷺鷥野景

溪壑心情白雪衣。聯拳靜立柳陰微。魚蝦啄盡江南岸。卻上青天自在飛。

寒齋漫成二首

曠野蕭條河水邊。小齋獨坐對殘編。去年憐我山居索。今比山居更可憐。
月影橫牕寒雁鳴。孤眠客子若爲情。夜寒酒醒夢顛倒。或在家山或在京。

漫興二首

冷官蕭散獨徘徊。歲宴無錢買酒杯。非索薦章須廩粟。半年銅印不曾開。
大風纔定掃塵埃。糴米長鬚久未回。怪得敲門聲頗亟。不知恰有貴人來。

瓊花

碧樹瓊英護赤闌。仙姿綽約怯春寒。揚州風物猶堪畫。后土祠前幾度看。

題涿州驛

秋闈再闢喜文明。猶記河南舊驛程。慚愧白頭留滯客。又從東魯試諸生。

題崔鷄龍圖家傳二首

是非顛倒指忠邪。章蔡登庸理國家。向使公言真見用。兩宮未必狩龍沙。
龍圖直氣邁朱雲。回首東都陷虜塵。南渡百年文物盛。似茲章疏幾何人。

南歸舟中雜興七首

青青河畔野花開。獨飲香醪一兩杯。枕上有时春夢覺。遙聞天際櫓聲來。
十年不改舊官名。幾度南歸又北征。史館重來頭更白。翰林風月有餘清。
紅杏園林草漸青。牛羊駝馬亂沙汀。舟行飽飯魚羹美。落日風吹野水腥。
快意風帆去路遙。水聲浩浩似江濤。五更歸夢錢塘上。睡起不知春日高。
連日南風送北船。南船牽挽不能前。一朝也解北風轉。說與南船莫怨天。
臨水消愁看落花。賸拚一月到金華。故山歸日應初夏。綠樹濃陰有幾家。
雙飛白鷺過沙頭。隔岸人家草樹幽。歸向江南花落盡。一篷烟雨載春愁。

初度口號

今年初度喜還家。滿眼兒孫語笑譁。白髮難酬恩罔極。明年依舊在京華。

用王玉成韻題鮮于伯我五郡紀行詩二首

古錦奚囊曉出關。春歸綠野有餘閑。老農不識皇華使。按轡來看海上山。
幾迴下馬扣柴關。坐石題詩意自閑。明越天台溫處道。白雲流水萬重山。

瓊花

素質冰綃映碧空。天香夜染蕊珠宮。此花不比凡花謝。春盡仍歸闕苑中。



題泮東徐原明甫山水圖

秋老石根松籟鳴。溪橋林澗少人行。水寒不見垂綸老。惟有歸舟載月明。



3
4
2090

純白齋類稿附錄(二二)
趙待制遺稿附詞





叢書集成

初編

主編者
王雲五

商務印書館發行



稿類齋白純

錄附

(三)



3 0645 1869 3

撰助胡

純白齋類稿卷之十六

七言絕句

元旦卽事二首

再入詞林兩度春。衣冠元會物華新。青衫皓首江南客。亦是彤庭班末人。
新年佳氣滿皇州。南雁回時春水流。白髮史官幾七十。上章告老覓歸舟。

墨雨竹

江浦娟娟雨葉垂。兩竿倚玉鳳棲枝。天寒翠袖春風澁。恰似湘妃泣舜時。

寓舍偶題二首

華軒清暑思從容。朝市山林蟻夢同。深巷絕無車馬到。午牕一枕綠槐風。
傲得幽居慰客情。槐陰滿地暑風清。見人抱甕治蔬圃。卻恨歸田賦未成。

宿貢泰甫書齋二首

歲晚天寒共一觴。書齋留宿話文章。懸知二妙連床樂。翰苑瀛州日月長。
京華幾載托交深。白髮蕭蕭已滿簪。永夜書囊談未了。擁衾彷彿夢雲林。

夏日寓僧房有感三首

鶴姿豈必愛乘軒。觸械寧容老灌園。聞道朝端求治切。江南民瘼可能言。
涼生塔院竹風吹。老翠摩空峴色奇。午睡覺來成獨坐。時看一卷柳州詩。
然竹煮茶消永日。解衣坐石受清風。一塵不動天機寂。萬法何歸覺性空。

正月三日王仲能載酒同飲湖山堂二首

鳳沼新春休沐日。峇郎邀我作遨頭。也知北客三年仕。不及西湖半日遊。
小舫清尊早過湖。湖山堂上興何如。洞簫吹徹歌聲緩。春雪微微點翠裾。

過陵州

御河漾漾本蘭舟。春盡飛花送客愁。何事驅馳南又北。三年三度過陵州。

初度遊西山

水樹涼生五月秋。河邊駐馬看龍舟。幾年初度京華客。今日西山特地遊。

溪山過雨圖

從意元暉伯仲間。諸峯過雨白雲閑。江南林谷真如此。中有高人不出山。

暮冬感懷

京城風雪歲將徂。廩粟朝朝換酒壺。附火鴟蹲身懶動。豈堪弄筆畫葫蘆。

又題

朝家實錄幾回編。尸素長慚費俸錢。莫把文章修舊史。恐妨歸老臥林泉。

初度偶題

加我三年七十人。劬勞思報志空勤。行抽手板歸田里。遠碧山中有白雲。

良鄉道中

秋雨泥途有底忙。考文三度過良鄉。燕南自古多奇士。拔取弘才作棟梁。

過涿州

歸騎翩翩似水流。泥乾路穩更無憂。愧予忝薦中原士。幾度西風過涿州。

水仙花

南浦飛雲見洛神。凌波微步不生塵。梅兄琴弟雖同趣。一種風流別是春。

沃青閣

南塔前頭高閣上。山光渾似沃洲青。夜來飛雨穿牕入。翠溼華嚴一卷經。

追和荆公留題龍泉二首

千年神物疑常在。一勺寒泉永不乾。海內青苗自枯槁。蒼生空望起龍蟠。

山石靈源潤不枯。清甘爲我滌疏蘊。近來莫訝留題少。曾有金陵一句無。

東湖十詠

東湖秋月

東湖者純白老人世家之所居也。

明月高懸萬古愁。東湖碧水一天秋。倦遊老子歸來後。夜夜清光照白頭。

巖山蒼翠

巖山者逸老堂南望諸峯是也。地連永康。俗名十二巖山。多異跡。

十二巖巒列翠屏。人傳洞壑有仙靈。朝雲暮雨尋常事。萬古巫山一樣青。

南浦春流

南浦者純白老人家前之水也。其源出大盆山。春漲瀾漫。極可觀也。

沙邊遙見木蘭舟。淺渚清波漾白鷗。三月盆山春水發。滔天雪浪大江流。

禪悅白雲

禪悅者白衣大士道場也。昔延名僧居之。今廢。

昔時老衲滿禪關。幾度殘經帶月看。今日荒涼僧去盡。水牕空鎖白雲寒。

陳莊水亭

陳莊者東陽宅仁氏倉廩也。因起小亭。臨于池上。一境可觀。

黃雲萬頃覆西嶠。高臥元龍百尺樓。未必催租真敗興。自緣人物少風流。

葛圃花竹

葛圃者。界軒先生故居也。其孫夢賢善葺理。花竹可愛。

仙翁舊圃藥苗肥。竹徑幽深白板扉。春酒釀成因醉客。海棠花下倩扶歸。

秋堂湖石

秋堂者。純白老人從諸孫壽朋之廬也。昔買喬氏太湖石。運至西園。真奇觀也。

太湖奇石削崔嵬。壯觀秋堂信偉哉。米老見之當下拜。百夫輿自孔山來。

秀野沙洲

秀野者。純白老人舊園池也。盡壞于狂瀾。近年水還故道。沙漲復洲。今開爲田矣。

清泉白石化園池。沙漲泥淤復舊基。滄海桑田知幾變。故宮禾黍正離離。

西邱夕照

西邱者。東湖之西小邱塢也。自昔農人邱氏世居。竹籬茅舍。雞鳴犬吠相聞。有古風焉。

禾黍雞豚不厭貧。耕桑世業古風存。夕陽掛樹秋光老。樵擔參差下白雲。

五度朝暉

五度者。逸老堂東北望見大山是也。不知五度之名何說。其下居民多富者。

大小崑峨五度峯。朝暉暮靄變無窮。山紅澗碧人家好。簫鼓藁祠歲屢豐。
子猷訪戴

玉嶂冰溪雪後天。扁舟孤詠興飄然。當時若見戴安道。那得風流千古傳。
雪牕墨蘭

空山窈窕泣湘靈。回首芳洲杜若青。禪老揮毫真善幻。光風吹得楚魂醒。
古松

庭前挺立歲寒心。千尺蒼髯半畝陰。下有茯苓成琥珀。臥聽風雨老龍吟。
余景山枯木

千年枯木不知春。鐵鎖珊瑚古篆文。前夜太陰雷雨黑。老龍蛻骨越江墳。
庚寅歲旦

元日春回已一句。老夫就養客吳門。新年七十又三歲。後飲屠蘇望白雲。
隱趣閑步二首

野人生計在桑麻。松竹清陰處士家。山北山南雪消盡。後園日日看春花。
萬物生生造化功。園池佳趣幾人同。風輕日煖唐虞世。柳色花香杖履中。

純白齋類稿卷之十七

七言絕句

月下曲

玉地瑤階桂樹秋，綵鸞何處發清謳。
舊時庾亮樓前月，不照風流只照愁。

山行

空山窅窅人聲絕，寒日迢迢樹影移。
竹裏禪房僧不見，偶看落葉坐多時。

過釣臺

建武故人棲白雲，蒼巖峩峩水粼粼。
征帆來往桐江者，不爲虛名有幾人。

山中寒食

去年寒食西湖上，聽徹簫聲見賣餠。
可是今年春寂寞，萬山深處過清明。

聽雨

風雨對牀殊不惡，啜茗燒香閉高關。
寒聲一夜在芭蕉，明日滿山黃葉落。

和靖墓

絕筆曾無封禪草。孤山祇有一坏墳。我來參透橫斜句。何處梅花不是君。

冷泉亭

飛來峯下一泓澄。倒影虬龍蔭古藤。若使人心無熱惱。此泉安得冷如冰。

泊桐江

萬頃烟波萬壘山。幾人來往換朱顏。孤舟夜泊釣臺下。月在桐江深處寒。

禪悅庵

松下清齋共老禪。一聲幽磬出茶烟。山深春色無人見。自折巖花弄石泉。

玉繡毬二首

刻玉爲花似月圓。晴空一樹雪團團。飛來蛺蝶無尋處。絕稱豪家碧玉欄。
碎壁妝成月斧修。日光瑩潔最風流。縞裙練帔誇穠李。不見東皇萬玉毬。

尋僧

獨尋僧舍穿蒙密。冷翠重重巾履溼。水際柴門敲不開。鷺鷥飛上青松立。

鳳凰臺

江邊空臺山四圍。大書深刻謫仙詩。海隅均被文明化。祇恐鳳來人不知。

畫馬

伯樂王良不再來。空留韓筆貌龍媒。圍人飲喂殊知性。尙想開元立仗回。

渡水羅漢

錫杖浮沉浪拍天。神通萬變轉堪憐。不如歸去石橋畔。閒與白雲相對眠。

王陵母伏劍圖

寬仁必起暴終傾。多少英雄見不明。一死翻成男子事。千年生氣尙崢嶸。
瓦缶浸梅。戲成二首。

誰向寒齋伴瘦身。清泉瓦缶一枝春。金屏華屋豈不好。恐對此花無此人。
細開香雪案頭花。風味獨宜雙井茶。明月自教牕外過。只將燈影照橫斜。

桂花

金華仙子碧霓裳。夜半乘鸞上帝鄉。消受廣寒風露老。人間無地着清香。

枯木

落盡皮毛玉骨寒。無窮古怪出毫間。幸逃斤斧千年永。乞與幽人作假山。

盤菊

風驚短世制頽齡。不赴重陽晚自榮。三嗅馨香顏色好。令人長憶故園情。

畫馬

驚馬紛紛一洗空。何人貌此玉花驄。誰知萬里騰驥意。卻在奚官鞚御中。

次韻書懷

黑貂敝盡履雙穿。幾度逢人強粲然。江上春風吹水綠。歸心已墮白鷗前。

春雨書懷二首

野興飄然在綠蓑。江頭水長白魚多。閉門三日聽春雨。南浦青青恨若何。
綵筆無心賦落霞。牕間瞑坐只思家。暮春風雨寒於臆。何處園林更有花。

贈相士周可山

摩挲病眼近前看。愛我神清骨不寒。莫趁世情輕許可。野人無夢到金鑾。

送周良臣補廣東書史

重酌貪泉弔隱之。瘴烟窟裏要驅馳。乾坤一樣梅花月。不問南枝與北枝。

題良道人房

誦罷南華寶篆微。山中涼氣逼秋衣。風吹小雨妨遊屐。溼遍松雲鶴不飛。

發建康二首

青天杳杳長江北。歲暮眞州又揚州。少壯幾何悲老大。京華聊欲及春遊。
頗怪清寒似鶴身。不棲林澗走風塵。明朝又過鍾山去。山下梅花冷笑人。

寓居夏日二首

風物蕭然引興長。不知蟻穴夢侯王。屋頭千尺高槐樹。付與詩人一夏涼。
戰勝紛華樂孔顏。索居深巷獨能閑。午牕睡覺無人見。唯有清風到竹間。

題黃清夫秋江釣月圖二首

嫋嫋秋風鱸膾肥。幾迴南望白雲飛。釣竿自倚珊瑚樹。月滿江樓人未歸。
故人天子徵不起。相國新知卽賦歸。今古高風寧有異。秋江明月滿蓑衣。

都下春日卽事十首

上林車馬日紛紛。千樹紅香露萼新。亦擬看花沽一醉。未應虛過帝城春。
用不能行舍不藏。京華幾度見春光。烟消薄凍宮溝綠。日映祥雲御柳黃。
銀甕蒲萄盡日傾。流鶯乳燕送春聲。醉來箕踞梨花下。更聽琵琶到月明。
淒迷苑草無情綠。窈窕園花隨意紅。但得尊前開口笑。不將心事怨春風。
煮茗燒香破愁顏。隔牆春鳥鳴百般。中臺花木正陽艷。借與江南客子看。
乾坤生物不停機。三月正當桃李時。借問走塵投漫刺。何如對酒賦春詩。
五雲宮闕漏遲遲。上苑芹香入燕泥。想見江南烟水闊。河豚欲上荻芽齊。
五更殘月杏花枝。歸夢驚回百舌啼。曲水泛觴寒食近。傾城士女踏春泥。

無多歡意強追隨。顛倒綸巾塵滿衣。一笛春風牛背上。兔葵燕麥亦芳菲。
心清絕俗澹無言。惟有逢春憶故園。滿地梅花人萬里。柴門應鎖月黃昏。

次韻春日漫成二首

午困拋書自煮茶。東風僻巷岸烏紗。幽禽也似知春意。飛下蒼苔啄落花。
清明時節曉猶寒。輦路無塵小雨殘。愁絕春光人不見。梨花如雪在東關。

和馬伯庸送南歸韻三首

水際丹楓早晚霜。秋花無復舊時黃。北來一覺南柯夢。歸去燈前說帝鄉。
應奉鑾坡冰玉清。三長筆削眼增明。賢愚公論終難泯。留取千秋萬古名。
誰與淵明敢雁行。衣玄髮白理歸航。太平時節桑榆煖。一任幽人釣野塘。

挽三十八代天師步虛詞十首

宗風重振廣微君。叱咤雲雷走百神。精爽在天功在世。前身觀妙卽今身。
靜肅淵居答聖仁。明成邃宇奉元君。飄飄仙馭今何許。龍虎山高空白雲。
雨風雷電起青霄。妖分殲夷海沔消。自有神功侔禹鑿。底須強弩射胥潮。
濯熱誰翻馬上瓶。稿苗千里變青青。淮南黔首何多幸。迎送雲輶屢乞靈。
清淨無爲默贊堯。京畿亢旱不能驕。瑤華瑞應天顏喜。金盃瓊漿下九霄。

西沙投券鶴羣翔。水際輝輝耿夜光。填海曾聞鬼神泣。潮流深處復耕桑。
三朝異數人無並。一品留封祖有光。疇昔山林吹縞帶。翩然翳鳳廣寒鄉。
華林玄圃擅高閒。何許人來問大還。竹石雲龍俱道妙。幾多遺落在人間。
纂纂圖書垂萬籤。玄玄功行滿三千。玉棺飛出身光蛻。寶籙延生世永傳。
道館仙宮山水秋。雲車颺馭候清遊。神靈炳炳兼忠孝。合是人天第一流。

初度寓普照院

五月正當十五日。揆余初度寄僧家。廓然無物酬天地。一炷清香誦法華。

幽風圖二首

播穀執筐同永日。授衣剝棗及涼風。使無冢宰陳王業。應笑一生田舍翁。
農事開基八百齡。聖人制作自天成。萬方今日如幽俗。何幸窮經見太平。

花下口號

自從池上海棠發。終日危然坐錦窠。時舉一杯非好飲。當春不飲奈花何。

湖上

散步蘇堤消永日。綠陰古木漸成稀。西林橋上遇微雨。卻喚扁舟湖裏歸。

舊內白塔寺

江山滿眼畫圖開。廢苑秋風自草萊。輸與殘僧無一事。倚闌日日看潮來。

九日感興二首

三徑荒涼落木秋。登高時節若爲酬。自從彭澤歸來後。不了黃花一段愁。
佳節追歡老更狂。紫萸黃菊滿清觴。莫嫌醉後烏紗落。正要人看白髮長。

壽星寺

牕扉寒碧靜娟娟。野衲何知此勝緣。獨立移時清思極。直疑修竹是坡仙。

偶題

倦書投筆酒罇開。言笑春風落野梅。但怪牕前渠水滿。不知江上晚潮來。

送祝丹陽鍊師祠武當山三首

仙官通籍奉天香。萬壽貞符應武當。絳節玄旂春婀娜。木精山鬼夜潛藏。
按行福地兩鳧輕。瑤草瓊枝入眼明。欲覓還丹延短景。道人指掌授長生。
斷崖蒼樹水洄洄。鶴迹年年印古苔。玉磬風微清醮罷。天池日靜碧桃開。

和道心姪湖上三首

一片湖光靜如練。白衣大士坐中間。玉盤夜向波心墮。水冷魚沉萬象閑。
春歸落絮浮湖面。雨過新泉響竹間。滿地苔痕青不掃。結庵僧去石床閑。

老仙日日在湖山。得句蒼烟古木間。雲路不隨黃鶴舉。水軒長伴白鷗閑。
過常州

方觀魚鳥春咸若。不記人民昔盡劉。可是太平時世久。卽今風物勝它州。
子昂畫馬

松雪高人手自摸。百金市骨更收圖。祇愁伯樂不常有。天下何時良馬無。
聞進士唱名

禮樂百年全盛日。太平人物在中原。願予衰老多歸興。卻喜門生作狀元。
送劉僉事閩南決獄二首

西湖十里藕花風。江上潮生過浙東。路入閩中天氣別。火雲六月荔枝紅。
驛騎南馳亦快哉。閩山疊翠瘴烟開。旌麾郊迓皇華使。人道刑官天上來。

四月十九日恩榮宴

宰官宣押宴瓊林。拜賜恩光雨露深。何幸盛筵今再與。宮花休笑白頭簪。
示兒

衰老情懷祇自知。爾來迎我正維時。到家須及身強健。今日歸田已覺遲。
告老

秩滿詞林歲又殘。備員無補愧朝班。挂冠告老成歸計。好趁青春作伴還。

純白齋類稿卷之十八

銘類

誠銘

古昔聖賢一誠而已。與天同運。萬世如是。後之學者亦允在茲。欺僞爾屏。純實吾資。吁嗟乎誠。至德盛美。先儒有訓。不妄語始。修己治人。篤信力行。感通造化。對越神明。內觀密察。不誠無物。積實之久。表裏如一。滴水涓涓。可使石穿。惟日不已。遊乎其天。

忍銘

昔張公藝忍之一字。九世不分書獻天子。製字之義。以刃加心。譬如疾痛。允也持任。凡百憤怒。最難裁制。少忍須臾。復回元氣。惟小不忍。至亂大謀。一日之忍。千日之休。語言厲階。爭鬪興訟。力能忍之。化鸚爲鳳。凡厥不平。維忍是容。忍之忍之。福祿無窮。

看雲道院銘并序

特進上卿大宗師吳公。命其徒作道院于江左山中。表之曰看雲。志將歸也。奎章閣侍書學士虞先生爲文以記之。明理學之原。而發老易之奧。可謂至矣。金華山人胡助。輒因其緒餘。而爲之銘。銘曰。

維雲在天。萬變孰識。網緼元化。敷爲五色。或弛或張。覃及九域。風雨雷電。盈虛消息。從龍下上。神運無迹。揮手招之。歸于太極。維雲在山。翳林觸石。孤飛澹澹。千峯橫碧。若有所思。時萬時億。逍遙自在。無適非適。卷而懷之。退藏于密。同我浮遊。閑閑寂寂。維大宗師。空同老仙。山中天上。羽衣躡躡。蓬萊雲氣。輪囷後先。至陽之精。在易純乾。觀之有要。默契真筌。馮空虛躡。衆妙玄玄。左顧右盼。容與回旋。有無生滅。來往推遷。清都絳闕。一瞬千年。噫真耶幻耶。是耶非耶。吾又烏知其所以然耶。

義門銘

余聞浦江鄭氏舊矣。間嘗見其子弟純謹篤實。善守家法。信乎其能行是義也。能由是門也。則其八世同居輝光旌表。不亦宜乎。翰林揭先生旣爲之記。余郡人也。故述義門銘以美之。其詞曰。

瞻彼義門。表茲鄭氏。本源弘遠。光我閭里。闔門百口。同居八世。子子孫孫。詩書孝悌。積善之華。一團和氣。帛無私衣。食無私味。室無私財。罔間奴婢。推其有餘。鄉鄰以濟。何以臻斯。曰誠無僞。婦言不聽。躬古之義。末俗輕浮。尊卑唯利。秋毫必爭。父子情異。而况兄弟。烏得無二分房析戶。紫荊憔悴。義門崇崇。有國之制。旌之復之。以勸以愧。俗由茲厚。世由茲治。敬之保之。是在不匱。出入具瞻。安居良貴。旌復非難。敬保非易。更千百載。有引勿替。我銘義門。用諗來裔。

尙志齋銘

士之所尙。曰惟其志。其志伊何。稽古六藝。先立者大。毋局以卑。心之所之。聖賢是歸。千里之遙。始於跬步。

精踐力行。罔失厥度。車服華靡。宮室巍巍。犬馬聲色。一皆不爲。達斯兼善。窮乃獨樂。陋巷簞瓢。褐衣寬博。富貴威武。視之若無。毅然莫奪。誠大丈夫。

純一齋銘

純兮不雜。一分不分。懿矣純一。道之本原。如彼白璧。絕無纖翳。有粹其容。善養其氣。如彼流泉。滴石以穿。勿二勿三。內也靜專。聖學工夫。主于無適。霧散雲開。青天白日。有美君子。揭以顏齋。我銘章之。肅我允諧。

聽竹軒銘并序

著作王晉之居京師。銘其軒曰聽竹。而未始有竹也。或者疑焉。翰林應奉黃子肅爲記以釋之。晉復徵余銘。銘曰。

有斐君子。軒名聽竹。我思古人。瞻彼淇澳。敬慎威儀。其聲肅肅。心之聽矣。匪任耳目。是故聽于耳。不于心。吾知吹萬之非真。聽于心。不于耳。吾知抱一之在是。虛中以清。直外以勁。動而爲聲。靜而能聽。崇爾令德。消爾俗病。君子有之。性情允正。噫。光風霽月。金玉其音。坐進此道。萬古一心。

太一舟硯銘并序

戶部員外郎楊君友直善隸。八分。曩爲石氏書先碑。得蓮葉硯一枚。其製精奇。蓋古物也。字之曰太乙舟。俾予銘焉。銘曰。

斲山骨。製蓮葉。成硯池。貯風月。玉井潤。華峯秋。千古意。太乙舟。蓬萊近。雲氣浮。助揮灑。勝蛟虬。昇之誰。玉

堂仙照青藜草太玄。

筆銘并序

筆於文房厥功最鉅。韓子傳毛穎述其世系封爵勳烈特詳。故不復云。余謂臨池之學非佳筆不可也。紙與墨誠次之。何則。今有李氏烏丸蠶繭玉板而中書君不中書。安能造鍾王之妙。追顏柳之奇哉。昔人謂筆之壽以日計。固然亦孰知有類夫人之道者。方其始用也。尖圓甚銳。未易屈伏。一揮千言。不挫一毫。如人少年志氣方盛。馳騁英武。勇於敢爲。此孫伯符下江東時也。迨其剛銳少斂。鋒藏不露。入手純熟。宛轉適意。如人壯年。更變旣多。慮患益深。舉無遺策。此子房遇圯上老人。後佐漢謀楚時也。及其旣退。鋒偏髮禿。畫一成二。欲左而右。不稱任使。如人暮年。精力已衰。百病呈露。此廉將軍三遺矢時也。嗚呼。余好工書。故能知筆之利鈍如此。且感其進退始終之道。與人合。乃爲之銘。銘曰。內剛外圓。其用不息。始銳終鈍。敗于饜墨。運諸掌握。惟意所適。天祿石渠。嘉乃丕績。顏筋柳骨。心維正直。書匪徒書。允觀厥德。

芳遠堂銘

伊古君子。學以修身。馨香令望。百世攸聞。譬諸草木。惟其所好。物由人顯。妙契斯道。楚澤之蘭。佩于靈均。豈以幽寂。而泯厥薰。濂溪獨愛。亭亭淨植。香遠益清。懿哉無極。東籬之下。采菊悠然。令名芳節。垂千萬年。亦有梅花。處士是似。冰玉其芬。歲寒擅美。觀是四者。永懷其人。邁往千古。其何能臻。仁熟善積。樹藝不息。

流芳之遠，允符爾德。

省心齋銘

維人之心，通貫古今。無遠弗到，無近弗臨。大包宇宙，細入微塵。虛靈不昧，是曰天君。賢愚善惡，悉由此分。放而不收，爲厥心病。省之有要，操持一敬。垢去鏡明，潦澄水瑩。潛思密察，恆守中正。其用無方，物來能應。

敬止齋銘

君子之心，止乎一敬。純粹無雜，清明有定。大學至善，中庸至誠。始焉致力，終也安行。君子之學，敬其所止。居之不遷，儼思若是。揭以顏齋，修息允藏。如臨上帝，視此銘章。

惟善銘

惟善爲寶，賢人是好。虛靈不昧，知止深造。忠以事君，孝以事親。萬物備我，一視同仁。內主乎善，外邪莫入。奉之如師，服膺勿失。嗟惟此寶，人孰無之。不有其寶，溺於己私。所寶惟賢，明德至善。誠身謹獨，罔間隱顯。所寶惟善，樂莫大焉。一動一靜，希聖希天。

時思銘

仇氏得姓，爰始春秋。宋大夫裔，世居陳留。厥後遷徙，自西徂北。維高維曾，顯于金國。曰祖曰考，仕我皇元。衣冠積善，慶綿子孫。追榮三品，祭祀備物。焄蒿悽愴，孝敬誠一。神靈如在，昭格時思。永久勿替，刻此銘詞。

虛齋銘

君子齋居。心兮孔虛。存誠默太極之初。靜而動妙化之樞。靈明空同。善應容物。八牕玲瓏。一掃滯窒。光風霽月。悠然在室。庶幾坐忘。匪事外馳。研硃默易。觀象玩辭。無中生有。親見庖羲。

頌類

慶雲頌并序

皇朝將作匠善織御容。其工妙非繪畫所及。前古未之聞也。泰定二年冬十一月。英宗皇帝御容既成。有旨奉安于萬安寺。越辛酉。丞相率百僚備儀仗導引。綵輿之次。教坊樂作。而慶雲見。中書參議臣王士熙作頌。以紀盛美。而草野臣胡助竊獲觀焉。其頌之序。有曰。昔至治元年。百官迎仁宗御容至萬安寺。慶雲見。英宗命翰林學士元明善贊之。小臣嘗載筆太史。今預中書謀議。目擊心悚。盛美不可以不志也。嗚呼休哉。昔助嘗館於元氏。而參議故所交遊。知其家學淵源。實擅太史公瑰偉者也。助雖種學有年。而不獲備太史氏之灑掃。將老矣。覩盛典。技癢于中。若夫肆芻蕘之歌詠。以待上之采擇。是亦詩人之義也。遂作頌云。詞曰。

穆穆帝容。於赫在上。昭回爲章。時降時享。奉安卜吉。爰奏鈞韶。普天同慶。有雲佇霄。五色流麗。非烟非霧。炳煥郁紛。輿衛是覆。惟昔仁廟。徵祥若茲。前聖後聖。一揆同歸。丕續皇元。河清海晏。式符昌運。歷年億萬。兩朝載見。太史屢書。野人作頌。播之康衢。

傳類

大拙先生小傳

大拙先生者。湖海士也。姓陳氏。名信逸。其字自號大拙。人稱爲大拙先生。不詳其鄉里世系所出。或云潮人也。常往來蘇湖間。窮山水之勝。先生貌清古。瘠而長。雙瞳炯然。若方外士。性恬澹。無機心。溫和樂易。不作崖岸。見人有善。亟稱之。恆以孝悌忠信語人。獨好儒學。能文章。喜爲詩。且善書。有晉人風致。人或求其書。輒揮灑不倦。求詩亦不辭。江湖間。邈邈傳其所作。微好飲。酒量不弘。醉後喜誦陶淵明歸去來辭。蘇子瞻赤壁賦。慨然慕其人。間與釋老二氏游。而不崇信其法也。年踰六十。髮不白。齒不衰。若四十許人。行步如飛。屢遊京師。若有爲者。然未始交權貴人。每於稠人中有所注視。或疑其善風鑑。扣之卽拂然怒。嘗自吟大拙詩曰。我有大拙。知巧滅絕。不貴王侯。不愛田宅。衣冠不飾。飲食不擇。五湖四海。到處爲客。一片襟懷。風清月白。世莫測其何如人也。先生與蘇人錢翼之好。錢予友也。爲余言先生大略如此。蓋有道之士也。又曰。先生昔在維揚。見予殊喜。且謂予外秀內純。庶幾可學道者。惜乎其汨沒塵埃。而不知返也。予聞悚然異之。願恨不獲執鞭下風而請教焉。於是追錄錢語。爲作小傳云。

胡子曰。余觀先生之爲人。是亦不夷不惠之間焉爾。大拙自吟。蓋有見也。至於數造京師。夫何爲哉。得非濟世之心。未能忘諸。嗚呼。若先生者。古之隱君子之徒歟。助旣傳大拙先生之事。或者疑焉。今特進上。

卿大宗師看雲老人吳公見之甚喜。爰命裝潢一卷。俾其徒之善書者書焉。且賦律詩題于後。館閣羣公亦爲著語。於是大拙之名。傳播京師。助也倦遊老矣。將歸故山。他日或因錢君幸獲一見先生於廣莫之野。出此卷誦之。寧不爲之捧腹絕倒。其亦拙者之遭耶。

附傳

有小拙先生者。容貌性情學行。大抵與先生類。喜詩攻書。嗜酒又同。不交權貴。不務貨利。不事莊飾滋味。亦同稱胡公。不知何許人。喉中作吳越聲。再官京師。秩三百石。官小史氏。舉相似與先生處。淡然天遊。遠去晨夕。夢想未嘗不神交也。慕魯連爲人。頗憂人間事。願謹職業。年踰五十。鬚髮盡白。身長八尺。量差小。時人稱爲小拙先生云。

純白先生自傳

純白先生姓胡氏。名助。字履信。一字古愚。婺之東陽人。上世來自霽川。有諱神者。爲仙居令。始南湖居焉。高祖諱翱。爲寧都尹。捨西山宅建寺。乃遷東湖。曾祖諱居仁。任學諭。從東萊呂成公學。與葛端獻公爲友。祖諱中行。隱居行義。鄉稱善士。父諱祐之。宋鄉貢進士。用薦者授廸功郎。辟史館實錄院主管文字。今贈承事郎祕書監祕書郎。從子請也。先生幼穎悟。性淳樸恬靜。無機心。弱不好弄。稍長。唯善讀書。自以早失怙恃。孤苦刻志樹立。所居山野。去城府稍遠。獨學無友。里人咸笑其迂。凡經史諸子百家之言。悉究其大旨。而不屑屑爲章句學。嘗讀論語。至君子食無求飽。居無求安。敏於事而慎於言。就有道而正焉。可謂好

學也矣。及士志於道，而恥惡衣惡食者，未足與議也。喟然有省，遂致遊遠，求天下之奇文壯觀，平居酷好韓文，未嘗一日不觀。詩好淵明、山谷之詩，怡然自得於心。聞子昂、趙公以書名世，故亦習晉唐人書，得其法，年踰三十，郡舉茂才，爲教官，行中書授建康路儒學學錄。建康六朝故都之地，今行臺治爲監察御史，日至汴宮，勉勵諸生，先生之爲學官也。實兼太學齋訓導。凡御史臺郎子弟悉從授書，去後登科入仕者衆，其最顯者，前中書左丞呂仲實、江西監憲劉伯溫、遼省參政廉公亮。今禮部尙書趙伯器是也。治書侍御史趙公子英、監察御史周公景遠、禮部尙書曹公克明，皆一時明德，最相知。周御史薦江浙士之博學通經能古文，宜居館閣者七人，首胡石塘、徐方谷，而先生與焉。故侍御史劉公輔之，時爲臺郎，贈詩有曰：作者七人，爾君才十倍加。士大夫欣豔之，會司業吳草蘆先生南歸，過金陵，見先生所爲詩，大加稱賞，列在上品，由是名振一時。實皇慶初元也。明年科舉開，臺章例格不行，復就行省，調美化書院山長，考滿赴禮部選，再遊京師，見知於翰林學士元公復、中書參政王公繼學、翰林侍講袁公伯長、虞公伯生、集賢學士貢公仲彰、御史中丞馬公伯庸、國子祭酒宋公誠甫，皆待以奇士。而於繼學公尤深知，日相唱和，俾二季從游。既授溫州路儒學教授，需次差遠，用諸公薦，改翰林國史院編修官。至順初元，從虞學士分院清署上京，虞公爲表先君之墓而銘焉。今刻諸石，秩滿久之，又以例格保舉，調右都威衛儒學教授。衛文廟在涿州新城白溝之澚，昔者宋金之界，其地荒涼蒼莽，皆屯田士伍羽林老兵之居，無所事教也。秩滿再任國史院編修，會修遼、宋、金三史，議者謂先生宜秉筆，而一時後生奔競圖進，挾勢求爲之，中書總史

事者。往往視人情。選擇非才。貽笑當世。同僚有不平者。率先生上言辭職。先生因曉之曰。修舊史。故史官職也。然用否在朝廷。昔之爲史者。不有人禍。必有天刑。甚可懼也。且以昌黎公職在史官。而不肯爲史。况我輩耶。是宜退避。何庸較。同僚服其言。識者韙之。秩滿授承事郎太常博士。年幾七十。竟告老於朝。致仕以歸。實至正五年也。先生凡兩任史官。適遇大比之歲。三中書選。爲河南山東燕南鄉試官。所取多得人。於河南得余廷心進士第二。烏希說張約中。爲時聞人。燕南得張仕堅進士第一。先生貌清古。氣稟雖弱。而善自調理。少疾病。絕嗜慾。平生誠實無僞。見人有善。亟稱之。與人交淡而久。人益敬之。素薄世利。故於人無怨惡。若釋老二氏之學。亦知其微而不惑焉。嘗著大拙先生小傳。寓言以自況。又取莊子漢陰抱甕語。自號純白道人。初在山中所作。曰巢雲稿。至建康曰白下稿。往來京師幾三十年。有京華雜興。上京紀北遊前後續稿。命子編集合三十卷。名之曰純白齋類稿。觀其文。可以知其人。或譏先生好文辭。而懶著書。先生聞之曰。道六經而文不六經者有之。未有文六經而道不六經者也。道其體也。文其用也。體用一原。文所以明乎道者也。斯道也。自堯舜禹湯文武周公孔子顏孟。旣沒而不得其傳。至宋濂洛諸大儒起。唱鳴道學。以續其傳。南渡朱張呂三先生繼起。私淑其徒。相與講貫。斯道復明。而朱子晚年。又集諸儒之大成。然後聖人之道。昭揭日星。諸子百家之言。折中歸一。如水赴海。學者唯當服行而已。若夫近世著書之士。徒剽竊古人糠粃。或執己見。穿鑿其說。是書之蠹也。何補斯道邪。先生旣歸數年。兩霑賜幣。顧鄉里舊友無在者。若文懿先生許益之。翰林柳道傳。禮部吳正傳。修撰張子長。皆繼死。不能不爲之興懷傷感。

獨侍講黃公晉卿，巍然靈光，又不能時相會聚，可勝歎哉。今先生年七十三，康健如少壯，耳目聰明，能寫細字，手不釋卷，可謂老而好學者也。先生凡兩娶，皆陳氏，贈封宜人，俱先卒。子二，長璋，遼陽儒學學正，輒棄去，隱居治田園。次瑜，廢賀州通判。女一，適温州陰陽學正陳樵。孫男六，長應文，習進士業。次朋壽，衢州路學正。學博，修齡，本縣訓導。科傳，奕壽，女孫五，長適許繼祖，次適何陶民，次天，次許適陳，次幼。二子爭欲迎養，奉甘旨，而先生反不樂，獨居故廬，冰雪一榻，自奉如深山道人。茲所以壽未艾也。術者或謂可望八十，雖有命詎可必哉。於是輒先命戒二子曰：我死，斂以時服，不得用浮圖氏作佛事，蚤營墓地，或附先隴，不拘陰陽。若違吾言，是爲不孝，亦不必求人作行狀墓銘。故吾自爲之傳，以遺後之人云。

桂坡李至愚先生期頤傳

洪範敍五福，一曰壽。夫以壽居五福之首，是豈易得哉。古人謂壽有上中下三品焉。百歲曰期頤，上壽也。九十八曰大耄，中壽也。七十六曰老耄，下壽也。傳曰：仁者壽，不可誣也。大抵古者風氣淳厚，人多上壽。後世風漓俗薄，七十者稀。韓吏部諫佛骨表，歷言自古帝王若黃帝、堯、舜、禹、湯、文、武，年皆百餘歲。是時百姓安樂，壽考中國未有佛也。漢、魏、宋、齊、梁、陳之君，事佛漸謹，年代猶促。梁武雖壽，餓死臺城，事佛求福，乃更得禍。可謂篤論。韓公又銘李于之墓，歷數當時六七貴公，好服餌，金石之藥，希望長生，反得疾速死，以爲世戒。由是觀之，異端信無益於人，而世俗猶酷事佛，老以祈福，壽是惑也。吁！凡人壽夭，固繫於命，然養生愛護，亦必有道。譬如密室之燈，風簷之燭，明滅遲速，何可同也。孟子曰：養心莫善於寡慾，延壽之道。

無踰此矣。今吾里有百歲之老，而世罕知之者。予既慨其生不獲旌表於門，又懼其將泯沒於後，作期頤傳。先生名寓，字至恐，一字至隱，姓李氏，東陽人。故宋工部尙書、寶謨閣直學士、大同之從孫也。生於嘉熙元年丁酉十月二十三日。性恬澹質直，習詞賦，舉進士不第，入國朝不仕。日以文史自娛，年已九十餘，耳目聰明，手不釋卷，行不扶杖，齒牙不衰，鬢髮不白。熙熙然如少年，可謂知其所養。鄉閭見者皆曰：異人也。縣令許君思，獨尊敬加禮，求其衣而衣之。間請問爲政，輒直言其非，勉以廉幹，許益敬之。翰林待制柳公貫賦詩爲先生壽，且欲請易所居坊爲期頤坊。會乏賢令，不果。易數沾賜帛之恩，壽一百有一歲卒。時至元丁丑二月二日也。有隱居雜稿一卷，藏于家。娶石溪徐氏，子二人：長泳，年七十三先卒；次埜，年七十餘，無嗣。孫男二人：曰仕道，曰安道。曾孫男五人：真、桂、元、蘭、蕙。於戲！三代盛時，養老之禮備具。王制曰：問百年者就見之，惟恐其勞，欲其安也。今夫麒麟、鳳凰、醴泉、芝草，世稱瑞物。黃耆台背，享期頤之壽者，亦曰人瑞。若先生是也。贊曰：百歲之老人中之瑞，五福之家，天爵之貴。峴山畫水，間氣所鍾。曠世一見，千里聞風。

廉侯遺愛傳

婺之支縣曰浦江，自入國朝以來，凡所更長官二十餘人，求其德政愛民與古之魯卓並稱無愧者，今惟見廉侯一人而已。侯名阿年，八哈，一名浦，字景淵，北庭人也。從祖希憲，爲至元名臣，有大勳勞於國。官至中書平章政事，封恆陽王。通孟子學，人呼爲廉孟子。祖希恕，中書右丞，封齊國公。父忍都，八哈度卿。世以清白相傳。侯幼穎異，絕無貴介華靡之習。年二十餘，卽入宿衛禁中，旋以世賞授官。來爲浦江縣，達魯花

赤下車視事。卽訪民利害。而興除之。浦江爲邑。在山谷間。稅糧舊輸之本郡。近年撥輸建德。建德雖與縣境連。而崇岡峻嶺不可通。貞荷之費。數倍於前。民甚患苦之。侯力稟憲司。獲仍其舊。民皆鼓舞相慶。賦役不均。吏並緣爲奸。是故貧益貧而富益富。侯察知之。日夜思惟。以救其弊。會憲司行隨產當差之法。他州縣皆別避官。獨浦江就委侯行之。蓋素知侯廉明正直。足以登厥事。侯亦感激。益行素志。集耆老於庭。備詢其詳。令民自實其業。用宋咸淳冊爲之根柢。命里長履畝而推正之。及命鄰都覆覈。侯躬校簿書。正其是非。斥其隱蔽。更造冊籍。粲然明白。積年之弊不可去者。一旦盡除之。然後依糧定役。咸服平允。小民德之。不啻如病而得瘳。如旱而獲雨。侯明敏絕人。加以仁愛。凡民有訟。洞知其情。委曲戒諭。使之自新。不得施刑法。吏不敢欺。民不敢僞。縣舊用胥徒追迫。叫囂墮突。鷄犬不寧。侯悉革去。第令里長呼之事。無不集。侯初至。見學校不治。大懼無以成人興化。卽覈學田。葺齋舍。禮致儒士。俾弟子員肄業其中。公退輒詣倫堂。諄諄勉勵。又俾各社延師。以訓童稚。絃誦之聲。達乎四境。侯每歲親行郊。勸其農人播樹藝。于今三年。皆底厥績。譙樓及戍營將壞。侯爲修理而一新之。鄉先生柳內翰有遺文廿卷。藏於家。未能刊布。縣之圖經。久且未續。侯命文士撰述成篇。復皆捐俸爲倡刻。置學宮。其表厲斯文意。有非區區俗吏所能及也。武川民素譁爭。譁爭起禍在不測。部使者賢侯之行。俾聽治之。侯發其隱伏。民皆服罪無冤。一縣稱爲神明。及其歸也。歌謠載路。江東有警。隣縣惡少年欲乘勢剽掠。人皆震恐。至有挈妻子逃山谷者。侯爲保甲之法。使得互相拯援。復揭高竿於四門。設有亂者。暴其屍以徇。侯親部士卒。持弓巡行鄉落。遍告以用法之。

意民皆帖帖。此侯之治績尤著者。侯其愛民切切在念。無斯須忘去。鬚髮爲白。故民得安其生。輸賦稅外。毫髮無他費。聞侯之去。皆相顧如有所失。或塑像而立生祠。或植碑以表不朽。見者咸慕以爲前此未之聞也。侯治縣三年。廉介自守。始終如一。雖齏鹽不給。而處之晏然。善談論。援引明切。動合古義。聽者悚然起敬。傳曰。君子學道則愛人。詩曰。豈弟君子。民之父母。其侯之謂歟。里父老相與謀曰。侯今去矣。其德澤在人心。遺愛在田里者。及吾之身。固思之不忘也。將如後人何。曷屬諸立言之士。書之以垂來世。皆曰然。於是介戴良。具政蹟。使來東陽。謁文於胡助。助竊聞之。樂道人之善。而可以爲世勸者。春秋之義。君之事也。矧侯之善政。彰彰若此哉。是何敢辭。故爲之述。遺愛傳云。贊曰。今之邑。古子男國也。禮樂刑政。教化之具。咸在焉。顧施用何如耳。廉侯年不先人。德不後人。春生秋肅。冰清玉潔。綽有古循吏之風焉。非獨浦江之民。懷遺而不能忘。若隣封之間。亦感其聽斷之公。歌謠載道。非其家世之懿。材識之周。決不能致於是也。嗚呼。廉氏世有其人哉。太常博士東陽胡助述。

純白齋類稿卷之十九

贊類

皇朝元會板位圖贊

侍儀舍人王士黈精思爲是圖。屬永嘉郡文學東陽胡助爲之贊云。

皇朝元會禮樂盛美。越古冠今。錫福受祉。崇天闔闔。大明臨御。億兆臣工。旗甲拱衛。虎豹獅彪。列置其外。儀仗繽紛。精密妍麗。旛扇麾幢。旌節斧蓋。穆穆四門。前後對啓。日精月華。鳳儀麟瑞。東西兩樓。禮物攸止。內外將軍。左右護尉。雲和令丞。絲竹鼓吹。糾肅班聯。起居黼辰。文武千官。咸有定位。宣贊承傳。音吐弘偉。拜舞周旋。山呼萬歲。職司侍儀。恭事殿陛。導引升降。目擊心醉。敬列爲圖。昭示永世。廣文作贊。敢效狂斐。

真西山小像贊

乾瀆正緒。斯文未墜。考亭旣沒。西山起繼。惟西山公。國之元氣。忠君愛民。懇懇獨至。高牙大纛。仁風滂沛。金馬玉堂。淋漓草制。將登政府。參贊補綴。夫何衰運。天奪其志。讀書之記。大學之義。伊公平生。羽翼六藝。形于小像。德容溫粹。門人寶之。一瞻三喟。

張夢臣真贊

光嶽氣全。金玉輝潤。大魁天下。開先文運。偉人物之山立。蓋羽儀乎天朝。卽之溫而德厚。使人之意也消。若夫爲時宗工。士論無異。文衡旣執。經筵亦侍。置之玉堂。則代言潤色。鼓動風雷。旌潛誅回。海立山嵬。擢之臺憲。則威嚴不迫。奸邪褫魄。冰潔霜飛。乾坤清夷。委之廊廟。則斷斷乎操宰相之方。拳拳乎用人才之良。至於垂紳正笏。不動聲容。安九鼎盤石之勢。收千載真儒之功。是安得不使海內之士。倚之若中流之砥柱。而障百川之東也耶。

仇公哲眞贊

陽剛之蘊。溫粹之容。峨冠佩玉。臺閣清風。有爲有守。才宏氣充。如水行地。如雲在空。無適不可。惟其所逢。措諸事業。式昭顯融。

古佛像贊

伊維古佛。從何而出。相本心生。故作是形。偏袒赤腳。眞體如如。吁豈非西方聖人之徒歟。

南極老人贊

維南有極。奕奕明星。昭回雲漢。老人之精。氣化網緼。胚胎萬古。允昌斯世。實曰壽祖。

仇公度山林小像贊

山靡靡兮圍青。雲英英兮飛瓊。水蒼蒼兮古色。泉泠泠兮懸石。若有人兮其中。曰工部兮仇公。峩冠巾兮野服。撰杖屨兮林麓。澹容與兮逍遙。何風度兮孤高。脫紛華兮違俗。一琴一鶴兮自足。

簫鶴埜真贊

東州之裔。西蜀之壘。武功積世。偉偉堂堂。劍佩珪璋。氣超龍驤。滿月面相。詩書名將。漢唐之上。雲臺凌烟。丹青是然。久載彌傳。

純白道人贊

純白道人者。胡履信父之別號也。其平居好讀老莊書。因取莊子漢陰丈人論。抱甕灌園語。以爲號焉。且自贊之曰。

若有人兮。古之愚。純白備兮。機事無。氣冰清兮。湛雙瞳。養其內兮。忘外趨。吟風月兮。薄萬古。視天地兮。同蘧廬。知我者以爲金華山牧羊之徒。不知我者以我爲詩人之流。章句之儒。吁。其竟何如。世人烏得而識諸。

達摩贊

對者不識。識者不對。若不渡江。幾乎狼狽。

如愚贊

余少年讀書山中。嘗顏所居之齋曰古愚。因自爲之記。及來京師。與今平陽守仇公公度相知甚厚。公是時亦號古愚。其後敷歷中外。宦業益著。涉世益深。若以古之愚爲不足於世用。而更號如愚焉。前中書左丞許公可用。又從爲之贊。而敘其故。且謂以古愚之號。獨歸於其友胡助。而許公特善發明其說。

僕竊愧甚。於是拾其緒餘，亦爲之贊云。

伊古之愚，直哉惟迂。伊今之愚，詐則有餘。不古不今，終日如愚。希我先師，庶幾世儒。有不愚者，實兮若虛。學貴乎內，外名曷拘。曰古曰如，疇敢齊驅。嗚呼如愚，其顏氏子之徒歟。

別峯法師眞贊

微笑之容，說法之相。披金欄衣，啓華嚴藏。洞徹三觀，掃空諸妄。噫，飛來千仞，別峯青。明月清風鏡湖上。

古賢贊并序

始余作古賢贊八十一首，小子瑜輒就吳興刊板，而以書來言曰：古賢尙多顯者，大人筆力有餘，請更作幾首，以遺子孫。何如？余從其言，復作廿九首，通一百一十首。然亦豈能盡哉？初非有去取之意於其間也。不過乘興自適，卽其事實之大略而爲之耳。雖然，知我罪我，恐不滿大方一笑也。

陸賈

乃公天下，馬上得之。每秦新語，輒爲解頤。縱橫餘風，遊說奇術。臣服尉佗，交歡平勃。

周亞夫

細柳屯營，將軍號令。介冑不拜，乘輿加敬。可屬大任，由是簡知。平吳楚亂，用兵出奇。

申公

蒲輪安車，迎聘老儒。大開明堂，會議石渠。帝方尙文，首問爲治。不至多言，力行何事。

魏相

厲精核實。漢宣中興。同心輔政。丙魏齊名。丙尙寬大。魏尙嚴肅。寬嚴相濟。致治多福。

黃霸

潁川之治。首漢循吏。教化旣行。鳳凰斯至。宜舉是心。充養加諸。胡爲相業。治郡不如。

卓茂

盛德寬仁。善教化民。居攝病免。冥羽潛鱗。建武中興。表賢拔俗。首拜三公。四方悅服。

竇融

河西五郡。保全歸美。帝賜璽書。明見萬里。入朝受封。升拜司空。念非勳舊。益事謙恭。

馮異

大樹將軍。屢建勳功。赤眉敗走。平定關中。蕪羹豆粥。滹沱麥飯。倉卒厚意。毋忘患難。

袁安

大雪天寒。高眠閉戶。墊居俟時。憂民疾苦。外戚擅權。天子幼冲。漢廷恃賴。司徒袁公。

羊祜

輕裘緩帶。晉朝元戎。滅吳之志。身後成功。山因人重。湛亦不朽。遺愛墮淚。碑存峴首。

杜如晦

貞觀初政。良由房杜。善斷嘉謀。亦莫予侮。勤勞無迹。丕顯功名。帝念同佐。獨見玄齡。

姚崇

鸞臺鳳閣。雅志從容。應變成務。立羣枉中。明皇賢輔。史稱姚宋。允矣救時。世方管仲。

張巡

飲血登陴。裹瘡力戰。士卒同心。外無救援。孤城死守。雙廟生輝。彼全軀者。猶議其非。

李光弼

臨淮嚴重。武略英雄。中興唐室。郭李同功。吐蕃入寇。遷延有憾。擁兵不朝。麾下疏慢。

李晟

將兵擊泚。天生西平。肅清宮禁。收復京城。功在社稷。信讒猜忌。吐蕃劫盟。馬渾羞愧。

李泌

白衣山人。萬乘賓友。弘濟艱難。無屈其守。陳五不可。因請歸山。晚爲良相。薦賢好仙。

段秀實

吾戴頭來。就死見義。奮笏擊泚。忠烈名世。賣馬市穀。代農輸租。公論詰責。恨死武夫。

楊綰

議貢舉法。三代遺風。典選平允。分直不容。登庸制下。悉從清儉。天邊奪之。相業未遠。

曹彬

飛龍見知不欺其主。位高志下。寵厚憂鉅。平吳降蜀。勳業最隆。出將入相。善始令終。

錢若水

華山隱者。擁爐畫灰。熟視良久。不語如雷。雖有道骨。功名方逼。急流勇退。仙做不得。

呂蒙正

清修苦學。風雪貧居。大魁天下。三入中書。朝士失言。置之度外。薦姪爲相。儲才夾袋。

李沆

謹重雅望。識高厭榮。日奏水旱。防欲未萌。手焚御書。册妃寢議。難居人上。夙知丁謂。

王旦

三槐德符。天定必取。善決大議。愧服夷虜。太平賢相。委任獨專。福祿榮名。十有八年。

張泳

剛毅鐵石。自號乖崖。善臨方面。安反側懷。庶幾孔明。法嚴治蜀。二公遺愛。千古尸祝。

林逋

咸平處士。獨愛梅花。一童一鶴。雲水仙家。千古真風。清言知道。孤山有墳。封禪無橐。

魯宗道

太后臨朝。屢有獻替。諫立七廟。三從尊帝。魚頭參政。骨鯁可知。市飲微過。事君不欺。

胡翼之

承繼洙泗。開先濂洛。天子辟雍。取法湖學。議樂侍講。海內尊師。先生道德。歐公表之。

范鎮

開端建儲。濮議不屈。力詆金陵。勇服君實。平生同傳。後死者銘。論樂終異。乃見真情。

包拯

龍圖京尹。政號神明。小夫賤隸。皆知姓名。彈劾權貴。澄清輦轂。遺風凜然。謚爲孝肅。

東李李至愚期頤先生贊

百歲之老人中之瑞。五福之最。天爵之貴。峴山畫水。間氣所鍾。曠世一見。千里聞風。

題跋類

題黃清夫耕雲釣月圖

秋谷耕雲者。相國李韓公也。秋江釣月者。處士黃清夫也。韓公爲天子之宰。有大勳勞。忠於君者也。清夫山林之士。以耕釣養母爲悅。孝於親者也。昔者見知於相國。長揖而去。不以功名富貴介心。相國旣贈以詩。且欲友之而不可得。其志節之高可見矣。然則相國之於處士。其貴賤雖不同。而忠孝之道一也。子昂

以翰墨之美爲之屢書。而在朝之大夫士詩之序之詠讚之者至矣。處士果何求哉。雖然當是時。韓公身任天下之重。厥後危機岌岌。固有不得遂其耕雲之志者。而今又何如也。曷若處士老而不衰。脫屣榮名之慮。而天固益予之壽考。使得優游釣明月於秋江之上。獨擅清樂於無窮。宜其不以此而易彼也。故爲題其末。

題羅進士墓誌銘

余友羅以誠之先大夫進士君。得銘於翰林侍講揭先生。而浙省平章康里子山大書焉。進士君道學之裔。孝友之行。貞遯之風。揭文實善形容發明。而子山公之書擅名一世。追跡鍾王。龍蛇飛動。未嘗輕與人寫。是足爲進士君不朽之傳矣。然非以誠篤於顯親揚名知孝之自。亦何能得二公之文之書若此哉。況以誠由教官歷仕佐縣治有年。今將告老。越在六品。而地恩之典。進士君當得贈官。又松楸泉壤之光也。嗚呼休哉。

跋王宗甫臥雲集

昔大宋渡江後。東陽人物文章最盛。英偉卓犖之士輩出。若臥雲先生王氏亦其一也。然國朝混一逾七十年矣。故家大族往往彫零殆盡。能有不墜先業者幾希。一日希白甫攜其先世臥雲遺稿一編示余。予斂衽讀之。慨其學問淵深。才華浩汗。耿介之懷。忠義之氣。凜然詞語間。觀覽者尙可想見其風烈。雖其篇章頗多殘缺。然詩之傳世。初不貴乎全也。矧一時名公鉅卿悉與之交游唱和。裕齋馬公爲之序引。稱賞

至矣。嗚呼。君子傳業。尙論其世。讀其詩而不知其人可乎。玩味之餘。輒識其後而歸之。

跋陳氏義庄記

右放翁與東陽呂子益書一紙。後二紙則翁二子之書也。於此知子益交翁父子間爲甚厚。而翁父子之待子益亦不薄也。前輩典刑。尙可想見。子益名友德。東陽故家。宋嘉定十六年蔣重珍榜進士。官未甚顯而歿。翁書所謂義庄記。乃爲吾里路西陳氏作也。記後一節甚有發明感慨。意此公所自得也。嗚呼。今義庄已廢久矣。余甥孫呂子明於子益爲六世孫。獨能寶藏此帖。出以示予。求識其後。故爲書云。

題竹隱老人

右竹隱老人潘公七進辭圖一卷。李伯時龍眠筆也。辭語簡古。畫意精妙。誠二絕也。老人之七世孫。爨出示助。斂衽以觀。肅然生敬。自宋季至今。諸名士議論發明略盡。殆無餘蘊。蓋老人以默成先生爲之子故也。或疑作圖時龍眠已病。恐非親筆。豈其子弟耶。或謂老人隱憂時事。寓意於辭。庶幾得之。或以爲漢末陳太丘。荀朗陵兩家似之。然陳荀氏子孫貴顯失節。不滿先儒之論。而默成先生正色立朝。清修苦節。一世師表。卓乎其不可及。此文公朱子之所深敬無間然者。非陳荀氏子孫比也。若夫廉頑立懦之風。不徒學士大夫之所景仰。而小夫賤隸亦莫不知清潘之爲貴矣。嗚呼。休哉。爲子孫者。第謹守家法。斯足爲前
人光。又何暇區區上文辭者之表章哉。助不佞。輒書所見如此。

跋余廉訪所篆東浙第一家五大字後

至正己丑夏。余闕公自翰林待制。來僉浙東海右道肅政廉訪司事。明年庚寅夏六月辛丑。行縣至浦江。察知鄭大和累世義居。謂海右七郡。未能再見。書五篆文以嘉之。秋七月甲寅。縣達魯花赤廉侯阿年八哈。縣尹奉符郭侯復亨。縣主簿大梁劉侯師稷。相與樹碑于庭。成公意也。公唐兀氏字庭心。余闕其名也。正統甲科進士。文學政事。皆爲世所稱云。

碑銘類

重修雙林禪寺碑銘

雙林寺者。善慧傳大士開山道場。浙水東大刹也。按大士出世修行。始結茅雲黃山。燕坐雙檮樹下。說法度人。靈異神通。不可殫述。當梁武帝盛時。教法顯揚。開龍華大會。建立寶刹。是名雙林。事具徐陵所製碑。由梁至今。且九百餘載。無怪庠培廟之屢廢而屢興也。宋宣和中。睦寇孽火。寺宇煨盡。皆爲丘墟。紹興初。刪定賈公廷佐。始範洪鐘。建三藏殿。住山標禪師募緣修造。宏傑偉麗。紫微潘公良貴記。大士殿書其蹟。可考也。由是歷年百有五十。而入國朝。又已七十餘載。世異事殊。法席虛曠。去來聚散。如更傳舍。故殿堂門廡諸屋宇。以次摧毀傾倒。化爲榛莽。見者寒心。其所存者。山門藏殿僧堂。大士殿旃檀林雲黃閣而已。至正二年秋八月。行宣政院公選前往西峯友雲龍禪師住持入院。愀然不怡。於是以說法化緣興修爲己任。其年冬。作周垣千有五百丈。立外山門。自是歲興工役。復羅漢堂。知客寮。修旃檀林。復前資寮。蒙

堂增。大士殿層檐。築獻臺爲祝釐之所。創東廡。治東淨庖。漏從僧堂以屬西廡。延山門入若干步。塑護法二天神坐像。開田瀦水。爲放生池。甃石治道。引流種樹。金碧翬飛。相爲映帶。前後七年。積工鉅萬。起廢爲新。實雙林之中興也。其徒具事狀。請金華胡助文諸碑。以告後之來者。俾勿壞。禪師于方外友也。師向在西峯。造雙溪大橋。利濟萬民。行旅往來贊嘆。故茲坐大士道場。熾然作佛事。修建偉績於久廢之後。猶不可以不書也。蓋嘗聞之大士。彌勒尊佛下生也。立教垂世。度一切人。庶幾脫離苦海。去貪嗔癡。背惡向善。等成正覺。觀其著心王銘。卽堯舜禹相授受之道也。會三教之統宗。本一心之道妙。殊途同歸。昭揭日月。不可誣也。於戲。佛法流通。與王化相遠邇。若使人人向慕。發菩提心。爲善而不爲惡。則天下風俗可厚也。國家刑法可措也。庸距非輔治之基耶。予旣書其事于石。仍系之以銘。詩曰。善慧大士。化度閻浮。雲黃之山。燕坐雙構。世方障蔽。小示靈異。法推一擊。千門洞啓。人天歸仰。建刹寶林。總我三教。明爾一心。青蓮紺宇。龍華大會。當來下生。天宮受記。一彈指傾。俄九百齡。經殘教弛。寂滅彫零。去來攘奪。如更傳舍。東顧西倒。屋廡盡壞。有爲有漏。或廢或興。劫數恆理。孰經孰營。三十年間。鞠爲茂草。豈無其人。緣法未到。猗歟龍公。應真化身。持戒定慧。說法度人。檀那信向。輦乘財施。指揮匠石。興工起廢。掃除瓦礫。開闢荆蕪。輦飛金碧。內外一新。廊廡繩繩。山門岌岌。佛殿鐘樓。像設莊飭。百堵皆作。塗墍垣墉。易治門徑。水月涵空。功崇再造。山林增耀。大庇禪流。開堂敷教。祝延聖壽。超度凡民。大士道場。萬古長存。

達魯花赤亦璘真儒林公去思碑銘

義烏於婺爲上縣。昔之論風土者。謂其民尙氣。可以義服。不可以力屈。故凡來爲縣者。苟有循良之政。以善撫之。則民無不樂從。而政未有不異成者也。國朝之制。郡縣各置達魯花赤爲長官。義烏自版入職方。一十有四年。爲長官者已二十人。而今亦璘眞儒林公繼之。求其有循良之政。善於撫民者。公蓋其人也。公敏而練。明而察。勞而無倦。仁恕而有容。故見於爲政。務在抑豪縱。卹窮下。使富貧大小各得其職。要以恩惠及人爲本。而於風化所關。尤盡心焉。先是民之役于官者。莫若於傭。惟夫之費。上府吏卒。道出縣境。輒覓夫乃行。或徒索傭錢而去。縣設關隸司其出納。它有微斂。亦術是名求之。糜錢口至數百緡。公至俾所出減前十九不啻。而濫覓者。皆痛絕弗與。民大稱便。田政久廢。民或無田而被役。而田連阡陌者。乃僅三歲而一役。公奉憲府令。盡括其實。定著于藉。由是民田苗米。莫得飛寄詭匿。以肆其欺。多田之家。則循田之所在。驗米之多寡。受役不一數。而單夫小戶。差役俱免。民皆服其均平。屬時艱虞。鄰境騷動。民心搖惑。不遑寧處。公蚤夜慰諭。令民十家爲甲。各相團結。且募民教以擊刺之法。從行村落間。以察姦宄。四境扼塞。復集民丁守之。咸恃以爲安。盛夏亢旱。原田告病。公齋戒徧禱神祠。不應。則露跣稽首以籲天。七晝夜不輟。雨乃時降。火起市中。勢熾甚。莫知所措。公直火所向。啣哀禱之。解衣投火中。火乃撲滅。衆謂其精神所感。故及有是。歲大禩。官民租皆無所入。庸田使者按視。將徵其半。公力言之。遂得免十之八。民用深德之。俚俗惑陰陽家說。有親喪十餘年。怵於拘忌不葬者。公下令以百日爲限。仍停喪於家者。以不孝論。不閱月。就葬者數百喪。暇日坐庠序。與博士弟子者考德問業。閭巷之塾。亦以時見其師生。而獎勸之。仲

春邵農必躬歷境告戒其父老歲以爲常所謂公之爲政務以恩惠及人於風化所關尤盡心焉者多此類它若縣治頽敝則因舊而新之三皇孔子廟及繡川龍祈二驛又皆大新其舊縣據孔道觀瞻所係爰卽西廊築崇墉建重門而創閣其上以嚴啓閉以謹候望東江石橋久壞於水重作其二頓橋以復完繡湖隄廢則重築其東隄而植蓮其中竝湖之民賴其利焉凡是興作皆使民有道民咸勸趨之公居官六年旣終更去縣民乃相與謀曰公之爲吾縣也不惟爲人所能爲而且爲人所不及爲有德於吾民甚厚盍采其足以繫夫人思者刻之於石以示無忘予爲之言曰今之仕於郡縣而能有以及民者鮮矣此親民所以難也而縣爲最甚何哉蓋民心至難悅也而去民尤近者民怨尤易歸舉而合宜彼其心悅也者幾希不幸而少拂其欲焉則衆怨已隨之矣故爲縣而能有以及民不爲所怨而爲所悅旣去而見思若公之於義烏者當今之世求十一於百千而已嗚呼若公者豈所謂循良之吏者耶是以道其善政備書爲文而興作之績亦牽聯書之公偉兀爾人字仲弘用廕入官由徑縣達魯花赤調同知新喻州事乃以儒林郎來義烏其來以至正九年七月而去以十四年正月云銘曰維縣義烏百里之封俗本尙氣禮義則同相時編民孰牖其衷孰善撫之粵惟我公恂恂我公循良之吏不猛不寬政以無敵惠愛所推罔不蒙被瞻言百里率囿于治財維民心公實優之役維民病公實瘳之民饑吾饑凡民之菑公實庥之問農何如我耕我有問吏何如我法我守小大富貧旣安旣阜民亦有言公我父母敬公神明今公去矣孰保我人我觀百年如一春秋遺愛之存曷其能泯繡湖之波其清湜永民之公思有永無斁采諸衢謠勒此

貞刻。匪我譽公。示後爲則。

純白齋類稿 卷之十九

一八三

純白齋類稿卷之二十

序類

玉海序

玉海天下奇書也。經、史、子、集、百家、傳記、稗官、小說、咸采摭焉。其爲書也。至顯而至微。至精而至密。至高而至深。至博而至約。凡天地、山川、古今事物、道德、性命、律歷、制度、文章、禮樂、刑政、兵農、食貨、靡不畢備。實故宋禮部尙書厚齋先生王公。專精力積三十年而後成者也。先生在宋季。以詞學顯融。其天才絕識。有大過人者。且盡讀祕府所藏天下未見之書。故能博洽貫穿。網羅包括。著爲此書。第篇次浩繁。日修月削。間以所見疏列下方。傳寫抄錄。不無先後參錯之遺。非若他類書比也。雖然。粹焉如玉。浩乎似海。其最鉅者。門人高弟。往往得其緒餘。而擅名當世者有之。夫不見異人。必見異書。一物不知。君子恥之。是書也。其殆集文學之大成者與。東南之士。莫不知此書之奇。願見其全。不可得。願非一家之力所能刊行。潮東帥府都事牟君應復。首建議繕寫校讎。將鉞諸梓。未就而牟君去。今宣慰都元帥也。乞里不花公。實來開闢承宣。嘉惠學者。於是力行前議。召工庀事。徵費于潮東郡縣學及書院。歲入之羨有差。郡守張公榮祖臨蒞提督。命教授王君莪。學正薛君元德。董其役。凡二年而後成。嗚呼。繼自今是書之行也。世之君子皆得以

覽觀考索焉。譬如涉滄溟而求至寶。無不滿意。隨其所入之淺深。取之無窮。而用之不竭。詎庸有限量。涯涘哉。若其門類卷帙之目。則李君敍之詳矣。茲不復書。

桂坡李公澤先生石門六觀圖序

石門六觀者。李君公澤之所作也。始公澤將卜隱居于石門。愛其山水之勝。窈窕幽深。泉石清潔。草木暢茂。殊有太行盤谷之風。矧遵李氏家法者耶。於是因其山水之名。而題爲六觀焉。曰甌山晴雪。曰雙溪春水。曰石門夕照。曰溪亭秋月。曰獅巖晴嵐。曰龍湫飛瀑。公澤首倡。各賦律詩一章。而白雲許先生首和焉。其他和者數人。清辭雅韻。金石相宣。使諷之者如目視焉。異日公澤治別業。新其園亭。因謂余曰。昔吾嘗詠石門六觀。侍講黃先生見而甚喜。許爲首序而未至。予其爲後序乎。詩三百篇。有大序焉。有小序焉。文公朱子傳詩。盡列小序于後。此後序之義也。夫景之美。詩之佳。序而列之。不厭其多。故後序之作。亦君子所不廢也。遂識之。

吳氏譜牒序

譜牒之顯晦不同。宗族之貧富有異。勢使然也。後世宗法旣壞。猶幸家自爲譜。故學士大夫貴於譜牒時。修所以收合宗族。疏遠離散之心。使不至於相視如塗人則善也。昔歐陽公、蘇老泉皆嘗作族譜。後學之所師法。若蘇子之言。尤有感於人心。可不繹其意乎。近世故家大族。兵燹之餘。譜牒悉多散逸。而又子孫卑微不學。其能存先世之譜者。百無一二焉。義烏吳氏。自宋初由括徙婺之烏傷。至四世分爲四派。遷居

青口。後卜塋於稠巖。而事力甫大。翺翔宦路。朱紫盈庭。中經睦寇金虜之變。更造室廬。派別爲五。或以清儉稱。或以氣節著。詳見譜中。其族之望者。曰書記君。梅尙書。誌其墓曰。承信君。事祖母以孝聞。作難老堂。無垢張公。越王史相。仲友唐公。皆有詩頌焉。曰通直君。字伯椿。周益公薦充金使。未行以疾卒。孔山喬公誌其墓。有曰。向使一至虜廷。覘其事宜。必能有所論說。以息羣議。未必稔後來之禍。乃不得以此自見而歿。吾非獨伯椿憾也。曰檢法君。與菊坡崔公有交承之好。西山真先生爲道學之友。曰市舶君。辱集賢崔君交契之厚。誕日以詞美之。有炯炯靈襟。淡無欲之句。及卒。祖祭曰。心清如水。不可汨以利。心平如衡。不可干以私。嗚呼。吳氏自汴宋盛時。固以著聞。南渡之後。稍衰而復振。所與游者。皆當世名儒巨公。至今凡十餘世。三百年于此矣。豈非盛哉。君子觀人之譜。而論世。可以知其德焉。雖然。宋亡而國朝混一。又以七十餘年。昔之盛者。今則衰。今之盛者。昔無聞。盛衰倚伏。貧富無常。理勢然也。又何怪哉。余甥吳燿孟明。粹然潛古。獨能安分守貧。授徒爲業。慨念宗族之漸衰。收拾譜牒於將墜。補緝續書。整有條理。可爲知所本矣。間出示余。求文以傳世。安知其後不復昌乎。余故爲稽於譜而書焉。易傳曰。積善之家。必有餘慶。孟子曰。強爲善而已矣。噫。德之厚薄。族之盛衰也。凡江南吳氏。其初往往皆延陵季子之裔。而散漫于世也。嗚呼。遠矣。

浦陽淵穎吳先生文集序

浦陽仙華諸峯。蒼翠萬仞。其巖絕峻拔之形。瑰詭雄峙之狀。金華北山不能過也。故其氣之清淑靈秀。蜿

釐磅礪而鍾爲名世文儒者。固宜有之。若存雅先生方公。翰林待制柳公。則其人也。最後深襲先生吳君立夫出焉。立夫氣稟尤異。負絕倫之才。自其少時。讀書日記數千百言。下筆爲文。如雲興水湧。二先生深所畏愛者也。故方公以孫女妻之。而且盡傳其學焉。凡天文、地理、井田、兵術、禮樂、刑政、陰陽、律歷。下至氏族、方技、釋老、異端之書。靡不窮考。含其英咀其華。於經史之學。益研精究其指歸。故發爲議論文章。滔滔汨汨。一瀉千里。如長川大山之宗。夫海岳也。如千兵萬馬。啣枚疾馳。而不聞其聲也。嗚呼壯哉。他人恆苦其淺陋。立夫獨患其宏博者也。庸詎非仙華神秀之所鍾。而能若是耶。惜其蚤世。莫得少見于時。僅嘗一用春秋薦不第。遂隱居講學。從游甚衆。凡經指授。悉有可觀。於是大肆其力於學問文章。而卓乎不可及矣。嗟夫。彼其僥倖一官。乘時射利。而無片言隻字可傳於世者。其視吾立夫雄文偉論。馳騁于司馬子長。劉向揚雄之間者。是果孰爲失得哉。必有能辨之者。今門人高第宋君景濂。不忘其師。子雲之侯芭。昌黎之李漢也。收拾遺文若干卷。徵予引。夫文豈待序而傳者哉。然玉韞石輝。珠藏川媚。異時仙華山下。有光燭天。必遺文之所在也。尙何患其不傳哉。

上京紀行詩序

至順元年夏五月。大駕清暑灤陽。翰林析僚佐扈從。而助亦在行中。會微疾差後。至六月下涪。始與檢閱官呂仲實偕行。仲實權從游于昇學者也。今又同在史館。故樂與之偕。沿途馬上。覽觀山水之盛也。日以吟詩爲事。比至上都官署。寓于視草堂之西編。文翰閑暇。吟哦亦不廢。是時學士虞先生乘傳赴召。先生

至於堂上留數十日。日侍誨言。先生屬以目疾憚書。凡有所作。往往口占。而助輒從旁執筆書焉。助或一詩成。必正于先生。而先生亦爲之忻然。其所以啓迪者多矣。茲非幸歟。南還之日。又與翰林經歷張秦山。應奉孟道源。及仲實同行。亦日有所賦。若覩夫巨麗。雖不能形容其萬一。而羈旅之思。鞍馬之勞。山川之勝。風土之異。亦略見焉。至京師輒錄爲一卷。凡得詩總五十首。以俟夫同志刪云。其年八月吉日自序。

胡氏族譜序

胡氏之譜遠矣。宋紹聖間。四世祖六府君始續世家。瀋祐間。從伯父古拙。同我先君。更修家牒。名曰世譜。而工部尙書李公爲之序。方伯父先君修譜時。正東湖南湖全盛之日。我先祖固已歲廩族人。欲創義庄。未就而歿。先君克承其志焉。入國朝至大初。先兄古學再修是譜。萃爲一圖。支分派別。粲然可見。余嘗序之。是時先兄實主義庄尙無恙。會因縣道理畝造冊。別立贍族庄一戶。由是歲當差役之費。而租入不能以贍矣。末幾先兄卽世。予留京師。子姓莫適爲主。泊予歸。權領之。而時異事殊。理民者不以教化爲意。而惟務貪刻。族人之懷私利己者。亦乘時爲奸。於是質租應役無虛日。而庄且壞不支。無爲善後計。乃集長幼而謀之。僉曰。歲有役。未有戶也。無戶斯無役矣。窮則變。變則通。無泥古。無執一。莫若計口分田。以與之。均惠族人。而去其籍可也。斯不亦變通之道乎。予是其言而行之。遂作分義田詩以志焉。雖然。予觀近代富家巨室。往往置義庄以贍族。遭世變鮮不廢者。若吾里路西陳氏義庄。陸放翁所記者。內附後輒先壞。時使然也。獨吾家乎。嗚呼。夫自宋初始祖以來。綿綿延延。至于今日。幾四百年。支派日益繁衍。祖宗之澤。

尙未艾也。可不念哉。助不肖自幼獨好學。見謂迂闊。而吾族之讀書者絕少。此其所以不振也。幸而予以文學登朝。備員史官者再。今茲告老而歸。爲合族之長。閑居無事。追予往來京師。凡三十載。而族之後生不能徧識。因閱族譜。再加修緝。而續書之。舊譜第一楮具四世。次楮則祕其上。而續其下。殊覺煩贅難見。今輒倣歐陽公族譜之法。斷自可見之世。卽爲高祖。至五世玄孫。而別自爲世次。遠近親疎爲別。而書有詳略焉。嗚呼。繼自今。凡我族人子孫。觀其譜者。宜敬念祖宗之澤。以有此身。相與和睦。力行孝悌。忠信貧者安。而無諂。富者遜。而無驕。仰事俯育之餘。勤學讀書。出而應舉。從仕。庶幾君子之歸。而不至於下流也。詩曰。無忝爾祖。可不懋哉。至正六年龍集丙戌。秋九月九日。十一世孫承事郎太常博士致仕助序。

記類

古愚齋記

世之目無能者曰愚。嗟乎。愚果若是哉。顏子終日不違如愚。甯武子其愚不可及。楊子又以晁錯爲愚。夫如是。愚果易得哉。傳曰。古之愚也直。今之愚也詐。嗟乎。孰知後世。固不以直爲愚。而類以詐爲智。若漢之汲長孺。以直諫不容於時。武帝惡其戇。非所謂古之愚者耶。公孫丞相之曲學阿世。務飾詐以釣名。非所謂今之愚者耶。柳宗元文學爲唐名儒。而黨於叔文。身落南荒。悲鳴山水間。自以爲愚。抑爲古之愚乎。抑爲今之愚乎。余性質直漫不超俗好。凡世所謂愚者。莫余若也。然好讀古聖賢書。因揭所居之齋曰古愚。

而翰林待制周公景遠爲余書焉。余欲學顏子之愚，則亞聖工夫，非造次可到。欲學武子之愚，則今非可愚之時也。若柳子之愚，固有所激而不可學者。若晁錯之愚，又不善用以及於禍，則余豈願學哉。乃所願庶幾古之愚黯之黠耳。觀其正色立朝，守節不撓，耿然如夏日秋霜，不可狎玩，千載而下，使人興起，愚黠者固如是乎。余生三十有三年，惟尙友於古人，不求合於當世，流俗往往笑其愚而侮之者有焉。雖然，余豈以易其心哉。益求問學以充此愚，益抱耿介以守此愚，務乎內，不務乎外，取其實，不取其名。雖未敢自謂如古之愚，然亦庶乎非今之愚也。恐來者不知所以名齋之意，遂書其說於壁。

隱趣園記

隱趣園何爲而築也。吾兒璋所以承外舅之志也。始東白蔡隱君曰竹澗翁，愛女擇壻，而璋也。選在東牀，於是創館甥之室于別墅，使居之。翁可杖履往來也。甥舍之東偏，壤地十數畝，坡阜聯綿，松竹秀蔚，近可睡，遠可憩，幽可規，以爲園。中有方池半畝許，植蓮其內，名之曰君子池。池上間植青李、茱萸、桃、紅杏、芙蓉、楊柳，粲然成行。表曰春色。池左右植安石榴爲洞，曰夏意。中植丹桂，作待月壇。壇之後，列海棠如步障。曰蜀錦屏。壇之前，植山楮子，曰簷。葡萄林兩傍，夾以茶藤棚，曰香雪壁。又植牡丹數本，甃石爲臺，曰天香臺。結柏屏于後，回環砌石子爲逕，編竹爲籬，種菊百數本，曰晚香徑。東有松竹梅，結亭其間，曰歲寒。西有修竹澗泉，曰竹澗。餘壤之沃者，雜樹桑麻、棗栗、芋區蔬畦，亦成行列。綽有隱居之趣。是皆竹澗翁平日之所規畫，而俾璋營之。惜翁之不及見其成也。會余自西掖請老歸田，吾兒迎養，日遊其間，於是總名之曰隱。

越而爲之記曰。信乎園日涉以成趣。千葩萬艸。生意無窮。積歲月而後若此。夫豈一朝一夕之工哉。矧不出戶庭。不勞登涉。而望以見羣山之相環。雲烟之吞吐。朝暉夕陰。變態萬狀。娛人心目。其東南一峯。與歲寒相向。尤峭拔者。白鹿峯也。晉孝子許公墓在焉。吾兒雅不欲仕。獨慕古人之遺風。餘烈於山林間。故得園池之勝。與隱者之趣。固未必同也。誠能得夫隱居之趣。是與造物者遊。逍遙乎塵埃之外。彷徨乎山水之濱。功名富貴。何曾足以動其心哉。嗚呼。古之君子。真得隱居之趣者。亦不多也。晉有陶淵明。唐有李愿而已。此其人何如哉。噫。東風花柳。禽鳥和鳴。佳木陰濃。池蓮香遠。水清石瘦。黃菊滿籬。雪積冰堅。挺秀蒼翠。四時之景可愛。而千載之心攸存。慨然飛雲之想。而不忘太山之瞻。斯爲無忝乎隱趣云爾。

李氏木香亭記

木香亭。李公光善之所築也。公幼好讀書。有文武才。嘗勅受都使。領鎮兵。攘括寇。成功。勒石麗水。至政中。歸隱邑治之東。築亭自老。植木香一本。蔓延其上。因扁爲木香亭。亭之前引水爲池。曰濯纓池。池之側積石爲臺。曰望北臺。環列松竹。恍若深林邃谷。日與幽人逸士吟咏遊宴其間。而不知戶外之有塵囂也。其子鳴遠請予爲之記。予竊觀古人如晉陶潛愛菊之隱逸。宋王祐植槐于庭。二公之潛見雖不同。其托花木以寓焉。則同也。今李公之木香亭。其亦思兼二公之意者乎。噫。陶爲晉處士。而公爲國朝隱君子。其出處大略相似。未有能辨之者。況後有德行文章爲英偉卓犖之士者。必然木香亭之所貽也。又何愧于王之槐乎。雖然。嗣公後者。不忘種德之意。而常懷桑梓之瞻。益敦先澤。以培養此木香。益章先烈。以充榮此

木香斯則無忝于作亭之意云爾。

宋氏世譜記

宋本子姓。至微子始受封。子孫遂皆以國為氏。有居京兆者。曰大理丞憲。唐武德間。自京兆遷吳興。歷十四傳。至榮。周廣順中。又遷義烏福釜山。榮字體仁。行十有經濟才。通尚書春秋。訓者私謚文通先生。葬法華山。娶陳生甫。行十字師杜。善詩。宋雍熙末。又遷智者鄉之根谿口。是為甲甫娶謝生訓。行二訓娶阮生帳。行八帳娶何生祥。行廿字善致。娶龔無子。以弟海之子阜為後。海。行廿字善宗。娶胡。葬石續原。阜。行五娶陳宗生。偁。自偁以上皆儒。偁。行十字子穆。娶楊子同生。永敷。一作富。行百四栢。行百永敷娶李回。嘉定初。又同栢遷金華之潛溪。禪定寺側。行十栢字秉操。娶陸烈無子。以永敷子溥德嗣。溥德。行十髯垂至腹。孝弟如古人。遇物一以柔勝。娶周武。周與陸皆杭人。溥德生守還。行三字德明。娶沈守有。行萬字德懋。娶王康。皆有後。守富行萬字德政。性忠信。與人交無二諾。嘗共兄執里役。度其力單。獨任之。娶金妙圓。有賢德。婦道母儀。可為女中師。且勤甚。御紡磚。每夜致雞號。卒振宋氏門。守有亡。一子幼。或利其多資。謀殺之。妙圓與夫保育成人。悉返其田廬。一髮不私。合葬潛溪西三里西姜東塢山。生文昭。一名朝。行福四字文霆。溫恭似不能言者。子弟來見。亦整衣冠深揖之。生平不識偽言偽行。一錢不妄取。不問賢愚。一以鄉善士稱之。號文圃。行福五以名為字。文馨。行福七文隆。行福八字文華。文昭娶陳賢時。事父孝。雖歸文昭家。凡得美食。即遣人遺之。未遺不敢先食。善於教子。鬻簪珥。使從明師。儒游。死葬潛溪西十里白石山洞坡塢。生淵。行後一字景淵。義烏醫。學教

諭·濂行俊·字景濂·能古文·文囿娶院章二氏·阮生澄行俊·字景清·渭行俊·字景亨·早卒·章生沁·涪·文馨
 娶姜·生·涑行俊·源·汶·瀛·文隆娶趙一子曉·周出也·淵娶蔣勸·生瑛行俊·字伯章·濂娶義烏賈專·字主敬·生
 瓚行俊·字仲珪·瓚未字·國朝至正庚寅三月三日·濂又遷浦江·感德鄉之青蘿山孝門橋·宋氏自大理丞
 以來·雖不甚顯·然多以儒術知名于時·後之孫子·念先德之如斯·思繼承之不易·可不知所以自勉者哉·
 助與濂為文章交甚密·因為著此世譜記·俾之刻石先祠·庶幾觀者有所興起也·

純白齋類稿附錄卷一

詩類

奉題雜興

織錦機邊婺女輝。彩鸞啣霧護梭飛。春來京國生羈思。更爲司花製舞衣。
黃金臺榭帝王州。碧海東風有白鷗。當日上林誰獻賦。一槎明月到牽牛。

瑯琊 王士熙 繼學

又

么鳳啣香蟻度珠。新機織翠綬雙紆。江南徐庾多才思。更問天孫乞巧無。

馬祖常 伯庸

又

兩都賦就人爭寫。問答猶嫌彼此辭。歌詠太平皆雅頌。國風誰繼二南詩。
金膏水碧世那知。翡翠鱸魚各自奇。誰作文章留石鼓。千年如見中興時。

蜀郡 虞 集 伯生

又

臥聞莖鳥聲。起聽車鐸鳴。東華塵千丈。何物紛吾纓。生世無定姿。客懷多感情。蹇驢障便面。謾謾如有營。
呼童具紙筆。造次三都成。南風來隊地。洛下有士衡。新秋動砧杵。楚草珠露盈。奉槃謝羊酪。漑脯思蓴羹。

湘中 歐陽玄 元功

又

心縈碧落蛛絲巧。手鑄黃金象治精。白日若須生羽翼。丹砂九轉始功成。金莖露落蟬初蛻。銀漢風清鶴自鳴。一點神機千古意。坐看微月向東生。

宣城貢奎 仲章

又

東南才子利如刀。瑞錦文成五鳳毛。歌詠正風三十首。京城紙價定應高。

汝上曹元用

又

十一門前朝雨晴。第三橋下暮湖平。誰家墮珥遺簪去。有客隨車信馬行。鳳樓明月玉窳窠。虎帳秋霜金僕姑。誰共風流歌小海。更看才思賦三都。南國佳人寫素琴。鷄林賈客費黃金。他年一舸江湖上。想見平生魏闕心。

蜀都謝端

又

文采爭傳五鳳樓。帝城風雨幾經秋。好賢不有鸞臺客。江漢秋風生白頭。

河東段輔

又

文采縱橫爛錦機。觀光獻賦入京遲。至元中統唐虞治。第恨當時未見知。江南才子擅文章。風雅宜追杜草堂。旅食京華顏易老。一心憂國未能忘。

李端

又

吳興趙由辰 明仲

數載京塵染素衣。盡書聞見紀當時。正清一洗淫哇耳。彷彿幽風七月詩。

又

濟南張起巖

上國觀光歲月深。鋪張繁縟入新吟。朱絃不盡陽春曲。知有鴻儒是賞音。

又

天台周仁榮

連金仙藥堪黏日。煉石神功欲補天。弄影莫將斜嶺照。華陰井底有寒泉。

又

長沙張彌昌

有才盍獻長陽賦。有手不操光範書。詩史千年意微婉。編摩東觀此權輿。

又

吉井王肖翁

東華塵土鳳城春。夢覺西山曉雪晴。九奏鈞天聽不足。江南才子正詩成。

又

谷陽龔璠子敬

翼翼四方極。洋洋騰頌聲。令人思鉅麗。及此看昇平。步武青雲士。才華子墨卿。胸中萬言策。取次忽紛更。

又

鄭劉汝師魯

自是江南萬斛船。千人帳頂看冰天。詩成說盡京華事。應笑三都費十年。

又

江寧楊剛中

鳳城朝麗紫烟浮。翠籟秋澄素欲流。誰向客樓橫玉管。雲端飛雁總回頭。

御溝流水玉盈盈。漱月鏘雲遶禁城。我爲都人先洗耳。教坊新譜夢華聲。

又

邵武黃清老

吾聞金華之山東南峯。石壁巉絕雙飛龍。滄溟盤礴幾萬里。但見扶桑日影倒掛金芙蓉。山中仙人古懋老。青霞落落雲間松。翩然獨去遊無窮。謁帝西上崑崙宮。春苔染水綠於酒。輦路人家插楊柳。金莖露滴明月珠。散落人間作星斗。公不見西山月下紫氣橫。花下有人吹玉笙。太平擬獻九成樂。五雲樓閣生秋聲。

又

趙郡蘇天爵

有客江南來。賦詩長安陌。長安城百里。半是公侯宅。飛甍高切雲。軒戶耀金碧。富貴世莫儔。日日承恩澤。明星朝未稀。車馬轟霹靂。九衢多行人。見者盡辟易。懽娛極一時。歲月烏飛翮。緬思建國初。作邑龍沙磧。狐裘皆大人。至今聲烜赫。洋洋雅頌音。孰知慕儔昔。

送胡古愚赴古威衛教授

胡 滅

送君萬里又承恩。二月春風花正繁。史筆幾年歸翰苑。孝經今日訓其門。龍韜細閱軍威肅。虎旅相摧教道尊。願我同年復同姓。白頭營按更何言。

寄題胡氏隱趣園

吳 澄

地偏車馬少行蹤。天闊雲烟萬里通。本本芥菘爨宿雨。年年桃李媚春風。就賓孰主園如昨。人去人來趣

不同。我亦謀歸理荒徑。寄詩先到覓臺東。

次胡古愚韻

柳貫道傳

東府銓衡外。西陲雅頌邊。青雲誰薦賦。白日但催年。固欲翔千仞。寧能闖九天。淹留亦何益。未了北征篇。
勞歌非異曲。羸服有同袍。客路添重研。童年憶兩髦。曉星壺漏正。春水釣船高。爲寄吳江夢。將慙蜀市遨。

次古愚剪燈詩韻

吳師道

刻渚推冰紙。并州翦水刀。輕明新雅製。麗巧極纖毫。不讓琉璃貴。渾疑錦繡韜。皺紋縈細縠。疊翠漾長縹。
花草形相錯。鷓鴣勢欲翔。勝光宜秉炬。透色賤塗膏。愛著詩聯綴。嫌逢騎驛騷。春風翻寶帶。華月湧雲濤。
良夕娛佳價。元臣念小勞。都人應共樂。歌舞送春醪。

送胡古愚陞翰林編修

王士熙

八詠臺高值早秋。蘭溪雲淺去夷猶。山中牧客能驅石。海上仙風不引舟。金匱編年須筆削。錦衣行晝足
優游。春天定逐南來雁。惆悵離懷屢倚樓。

古愚以成字韻詩來貺。用韻餞行。

歐陽玄

庭前書帶識康成。稽古親承雨露榮。黃閣夔龍新治具。玉堂班馬舊才名。暫煩匠手拱摛藻。行見詞頭撰
集英。歸舸輕裝非遠別。藕花時節過臨平。

古愚以薦入史館。先歸故里。期以春上告別。有詩爲贈。

俊都馬祖常

沈約才清不奈秋。歸艎南去漫夷猶。還家拂拂雙鷓被。到闕重修五鳳樓。袍色映江榮錦里。詩聲傳紙快書郵。蘭溪畫炬非蓮燭。春早來從十二游。

又

王士熙

樹拂仙雲一葉秋。雙溪歸興更夷猶。金蓮炬底閑鈴索。宮錦袍前放彩舟。居近赤松巢鶴下。時尋白石叱羊遊。明年花發催宣瑣。獻賦天家十二樓。

又

王士然

幾年京國擅詩名。歸棹西風一葉輕。北闕承恩丹詔重。東陽遂志錦衣榮。汲泉釀酒燒塵土。築圃栽花翦棘荆。藝苑新班誰得似。仙雲春早到蓬瀛。

又

宋沂

胡公骨清慮不煩。引珮鳴珂白玉溫。春空碧雲才思闊。翡翠映日蘭苕暄。鏘鳴韶濩振金石。緋細騷雅仍孤鶩。相君高揖共推激。青雲入手風雷奔。紫芹沐香新雨露。待引青藜金馬門。京華傾蓋已三載。如何暫別開離樽。君歸金華畫錦妍。芳草生涯足故園。明年早看鷓鷯入。儻解相逢更細論。

又

吳興趙由辰明仲

承慶前溪淺面新。烟花三月鳳城春。近瞻北闕承恩澤。同上南舟問去津。史館得人專筆削。玉堂指日掌絲綸。卻慚州縣徒勞耳。況復遠投東海濱。

又

湯彌昌 師信

文場特立無雙士。人表先推第一流。金匱政須良史筆。玉京不負束書遊。演綸館閣瓜期蚤。行錦家山桂子秋。小待水生春凍解。布帆日日望來舟。

又

龔 璠 子敬

鑾坡用南士。握手舊相知。十五年前別。尋常夢復思。俱沾退之薦。莫誦浩然詩。意氣風雲際。滿斟金屈卮。

又

王肖翁

歸旆翩翩及早秋。故鄉還後望并州。文高宣室方前席。興發山陰忽棹舟。玉署晝長添日歷。金臺雲暖待春遊。男兒鏡裏看勳業。莫爲溪山卻滯留。

又

劉 汝 師魯

東南諸老盡凋零。羨子聲華聳漢廷。世有雄文追太史。家傳直筆似遺經。玉堂標格輝宮錦。金匱勳勞屬汗青。盤許雙溪尋舊隱。春帆咫尺上鯤溟。萬里春光壯客程。行行指日近京城。桃花浪暖魚龍躍。雲路風高冠蓋輕。遺炬分輝待前席。麟經秉筆擅能名。他時觀國如相遇。車笠毋忘此日盟。

又

金壽祖

桑梓情應密。雲萍迹每賒。飛騰歸帝里。落拍困天涯。不謂鷄羣鶴。能憐井底蛙。直辭修袞闕。當代更誰加。

題上京紀行

王思誠

煌煌兩京城。關城阻千里。扈聖從鄒枚。紀行富詩史。歷歷光景佳。洋洋賦雄麗。三都費十稔。洛下紙空貴。何如風雅編。歌詠太平世。

又

王士點

灑水亭亭帶玉京。風霜朝暮寫官城。深秋還幸山川麗。侍史登高暑氣清。

題大拙小拙傳後

大拙先生拙於宦。小拙先生拙於言。拙宦太常新致仕。拙言文典工討論。陳信信可名爲大。不能自比魯仲連。陳季可名爲小者。老死不得歸田園。

又

吳全節

戲竿弄巧竟捐軀。大拙安然履坦途。振羽鳴機憐蟋蟀。吐絲結網笑蜘蛛。寧爲五石盛漿瓠。肯把千金辦酒壺。喚醒邯鄲開夢眼。扁舟烟雨泛江湖。

又

劉聞

君知大拙先生否。落魄襟懷有古風。自許逃名江海上。時來寄迹市朝中。看山把酒身長健。寫字題詩道不窮。誰是平生知己者。掀髯一笑問愚公。

又

楊維禎 廉夫

大拙先生陳信氏。常騎款段客京師。空同鄒忻重作傳。軒轅彌明能賦詩。自信一愚遊太古。須知五技有窮時。白羊山中藏石室。黃鶴仙人書製碑。

又

廬陵 歐陽玄

大拙先生何許陳。鏡中人是面前人。晚藏名字非逃世。閑作文章自寫真。派系雖宗虞闕父。性情渾似葛天民。食纔盈器攻詩瘦。家本千金受祿貧。詎怨謀疎多誤事。每誇任達漸通神。耽書不辨饑和飽。中聖那分醜與醇。元令爲歌偏合調。叔孫楚製輒生噴。憐鳩少智容巢近。愛鹿無魂托友馴。不識春陵周茂叔。感渠一賦便相親。

奉賀送古愚先生致仕贈行

張起巖

國史編修壽七旬。歸軒輝耀出都門。到家上冢榮新慶。致仕遷官拜異恩。名遂自知身必退。齒剛還羨舌長存。高人心逸無他事。遠碧樓頭弄幼孫。

奉和古愚太常留別高韻

許有壬

天上故人羅祖道。夢中稚子候衡門。君王深閔七旬苦。忠義難忘一飯恩。白髮朱衣相照映。青山茅屋鎮生存。便尋起石爲羊處。卻笑牛車困孝孫。

又

馮思溫

揮毫倦直玉堂署。投綬喜辭金馬門。車蓋祖行堪入畫。朝廷佚老每加恩。水涵明月雙溪滿。樓敞清風八

詠存。最是到家情致爽。稻炊雲子竹烹孫。

奉酬見寄清製元韻。敬賀致政榮歸。惟面同一捧腹。

述律杰

三十餘年留館閣。每隨春仗造宮門。懷歸常想枌榆社。告老新沾雨露恩。闕下文星旋覺少。床頭書卷儘教存。還家著就歸田錄。遺訓應傳到耳孫。

又

蘇天爵

三入詞林官太史。年年載筆立宮門。欲明得失裨時政。獨歷清華荷國恩。天上玉堂勞夢想。禁中金櫃有書存。鄉閭故老風流在。爲教衣冠後世孫。

次韻奉答古愚先生留別之作。

汪澤民

三月京城花正繁。共誇歸老餞東門。金華行作烟霞侶。丹闕寧忘雨露恩。館閣文章耆舊少。衣冠儒雅典刑存。樓前遠碧山當座。綠酒朱顏且弄孫。

又

馮福可

金華仙伯歸來好。酒熟詩成客滿門。洗耳松風堪佚老。終身芹曝敢忘恩。奉常禮樂班重進。太史文章藜具存。萬事向來須伯始。更將宦譜付諸孫。

依韻奉酬

于文傳

幾年夜直玉堂署。一日朝辭神武門。幸有煇爛娛老景。祇將純白報君恩。此時此意誰能解。某水某丘今

尙存我亦束書歸舊隱。日長容與課兒孫。

又

仇濟

先生名遂。幾人似。不忍分襟出國門。屢典文衡承大惠。常揮史筆被皇恩。乾坤清氣詞章燦。館閣香風姓字存。今日榮歸居遠碧。好傳道業付兒孫。

又

劉尙質

春江盡釀東陽酒。曉日初辭西掖門。綵筆哦詩揮麗藻。黃麻承詔湛洪恩。天池鳳去奇毛在。仙洞羊來古石存。遠碧樓前新雨足。蔗生佳境竹生孫。金華山裏人歸去。蘿薜盈牆水遶門。手把鸞笙吹古調。身披鶴氅戀新恩。丹霞映壁晨餐了。明月當牕夜氣存。滿屋詩書爲素業。風流傳子子傳孫。

又

呂世元

范蠡扁舟初去國。陶潛五柳正當門。青春把酒辭交契。華髮還鄉戴聖恩。兒子門生羣拜起。園翁溪友鬢溫存。漢廷他日徵遺老。禮樂終當問叔孫。堪羨先生似玉溫。世人才藝謾多門。名揚昭代全高節。身愛皇天報大恩。李杜文章光燄燄。孔顏理性道存存。歸來獨占雙溪月。最喜傳經有子孫。

又

吳當

太史多年稱開老。奉常新命拜修門。青春到處猶能賦。白髮歸休更是恩。天上玉堂留棗盛。山中華屋貯書存。東陽酒美花如錦。庭有諸兒膝有孫。

又

張翥

純白先生有精舍。近在金華之洞門。歸山已容此身老。戀闕莫報吾君恩。一時盛事衣冠餞。千載流芳翰墨存。更喜年來足生事。白羊添口鶴添孫。

又

方道壑

太史京華三十春。緋袍歸老別都門。焚黃久重松楸念。髮白新榮雨露恩。疏傅喜多隣曲在。子瞻自笑語音存。東陽舊族人能數。誰復衣冠到遠孫。

又

班惟志

翰林官轉太常賓。父子文名萃一門。諡議正曾誇直筆。史編公不樹私恩。九重醉許烟華餞。三徑歸懽松菊存。養老舊條閑局在。當今東閣有公孫。

又

王士點

致政縣車爲博士。門生就職更專門。豈期方爲尊師喜。亦復叨承聖主恩。講禮容臺傳業在。言歸錦里故書存。京華樂石文章刻。留與詩人說外孫。

又

陸宗亮

回首居庸晴翠出。衣冠祖帳集都門。一官已及榮親典。繼子仍沾任子恩。去日關河多賦詠。歸時籩豆有司存。相逢南陌東阡路。共賞車中膝上孫。

次韻不揆蕪蔓。率意效嘯。惟冀古愚先生發哈裂之。

林奇

太常博士引年去。聞道隱居如鹿門。粉署忽空傷客別。緋衣暫著荷君恩。漸因人乞新文滿。爭待翁歸舊酒存。坐處定知山色合。半醒半醉認諸孫。

奉和太常博士古愚先生致仕歸金華述懷高韻

先生名德高千古。奕葉書香萃慶門。清廟冠裳新錫命。玉堂簪紱舊承恩。故家樓觀兵前燬。先世遺書亂後存。共說亭臺還舊觀。肯堂繼述有聞孫。

題胡博士嘉樹詩卷後

宋濂

花蕊峯前水滿溪。溪南嘉樹可雲齊。黃腴期鑄萬年魄。青兕時遊九曲堤。晴影落庭生遠思。秋丹入葉愜新題。似茲聳拔高千仞。憶昔封培始寸莢。雨露華滋無上下。書詩佳問到東西。春酣碁響猿來下。夜半琴鳴鳥失棲。細字題詩盈玉軸。當時操管盡金閨。未論氣魄成曹謝。但見光芒射斗奎。大藥芳顏難久駐。西風迅景倍酸嘶。有金莫鑄文園象。無客能然照水犀。所幸絺章存簡冊。便藏寶篋比懸黎。顧子何意裁文錦。久客無言類木鷄。嘉蔭未瞻街作榭。吐辭安得氣如霓。角弓既有前人詠。聊拾殘膏付小奚。

純白齋類稿附錄卷二

文類

送胡古愚序

東陽許謙

東陽婺望縣東南山水嘉處。自天台赤城蜿蜒盤礴綿延數百里。亘爲玉山。數十里峙爲雙崑。經野建邑於焉。是依山之幽深秀特者。水必源於其間。稽之郡乘。浙江之浸。實肇林壑之下。經流曼衍。過于雙溪城南。澄瑩甘美。瀾湧湍激。不舍晝夜。天雨時至。瀕洞奔放。勢可勝萬斛之舟。氣之積也厚。故其發也巨。終至于不可量也。山結水融。生物必異靈。而爲人亦必有奇俊超邁不規規於流俗者。夫良材美箭。佳果旨酒。人皆得以爲利。士君子之敦詩書。修辭蹈禮者。籍籍滿耳。而余之所見。多侈辭宏論。凌絕卓超。聽其言。觀其容。發揚蹈厲。每恍然自失。以余之驚下。固不足窺其際矣。意山水之鍾而奇俊超邁者。殆不止於此歟。余固有所待也。嘗聞胡君伯仲子姓。皆務學深造。未能盡交。往年遇古愚子於市。友人蘇世賢指曰。此東陽學者胡君也。將試仕於金陵頻宮。今行矣。揖而過。不暇交一語。余重恨之。皇慶二年夏。余遊金陵。而君尙在講席。其氣粹溫。其儀濟踰。誦其文。若詩。皆清平古雅。余向之有待而欲見者。其在古愚子乎。夫聖人之道常道也。不出於君臣父子昆弟朋友應事接物之間。致其極則中庸而已爾。非有絕俗離倫幻視

天地埃等世故如老佛氏之所云者。其道雖存於方冊。而不明於世久矣。周、程、張、朱諸子出。而闢邪扶正。破昏警愚。秦漢以來千五百年。英才多矣。而有昧於是。吾儕生於斯時。未必能躡於千五百年之才。而獨有見於聖人之道如是其明也。幸而生諸子之後。固當平氣虛心。隨而求之。階之梯之。以達乎上。顧實有益於已而止。何庸翮強自喜。撫奇務新。力與作者爭衡。又將轢而踐之哉。古之立言者。誦於口而可以心存。存於心而可以身踐。而成天下之務。則聖人之道也。今口誦之而不明乎心。降其心以識之。而不可施於事。是則老佛之流之說爾。爲老佛之說者。措之事固不能行於跬步。而自理其身。庸可以爲善人。則好爲異說者。其風又下於彼矣。道在天地間。弘博精微。非可以躁心求也。而乃攘袂扼腕。作氣決背。售其說而競後息。欲以厭今人。陵古人。則吾未之信也。古愚氣和心廣。余嘗欲與從容論之。而以滿秩解去。君採芹藻之英。將以道淑諸人者也。以余之說評之。然歟否歟。余非敢爲子勉也。子固余所敬也。

胡太常甌山存稿序

晉安 張巨寧

文章莫盛於前代之宋氏。大要尙道藝而下詞章。而始以學古修業。則已崇理致黜崛奇。而主平易。忌艱深而貴敷鬯。漸以復古之作者。又惡沿襲而少變焉。是以其辭紆餘而曲折。及其後也。融之以訓詁。發之以論說。專務明乎理。是以前辭詳盡而周密。其於詩也亦然。蓋不爲秦漢以來之傑然者。隱然爲宋氏一代之文矣。婺爲羣儒先。東萊呂成公之里。近何王、金、許氏。得勉齋黃公之傳於徽國朱文公者。以經學教於鄉。及學士黃公。待制柳公。諸賢輩出。又以詞章仕于朝。而故太常博士古愚胡公。實同一時。先後倡和。

其源流之所自。蓋可睹矣。太常之子瑜。茲來京師。呂寧曩獲交於太常而見焉。因得其文與詩而盡觀之。其於太常君何其克肖也。既而以序請。蓋昔者竊聞之六經至矣。後乎經者。惟韓於文。猶杜於詩。善論者俱以聖稱之。而猶於杜之文。韓之詩。猶說焉。稽之周程二夫子。其爲書甚簡。與醇古。其興起。歆動。幾魯語而契雅南者。誠非虛車也。而轅輪之飾。亦豈以辭章名世者所能至哉。噫。學於古者。可以悟矣。記曰。溫柔敦厚。詩教也。龜山楊氏學程氏者也。亦曰。爲文貴有溫柔敦厚之氣。二者固不同也。而有同焉。噫。溫柔可學也。敦厚難能也。呂寧不敏。願與君子共學焉。瑜字季城。以任子仕而益學。薦浙江亞榜。擢照磨杭州。恥屈藩侯。航海而來。復以流寓貢于大都。待試于南宮。蓋志于忠孝者。故爲述理學源流之自。葵者期之。飯山其居也。君以名其集焉。

題古愚詩集

吳澄

金華胡助詩。如春蘭茁芽。夏竹含籜。露滋雨洗之餘。馥馥幽媚。娟娟淨好。五七言古近體皆然。令人愛玩之。無斃頌雅風。騷而降。古祖漢。近宗唐。長句如太白。子美。絕句如夢得。牧之。此詩之上品也。得與於斯者。其在斯乎。其在斯乎。

題康里子淵贈胡助古愚序後

柳貫

士之遇不遇有命焉。不繫乎學與才也。皇慶初。予識東陽胡助。古愚。于金陵。嘉其資質粹美。辭章俊拔。意其必遇也。逮今十有四年矣。再見之于京師。方且謁選吏部。受九品初職。而又不適得。孰不歎其淹滯而

悼其屈。雖予亦不能不爲之慨然也。宋南渡以來。東瀾之人物。婺爲盛。東萊呂子其最也。古愚言論性情。標格藹然。鄉先達之遺風。不但其文之卓異而已。康里子淵曾與之交。欲進其文於道之右至矣。噫。道不載以文。則道不行矣。

題上京紀行詩後

太原 王守城

大駕北巡。與扈從之臣同發者。自黑峪道達開平爲東道。朝官分曹之後行者。由桑乾嶺龍門山以往爲西道。皆出居庸關。日北始分。至牛羣頭驛乃合。各經五六百里。其山川奇險不相上下。而東道水草茂美。牧畜尤便。故大駕多行。執書載筆之士。或未及歷覽也。胡君久在侍從。必當一經。則紀行之詩。又續作矣。登高能賦者。昔人稱之。胡君有焉。

題上京紀行詩後

東平 王士熙

上都乃世祖皇帝所建。修自是以來。未有宮闕城池如此之壯麗。羣山南峙。其地則廣漠萬里。蓋雄占一方。俾海內宇縣於是而取。則至於文章之士。惟有勒石燕然之碑。其詩詠則未嘗聞也。亡金時。間得其一二焉。今則兩都巡幸。百司陪侍。色色俱備。而文章之士。猶爲勝傑。於戲。蓋盛矣哉。至順元年。國史編修金華胡先生古愚陪侍。自夏歷秋。凡得詩若干首。古愚平日爲文章。細密婉麗。字畫楷正。及至是。竟發其蘊。舊之所得。旣以成章。今之所見。沙漠龍磧。風雲雪嶺。變爲平淡冲和之音。裨益盛世。可刻可傳。大章雍容。小章深雅。其傳於世也必矣。

題上京紀行詩後

趙郡 蘇天爵

嘗聞故老云。宋在江南時。公卿大夫多吳越之士。起居服食。率驕逸華靡。北視淮甸。已爲極邊。及當使遠方。則有憔悴可憐之色。嗚呼。士氣之不振如此。欲其國之興也難矣哉。今國家混一海宇。定都于燕。而上京在北。又數百里。鑾輿百司。皆分曹從行。朝士得以侍清燕樂於扈從。殊無依依離別之情也。余友胡君古愚。生長東南。蔚有文采。身形瘦削。若不勝衣。及官詞林。適有上京之役。雍容閑暇。作爲歌詩。所以美混一之治功。宣承平之盛德。余於是知國家作興士氣之爲大也。後之覽其詩者。與太史公疑留侯爲魁梧奇偉者。何以異。

題上京行詩後

南鄭 王理

言詩者。莫盛於唐。嘗歷觀天寶以前。北方紀行諸詩。皆在靈武、五原、河西、岸隴之地。蓋唐都長安。彼皆重鎮。騷人才子。多仕於其間。今國家建置兩都。皆在東北。鑾路時巡。從臣嘉頌。具述山川之盛。都邑之麗。左太冲嘗稱美物者。貴依其本。讚事者。宜本其實。胡君之作。皆出於履歷之真。觀覽之切。如有好事。綜而緝之。與羣公之作。都爲一集。以與唐代西北行者比盛。不媿矣。

題上京紀行詩後

黃晉卿

始予觀古愚上京紀行詩。固愛其工。而未得其所以工也。今年夏。忝以下僚。備數冗從。山川之雄麗。草木之榮耀。消落風沙。雲日晦明之變化。與夫人情物態之可喜可愕。苟有所勦於中。而及形於言者。古愚皆

已如予意之所欲出。然後知古愚之於詩。蓋不求工而自不能不工者也。昔人誦子美夜深殿突兀。以爲親涉其境。乃悟爲佳句。豈虛言哉。至順二年九月十日。

題大拙先生傳後

王士點

有拙生者。大拙先生之徒也。蚤生公府。幼從先生學。戲弄梭滕剗之器。以組織空虛。錫鍍消息。每聽受施設。輒得其形似。而要妙未能竟也。先生病之。生曰。方今治化休明。職教之官。越于四海。先生敷文宣教。受業滿室。邇者垂銀黃。官中外。拜于几前者。皆先生之徒也。育材贊化。則先生旣爲之矣。聖天子宵衣旰食。將相左右。都兪輔翼。則有記言記事之官。紬金匱石室之藏。粉飾登平。播示悠久。顧先生素所職也。今先生乃以拙自號。又冠之以大曰大拙。而生從先生學。未竟要妙。固所事也。先生何病焉。宣教于外。綴史于朝。則先生未可爲拙。又何大之有。吁。大拙固先生之自名。而拙之實生爲不孤矣。先生曰。余業爲若師。迺攘余號。當仁不讓。生其有焉。生與先生同姓。先生氏胡爲陳。生氏王爲田。實同源媯。媯云。

題大拙先生傳後

陳旅

君子非惡夫巧也。惡夫無用巧之道也。徒巧而用之。則爲技易窮。爲物易敗。是以君子弗巧也。陳信先生在京師。拓落二三十年。仕不大得。亦未嘗有毛髮之失。而世之巧於進取。以至於窮且敗者。亦衆矣。用巧之道。無過於拙。此大巧之所以號大拙也。余嘗聞田生之言曰。先生所爲詞章清俊而安美。其思甚巧。獨其名不入於巧宦之門。故君子尙之。陳氏系出陳胡公後。世有遷江南者。故先生爲淞人。或云是東陽人。

余聞諸田生云。

題大拙先生傳後

揭傒斯

陳信先生者。秦定中。余嘗識於王參政家。言若不能出口。而心極聰明。外若不諧於俗。而中實夷曠。讀書好禮。自言與胡氏姚氏。同出虞舜。未嘗通婚姻。而胡先生作傳。最善形容。至若雙目炯然。如方外士。稠人中有所注視。或疑其善風鑒。非極相親。不能道此。而不與姚胡通婚姻事。獨闕之。豈未嘗及之耶。抑亦人之常道。不必書耶。

題大拙先生傳後

東明 李好文

胡子古愚爲大拙先生傳。輟耕叟聞而喜爲之。頌曰。有大拙先生。以有形爲機緘。無欲爲室宅。自然爲坦途。恬澹爲事業。衆人施施。誇刻楮之工。眩沐猴之刺。我獨璞兮。鑽屈轂之匏。畦漢陰之圃。恆矻矻以卒歲。噫。彼三穴以自居。五技而見窮者。其爲計也。竟何如耶。

題大拙先生傳後

趙郡 蘇天爵

太史胡君江左繁富之地。而蕭然清古。不知慕夫華靡之樂。館京師執政之家。而安焉靜退。乃獨昧於進取之機。謂之大拙。不亦宜哉。昔人有傲倖萬方。以圖富貴利達者。或卒不克如其所欲。是蓋有命焉爾。孔子曰。富而可求也。雖執鞭之士。吾亦爲之。如不可求。從吾所好。愚願與胡君共學焉。

題大拙先生詩後

鄆陽 周伯琦

予讀大拙先生傳而知其爲有德之士歟。以先生爲真拙者耶。則能牢籠萬象。發揮今古。以先生爲非拙者耶。則棲遲旅館。跡弛江湖。然吾觀巧於世者。雖寓於人。其技有窮。而心長戚戚。拙於時者。獨偶於天。其應無窮。而心常泰然。是故先賢之言曰。天下拙。刑政撤。上下安順。風清弊絕。噫。吾願爲斲珞爲樸之徒歟。

題大拙先生傳後

同郡 吳師道

柳柳州賦愚溪。以愚自命。而又言雖不合於俗。頗以文墨自慰。漱滌萬物。牢籠百態。而無所避之。蓋不甘於愚也。他日。寓詞乞巧。抱拙終身。人或未以爲然。東陽胡君古愚。爲大拙先生陳信作傳。大概言其澹泊迂滯。不利進取。至稱其能文章。喜詩善書。則又有不拙者存。殆亦愚溪之意。夫胡君旣自比於古之愚者。而見大拙。則又喜爲之書。流傳京師。諸公從而贊述之。以古愚之言不妄。故也。柳州不能使人信其拙。而先生得胡君而信其真拙者歟。

題大拙先生傳後

太原 王守誠

昔有國工善寫真者。下筆輒得人之骨氣形似。纖微弗忒。或難之曰。君之藝絕矣。奈何不能寫君之真。國工乃移明鏡於几。端坐諦視而圖之。耳鼻眉口。無一不似。獨目睛不能點。或謂之。國工曰。人之神在於目。故得其神。則能全似。古所謂在阿堵中者是也。今吾寫吾之真。吾一人焉。吾視鏡中之人。始吾之真。其不動者。吾皆肖之。惟吾目睛所向。鏡中之人亦向之。故所圖者形也。非神也。此吾所以不能得吾真也。胡君古愚。作大拙先生傳。軒轅彌明之類耶。空同鄒忻之比耶。其寫吾之真者耶。抑鏡中所向而不得其神者。

耶。皆不能知之。因書卷後。以諗同契云。

題太常胡先生隱趣園八詠

趙郡蘇天爵

太常胡先生。縣車歸老東陽。有山林深邃之居。有圖書諷詠之樂。有子孫以具甘旨。有田園以供伏臘。又值國家承平之世。優游以養高年。蓋亦福德之君子哉。余舊見中州賢士大夫。宦游四方。罷則無所歸。其清節可尚已。昔范文正公將老。移疾家居。家人以居室未完美爲患。公聞之曰。人苟知道義可樂。雖形骸亦可忘。是卽先天下之憂而憂。後天下之樂而樂之志歟。

跋古愚上京紀行詩

南陽李朮魯翀

言心聲也。形而爲詩。聲之妙也。得聲之妙者。幾何人哉。古愚來自京師。職館閣。不但工於詩也。今見其上京紀行凡若干篇。紆餘妥帖。縝緻清婉。情景交融。不激不怪。諷之誦之。士雅民風。古意猶在是也。雖未始從風雨上下聞此妙聲。如目親視。良一快也。

跋上京紀行詩

上文呂思誠

詠天作之頌。有以見后稷肇基之艱。讀鎬京之雅。有以見文武立國之隆。歌黍離之風。又有以見平王都洛之業矣。日月星辰之紀。風霜雨露之時。山川城域之限。鳥獸草木之產。原之以道德。經之以禮樂。道之以政。而禁之以刑。前日之山川。猶今日之山川也。前日更之。則有安樂和平之音。今日過之。則有悲愁嗟怨之作。境與物同。情隨時異。君子於是乎觀詩而審政焉。國家肇迹龍居河而都和林。我世皇迨今。蓋將

百年矣。扈從文臣，不知其幾何人也。余欲合中統至元及古愚後諸作，余雖不能詩，適與古愚前年同行，又嘗有屬和焉。哀刪定以上少爲觀風者之一助云。若駢儷之工，纂組之巧，則有不暇論者。

跋上駕紀行詩

莆田陳旅 衆仲

國家承平之久，山川草木之間，五色成文，八風不姦，文士含茹光景，故率多雅製。況車駕之經行，都邑之壯大，宮闕之雄麗，長谷廣野，幽泉怪石之兼勝，而從臣又多司馬長卿、揚子雲之流，其藻思足以鋪寫承平風物之盛乎。東陽胡氏古愚《上京紀行詩》五十首，清妥秀潤，興寄閒適，無急調，無蹇詞，真盛世良作也。旅齒弱於古愚，而多病早衰，才又最下，往年扈蹕還，過李老谷，同行趣和詩，率意題壁間，不見醜惡，今得此中所作讀之，不覺自笑曰：吾詩真所謂豁達李老谷者爾。安得如是之媿媿乎。因識吾愧。

跋上京紀行詩

宛平曹鑑

至大間，愚處建業，古愚以郡文學來自京華，日相從事於文字間，驩如也。別逾一紀，凡再遇錢塘，一會京師，每以世故牽迫，不得有如疇昔。至順壬申，河南大比，行省馳使朔南，延余二人，主較秋闈，筆硯餘閒，古愚出示扈蹕紀行詩數十首，詠物摠懷，字清句健，使人終日不能釋手。因憶延祐初，兩至上京，與故參政復初、侍講伯長偕行，雖時有唱酬，不如是之富也。況今年以暮思日以衰，雖欲追襲延祐時，且不可得，其視之在建業愈遠矣。感嘆之餘，書以歸之。

跋上京紀行詩

同郡吳師道

昔予再遊灤陽之後。嘗隨景成詠。不能如古愚多且奇也。攬譯已輒志吾媿。柳貫記五季已來。自燕雲而北。限隔不通。其山川風物。間有識之者。輒錄以誇創見。亦終莫得而詳也。國家混同八荒。遠際窮髮。灤陽去燕千里。上京在焉。每歲時巡。侍從之臣。能言之士。覽遺跡而興思。撫奇觀以自壯。鋪陳頌述。皆昔人所未及言者。夫其所以致此。豈偶然哉。吾東陽柳博士道傳。黃應奉晉卿。今胡編修古愚。皆有紀行之作。藻麗精工。前後輝映。一鄉而得三人焉。他槩可知。吁亦盛矣。愚才不足以齒三人。何敢望其足跡之所至。就使至焉。亦不能復措一辭矣。既哀其卷。又將廣求一時諸公篇帙。而繼續之。不啻身履其間。以爲承平之大幸。而無異時之恨云。

跋上京紀行詩

弘州王沂

至順三年冬。余同翰林供奉王致道。考試上京鄉貢士。出居庸關。過龍門。歷赤城。涉灤水。覽山川之雄深。宮闕之壯麗。遺臺故蹟之莽蒼空闊。可喜可愕。爲之目駭心動。欲寫其狀。一二以歸。冰雪之交寒。裂膚墮指。竟莫能就筆硯。然所謂雄深壯麗莽蒼空闊之觀。時往來余心。比還欲追憶所見而紀之。未暇也。一日。閱同館胡君古愚諸詩。所謂雄深壯麗莽蒼空闊之觀。皆歷歷在吾目中。昔人有云。眼前有景道不得。崔顥題詩在上頭。豈欺我哉。

跋上京紀行詩

揭傒斯

右翰林編修胡君古愚。扈從上都紀行詩五十首。學士虞公以下。跋語十五篇。自天歷至順以來。當天下

文明之運。春秋扈從之臣。涵陶德化。苟能文詞者。莫不抽情抒思。形之歌詠。然未有若胡君之多者。諸公又皆能揚英振藻。極形容之美。可謂一時之盛。千載之下。觀者當何如其想象而景慕也。予舊讀胡君京華雜興刻本。欲擬作數首。輒罷不能。今復觀此卷。而志意衰耗。有甚於前者。豈能復可彷彿哉。惟增感嘆而已。至順四年二月四日。

跋大拙先生傳

趙亨

澗人陳信甫者。空同鄒忻之徒也。病世大巧。故自號曰大拙。然烏知夫大拙。必有大巧存焉。嘗試觀之。金注者。非不欲巧。而不能致於巧。瓦注。非必欲巧。而卒能致於巧。何哉。蓋以金爲注。是重於外。而悻於中。雖欲必巧。烏得乎巧。以瓦爲注。是輕於外。而安於中。雖欲不巧。烏得乎不巧。由是而觀。欲巧者。反拙。欲拙者。反巧。老子曰。大巧若拙。吾因讀大拙先生傳。而益信老子。

跋大拙先生傳

江村 錢良右

癸未初春。古愚父再遊京師。道經吳下。江村民既往見。卽忻然示所作大拙先生傳。讀數行。未省其人。而曰。先生出處大略。皆予所曾道者。至終篇。乃相示大笑。因語之曰。此古愚自信之可從吾言。而爲先生傳耶。使古愚拙於文詞。則先生之拙。將不能信於世矣。又曷能致館閣羣公。信其可信。各盡其拙之論哉。余生江南石林之下。以先生得附姓名於傳。已幸矣。復幸得一接耳目於天朝縉紳之間。亦何不可。於是相與觴酒。酒盡書以識別。江村民錢良右。時爲至正三年正月十九日也。

跋大拙先生傳

張雨

大拙先生傳。識其陳氏而信其名。是傳也。遇鄒忻。可使之跋語。而俾黃仙鶴書而刻諸庶相與不朽。樵人張雨再拜書于卷尾。

跋古愚升學祭器文

襄郡 李源道

曰。予嘗記蜀學禮器。考古制度名物。累千百言不少休。古愚升學祭器文。首尾才三百言。視予舊作。所謂陸蕪而潘靜也。安得不避三舍。

跋升學祭器文

巴西 鄧文源

韓文公畫記。本儀禮顧命考工記諸書。不立論議。而書法備見。此亦文之至者。胡君古愚記昇學祭器。其亦有得於此與。夫文可以學而工。名不可求而得。求名以爲文。則非古愚之志。

跋古愚鑾坡小錄

吳澄

麟臺備太史記言之職。而北門掌書命。唐宋之制然也。今併屬之翰林。專且重矣。記言一職耳。而孫覲撰麟臺故事。上中下三卷。載纂述論撰之度。已不勝其詳。今古愚所次小錄。殆孫志也。然特備古愚之所經見。而前後沿革。猶有待而後具。循序而升。近在旦夕。予願因吾古愚續錄。而有請焉。

附記

胡氏瞻族莊記

孫德之

吾與胡君居同邑。南北回遠。會最闊稀。一日。介子嫺黨呂東萊言曰。先人辛勤起家。平居絲粟不妄費。惟於族屬不靳。視其居約無盤筵者。每加周給。歲以爲常。晚更欲增墉畝。興剏義莊。未就卽世。不肖孤詎敢死吾父而不圖乎。厥旣置田千畝。乃增損范文正公規約。件爲條目。欲垂永久。願子詞而列之也。予曰。君爲是舉也。不惟可以收合宗族。其深得繼志述事之義矣。古者大宗小宗之法。素明。人心有所系屬。不至於渙散而不可收拾。後世有親未盡而不相追求。冠婚不告死不訃者。由立宗之法壞也。夫繼禰者昆弟也。其服基由是而繼祖。繼曾祖。高祖則有功總之等。至祖免則無服矣。先王本之天理。酌之人情。其節文不得不若是也。原其初意。欲其相與輯睦如一。豈以疎逖。遂待之如路人也哉。嘗觀周孝侯碑陰。載宗簿。宗尉宜與吏民譜。每院亦簿尉之。簿尉之職。是宗法歷隋唐猶未盡壞也。予胡氏自祖七世而下。不問豐約。例皆廩給。生有養死有歸。婚嫁遺其資。嬰孩得以遂。而又招延師友。以助其脯修。收效名場者有賀。稍失繩尺者有罰。此雖未正古人簿尉之名。而維持宗法之意。在其中矣。昔孟軻氏謂親親而仁民。仁民而愛物。蓋先後次第之常然耳。觀錢君倚記范文正義田。第言及郡侯而不及親隣。豈其力有未逮乎。君視親戚隣里如其族。幸而在茂異之選。則餽遺施焉。不幸而在窘急無告之數。則賑恤先焉。自是充之義。不可勝用也。君又謂年運而往。後之人不能遵承其美意。則是莊且壞矣。而不知恆心危慮。條疏靡陳之于州縣。于都漕于版漕。申明訓飭。俾子孫世守而不渝。慮益遠矣。雖然。此特其具焉耳。義理根於人心。未嘗

間斷。胡氏子孫自講明學問中來，獨無此心乎？將見粹然一出于正，雖百世不墜爾也。君名祐之，字天錫，雅潔好修，嘗上春官而未第。其先君子蓋諱中行，字德輿，云宋淳祐二年夏五月端午，中奉大夫，東陽縣開國男，食邑三百戶，賜紫金魚袋，孫德之著。

送胡主簿詩序

馬國章

異時吾婺文獻，視他都爲獨盛。自今觀之，以忠節行誼顯者，則有忠簡宗氏、節愍梅氏、默成潘氏，以道學著者，則有毅齋徐氏、東萊大愚二呂氏、北山何氏、魯齋王氏、仁山金氏，以文章家名者，則有香溪范氏，所性時氏、香山喻氏，而龍川陳氏，說齋唐氏，則又以事功之學而致力焉。是數氏者，皆相望百載之內，百里之間。彬彬乎郁乎，其鸞鳳之岐陽，驂騑之冀北歟！內附以來，故家喬木，日就凋落，而百年耆舊無在者，久之白雲許氏，復以金氏之學鳴於時，而石塘胡氏伯仲，亦以雄文俊行，與許氏相先後。二氏之後，由文學入通朝籍者，是待制柳氏、學士黃氏、禮部吳氏、修撰張氏、太常胡氏、御史王氏，此蓋其卓然者也。余生雖後，幸及執弟子禮於許氏之門，故自柳氏而下，又皆得而師友之。十數年來，復將於此有所考問，顧先師已夢奠，而故老遺書，多不存矣，不亦悲夫！至正癸卯，余以兵亂寓吳門，回視故鄉，恍如隔世，方將訪其鄉先生子弟之在吳者，而胡君季城，自京師至焉。季城，乃太常之子，尤余之所敬慕者也。居空谷者，聞人足音，猶蹙然而喜，況於兵戈阻革之際，而見其如季城者，其爲喜慰，宜何如耶！季城以太常遺蔭，爲管庫官，繼持省檄于京師，遂擢杭州路總管府照磨，會大都鄉試，季城以流寓與貢，及試春官不利，而京師諸

公無能以館閣爲薦者。僅取廣西一簿司以去。廣西乃去天萬里烟瘴之地。自承平時往者猶憚行。而況四方多故步荆棘之時乎。使季城繼其家學之所自。非不足於美官也。然乃敝裘羸馬。毅然遠歷險阻。無所避。亦獨何心也哉。余以桑梓世戚之故。嘗率大夫士力留季城。而季城乃曰。家貧在遠。急於祿矣。余知其情。遂不敢留也。嗟乎。老成人雖無尙有典刑。余於婺學微絕之餘。得季城逆旅中流風遺韻。庶將卽是而有見。而季城棄我如是。是終無以廣其寡陋也乎。季城且行。大夫士之所嘗留者。咸賦詩以餞之。以予於季城爲眷舊。俾書一以爲序。余念無以爲季城言者。獨以昔者吾婺文獻之懿。而其道之如此。他若季城爲學之始末。廣西風土之美惡。已見於羣公所賦詩。此不贅。時乙巳春三月旣望。龍泉縣西尉致仕。邑人馬國章書。

覆博士相公書

宋 濂

濂拜覆博士相公純白先生尊前。濂伏自去春上問。迨今又一年矣。瞻戀之誠。未嘗斯須忘也。卽辰孟夏。伏計尊候納福。深用欣懌。濂山中多暇。恐鄉先達言行不傳。因忘固陋。撰爲人物記一書。第以學淺識陋。中間疵類甚多。苟不謁大匠。以指剔其謬誤。以取信於人。謹用納上一帙。儻先生不賜譴訶而辱教焉。不勝感幸。鄉間諸老。歸然如魯靈光獨存者。惟先生及侍講公耳。關繫斯文。甚不小也。伏望愈加葆蓄。以康壽體。以慰後學惓惓之望。謹勒狀不備。

覆太常相公書


宋 濂

濂頓首再拜。狀上大常相公尊先生侍前。濂近於麟溪之上。獲聆偉誨。使頽惰之志。奮然振起。慶幸何如。拜別以來。伏審尊候納福。深用慰懌。浦江吳立夫先生。負絕倫之才。不能少見于世。以死。濂嘗受業其門。惡得不深傷之。所幸遺橐具在。雖死猶不死也。然非大人先生冠以序文。又烏能傳之於遠哉。是以忘其愚陋。惠望再拜以請。幸先生垂念焉。儻蒙揮灑。則感戴盛德。終身不忘。臨書不勝瞻戀之至。不備。

覆太常先生書

宋 濂

濂拜覆。太常先生函丈尊座前。濂向者不自揣度。僭以先師文集。敍上干鴻筆。殊竊悚懼。特蒙矜憫。慨然留諾。自非念鄉學之彫落。哀潛德之未白。不至是也。感刻無限。近來想已脫橐。若得示教。實拜先生之終賜也。末由趨拜牀下。伏紙重增依戀。不備。三月二十六日。



稿遺制待趙

詞 附

撰 雍 趙

趙待制遺稿

本館據知不足齋
叢書本排印初編
各叢書僅有此本

趙待制遺稿

玉耳墜金環

即燭影搖紅

乳燕交飛。曉鶯輕囀。花深處。畫堂簾幕。捲東風。晴雪飄香絮。猶記當時院宇。悄寒輕。梨花暮雨。繡衾同夢。鴛枕雙欹。綠窗低語。春已闌珊。落紅飄滿西園路。強拈鍼線。解春愁。只是無情緒。無奈年華暗度。黛眉顰。柔腸萬縷。章臺人遠。芳草和煙。萋萋南浦。

浣溪沙

楊柳樓臺鎖翠煙。楊花簾幕撲香綿。佳人何處隔江山。芳草已生千里恨。玉笙吹徹五更寒。夜深和淚倚闌干。

落盡楊花滿地春。綠陰如淨淨無塵。日長庭院掩重門。斜墜金釵雲半髻。淡妝香臉粉輕勻。相思偏是少年人。

憶秦娥

春寂寂。重門半掩梨花月。梨花月。芳心如醉。暗思當日。金釵欲墜烏雲側。佳人望斷天涯客。天涯客。今年又過。清明寒食。

踏沙行

畫角聲殘。金爐煙裊。長空澹澹。連芳草。朱簾半卷。晚霞明。塞鴈無情音信杳。雨散雲收。離多會少。相思真个令人老。不須惆悵。且開懷。一尊滿引。愁如掃。

春夜曲

去年美人未還家。綠窗青春桃始花。桃花今年只依舊。美人別後長咨嗟。芳心欲傳向誰愬。捲卻羅袖彈琵琶。琵琶聲哀思欲絕。衣上啼痕幾時滅。共君別久胡不來。菱花寶鏡生塵埃。君隔揚子江。妾居黃金臺。臺雖高。望無極。人萬里。今天只尺。春水綠波春草碧。來魚去鴈無消息。日既暮。兮月色寒。相思如夢彫朱顏。青燈炯炯照不寐。攬衣起坐空愁歎。

早春

高卷朱簾日漸長。梅花庭院雪飄香。閑倚闌干看新柳。不知誰爲染鵝黃。

暮春

綠陰庭院碧窗紗。半卷朱簾暎晚霞。芳草萋萋春寂寂。東風吹盡落殘花。

短歌行

君不見。潁川水。首陽薇。民到於今慕夷齊。巢由之民誰不知。又不見。千門萬戶宮。神明通天臺。及今千五百餘載。空遺荒土飛黃埃。西風蕭蕭秋草萎。野花灼灼啼鳥悲。落日欲留不可得。夜深明月依然來。玉樓朱閣盡如夢。自古興亡何足哀。

結羊腸

都下風俗至正月十六日家家兒女以紙九條或用皮者結以爲卜謂之結羊腸其名甚古因以詠之

孟春之月春始和。陌頭柳色黃如鵝。落梅紛紛稍覺多。白日炯炯耀綺羅。曜綺羅。日漸長。春風庭院花草香。十六初過上元節。家家女兒結羊腸。含情暗卜心自語。何時得似雙鴛鴦。結成羊腸腸反斷。惆悵春閨坐長歎。強持薄怒嬌且羞。折花倒插金釵頭。

美人曲

美人如花花不如。翠滑難勝碧玉梳。道脩且阻無音書。蛾眉長顰未曾舒。春風吹衣裳。黯然淚沾襟。嗚呼本無心。轉添愁海深。牕前紅梅花。落盡不可簪。玉臺明鏡如秋水。疑有人閒兩西子。美人未可彫朱顏。朱顏但願長如此。

千里思

顏如花。膚如雪。秋水雙眸面如月。千里相思不相見。當時卻恨輕離別。美人美人顰蛾眉。綠窗寂寂春風微。巫山夢斷君何處。化作朝雲縹緲飛。

攤破浣溪沙

春草萋萋綠漸濃。梨花落盡晚來風。試問相逢何處好。小樓東。朱箔影移無限恨。玉簫聲轉曲將終。獨倚闌干誰是伴。月明中。

蝶戀花

顏色如花膚似雪。嬌眼傳波。密意曾低說。羅帶同心愁未結。情多不忍成輕別。別後相思心更切。異日重逢。鏡裏花難折。寶篆香銷煙漸歇。玉簫吹徹黃昏月。

浣溪沙

翠鎖蛾眉別恨濃。羅衣初試怯春風。相思只爲兩西東。簾捲玉鈞雲澹澹。香銷金鴨雨濛濛。此情都在不言中。

蝶戀花

枝上流鶯千囀巧。好夢方成。又把人驚覺。臨鏡慵妝眉澹掃。羅衣寬盡腰支小。別久啼多音信少。應是嬌波。不似當年好。籬卷東風深院悄。落紅滿地和芳草。

有所思

紛紛落花飄。美人在何許。相思杳如夢。寂莫春已暮。一別久不見。一往久不還。相望雖只尺。如隔千萬山。

南鄉子

別久漸生愁。知有音書苦未收。此際多情應盼我。凝眸帶得啼痕上小樓。舉止忒風流。只在城南綠水頭。只尺藍橋重欲見。無由兩地相思甚日休。

人月圓

人生能幾渾如夢。夢裏奈愁何。別時猶記。眸盈秋水。淚溼春羅。綠楊臺榭。梨花院宇。重想經過。水遙山

遠魚沉鴈杳。分外情多。

又

相思何日重相見。山遠水偏長。鳳弦雖斷。鸞膠難接。愁滿離腸。最傷情處。鮫綃遺恨。翠鬢留香。故人何在。濃陰深院。斜月幽窗。

江城子

仙肌香潤玉生寒。悄無言。思綿綿。無限柔情。分付與春山。青鳥能傳雲外信。憑說與。帶圍寬。花梢新月幾時圓。再團圓。是何年。可是當初。真个兩無緣。極目故人天際遠。多少恨。凭闌干。

又

五陵衣馬恣輕肥。競新奇。亦何爲。混處賢愚。誰與辨雄雌。任爾刺天何足道。終不肯。羨羣飛。燕山花落暮春時。杜鵑啼。勸誰歸。耿耿孤忠。唯有此心知。天賦我才還有用。應不至。負心期。

燭影搖紅

新綠成陰。落紅如雨。春光晚。當年誰與種。相思空羨雙飛燕。寂莫幽窗孤館。念同遊芳郊秀苑。香塵隨馬。細草承輪。都成腸斷。別久情深。幾時重約。閑庭院。高樓終日卷朱簾。極目愁無限。莫恨藍橋路遠。有心時終須再見。休教長怨。鏡裏孤鸞。篋中團扇。

水調歌頭

春色去何急。春去尙微寒。滿地落花芳草。漸覺綠陰圓。馬足車塵情味。暑往寒來歲月。擾擾十餘年。贏得朱顏老。孤負好林泉。寶裝鞍。金作轡。玉爲鞭。須臾得志。紛華滿眼。縱相謾。功名自來無意。富貴浮雲何濟。於我亦徒然。萬事付一笑。莫放酒杯乾。

七夕

初月纖纖照露臺。枉將瓜果鬧嬰孩。今宵自有經年約。何暇閑情送巧來。牽牛河東織女西。相望千古幾時期。夜深只恐天輪轉。地底相逢未可知。

古詩

西風聲蕭蕭。愁來如夢寐。鄉關萬里遙。兄弟何時會。遲此相見期。真以日爲歲。別來經八霜。朱顏恐顛頓。人生宇宙閒。名利何足計。何如雲中鶴。翱翔隨所至。

又

我居水精宮。遠遊來朔方。離家近十載。兄弟遙相望。始見世情薄。紛紛名利場。富貴不可期。人生難付量。乾坤本無私。江山歎興亡。蟬聲噪落日。露草啼寒螿。明月如有情。照我肝與腸。西風動林末。蕭然秋意涼。回首歲云暮。信美非吾鄉。展轉復展轉。愁多知夜長。

思歸

嫋嫋秋風動客懷。啾啾猿鶴苦相催。魯侯不遇關天意。戚氏焉能沮我才。萬里驅馳雖郢國。十年奔走任

塵埃吳興山水何清遠。一棹扁舟歸去來。

初秋夜坐

夜深庭院寂無聲。明月流空萬影橫。坐對荷花兩三朵。紅衣落盡秋風生。月明如水侵衣溼。臺榭沉沉秋夜長。坐久高僧禪語罷。澹然相對玉簪香。

秋聲

邕邕鳴鴈復南征。十載栖遲在帝京。黃葉未零寒未應。秋聲偏動故鄉情。

卽事

萬籟同一寂。月明天地清。淒淒白露下。滿襟秋意生。獨坐對明月。遙遙千古情。西風兩三日。庭樹已秋聲。

木蘭花慢

恨匆匆賦別。回首望。一長嗟。記執手臨流。遲遲去馬。浩浩平沙。此際黯然腸斷。索一痕明月。兩天涯。南去孤舟漸遠。今宵宿向誰家。別來旬日。未曾過。如隔幾年華。縱極目層崖。故人何處。淚落蒹葭。聚散古今難必。且乘風高詠木蘭花。但願朱顏長好。不愁會少離多。

延祐六年春正月。寄呈德璉姊丈一觀。冀改抹幸甚。書於大都咸宜里之寓舍。趙雍。

趙待制風流習尚。不減魏公。而詩文不傳。閒見於卷軸閒。不過單辭數言而止。未有若此卷之富者。楷

行閒作。轉益妍美。後云。書寄德璉姊丈。蓋魏公長倩王國器也。國器長於今樂府。楊鐵崖亟稱之。故此卷所書樂府爲多。豈亦因其所好耶。余從烏程王天雨借觀。遂題其後。是歲正德己卯五月既望徵明題。

趙仲穆書。克紹松雪家學。時能亂真。此卷尾非署名。及與姊丈德璉云云。殆以乃翁目之矣。所書凡卅五首。而豔詞特多。或偶興爾閒。如少恨凭闌干。水調歌頭二闕。并古詩二篇。思歸一律。頗以孤忠自許。紛華是薄。而興亡骨肉之感。默寓其中。意其父子之仕當時。亦容有不得已者。良可悲已。吳興太峯茅君。攜示此卷。實出烏鎮王少白氏。太峯之於少白。亦猶仲穆之於德璉者。是宜與共何嫌也。仲穆書法之善。衡山公論之已詳。予復何贅。辛酉春。吳郡許初。題于茅君舟次。

趙待制詩詞流傳希少。前年偶得此墨跡橫卷。以校顧氏秀野堂元百家詩。則正從此卷采獲。但其詩尙有遺者。而詞更有所不暇及也。余因并付開雕。以志區區嗜古之癖。其前後次第。胥仍舊云。乾隆七年八月。援鶉居士書。

附錄王國器詞

菩薩蠻 題黃大癡畫卷

青山不趁江流去。數點翠收林際雨。漁屋遠模糊。煙村半有無。
大癡飛醉墨。秋與天爭碧。淨洗綺羅塵。
一巢栖亂雲。

踏沙行

題破窗風雨爲性初徵君

潤逼疎櫺。寒侵芳袂。梨花寂寞重門閉。檢書翦燭話巴山。秋池回首人千里。
記得彭城。逍遙堂裏對牀。夢破簷聲碎。林鳩呼我出華胥。恍然枕石聽流水。

右二詞見于鐵網珊瑚。吳興王國器之作。自題筠菴。其自號也。詞致風流瀟灑。不媿玉潤之對冰清焉。
乃今氏名滅沒。志吳興者。寂寥無聞。良可慨已。因校仲穆遺藁。書此附于卷末。己亥穀日。焯跋。

此稟得之書船上。惡札爛鈔。未堪迴讀。有友言于余。仲穆手蹟。在吳下舊家。扁舟往觀。字畫鈎勒微緩。疑是摹仿。然別風淮雨之訛。藉以校正。爲功多矣。因手書一通。藏之祕笈。并松雪集中誌狀之誤。附記于後。康熙五十八年己亥。小年朝雪中。繡谷亭主吳焯手錄。

雍字仲穆。魏公仲子。以蔭守昌國海寧二州。歷官翰林院待制。其詩詞娟麗可誦。卷中僅三十五篇。特一斑耳。繪事絕佳。綽有父風。龍子虎兒。殆不是過。方魏公以文章受知兩朝。出入承明。垂數十年。然爲奸人側目者屢矣。幸仁宗之明而剖之。卷中有魯侯不遇之語。斯殆有所慨而發歟。春王五日。繡谷亭書。

案卷尾仲穆自署延祐元年。是歲甲寅。元仁宗在位之第三年也。方仁宗在東朝。雅知魏公賢。卽位。拜公集賢侍講學士。中奉大夫。是爲皇慶元年壬子。明年癸丑。改翰林侍講學士。尋轉集賢侍講學士。正奉大夫。又明年。改元延祐。是歲十二月。升集賢學士。資德大夫。則仲穆書軸之時。公方爲集賢侍講學士。時方纂脩國史。最被上知。上諭有趙子昂帷幄之臣。置之館閣。使之討論古義。典司述作。傳之後世。足以增重國家。此正居京師咸宜里第之日也。楊載撰魏公行狀云。公延祐丙辰。拜翰林學士承旨。用一品例。推恩三代。竝得加贈。妻管氏。贈魏國夫人。考丙辰。乃延祐三年。夫人方從公于京師。時封吳興郡夫人。至延祐四年。公始進承旨。于是有三代之錫。管因加封魏國夫人。見公自撰管夫人墓志。則公拜承旨。與管拜魏國。皆在第二年。抑且不應書贈也。又楊狀稱夫人先公四年卒。考墓志。管之卒在延

祐六年己未。是春公請旨歸里。四月發上都。五月十日。夫人卒于臨清舟中。公以後三年。英宗至治二年。歲在壬戌六月。卒于故里。則夫人之卒。先公僅三年耳。楊爲公之門人。其作狀距公歿才兩月。不應差誤至此。且仲穆名聞於時。而于家系不爲之釐正。何也。因校是編。旣爲手錄。并考其作書之歲月。而附記于後。人曰。焯再書。

編主五雲王
編初成集書叢
種一他其及稿類齋白純
詞附錄附
册 三

中華民國二十四年十二月初版

徐朱

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

●〇六三二一



3
4
2091